


ÛJAADIKÀ DÎYÌ DYÈNDÈ

 Twinyikààyikù mitu bwà katançi kakesè cyanààna. Taatù wa mu Dyulu munanga, tudi ne kusàkidila bwà patùdi kaaba aka dilòlò edi. Twètù, tudi ne kusàkidila bwà patùdi bamanyè ne Bwikadi Bwèbè bùdi neetù kaaba aka. Mpindyewu tudi tulòmba bwà Wèwè kwambulwisha yònsò wa kutùdi, bilondèshile dijinga ditùdi naadì. Tudi tulòmba nùnkù mu Dîna dyà Yesù. Amen. (Sòmbaayaaku.)

Byùmvwika ànu bìmpè bwà kwikalakù ne bikòlokolo ebi byasa ku nzembu. Mvwa muumvwè bibì be mùmvwa mwenza bu mubinyanga makèèlèla awu, Mukenji wùmvwà muswè ngamba kufwà bwà nwènù kupeta.

² Ne mvwa muswè bwà nwikalè batwishiiibwe bwà kucimòna. Cìdi lwo—lwongò lutùdi naalù. Katwèna beela lwongò kùdi èkèleeziyà kampànda to. Tudi beelè lwongò mu Kilistò, nudi numona's. Yèyè ki Njila umwèpelè awu. Yèyè ki mwaba wùmwèpelè wà dikùbiibwa, mwaba wùmwèpelè wùdiku Nzambi mutèèkemù Dîna Dyèndè. Ne Nzambi wàkamba ne Ûvwa mwà kutwilangana ne bantu mu mwaba wùvwàYe musungùle bwà kutèèkamù Dîna Dyèndè; kamùyi mu ciibi kanà cyònsò to, kàdi mu ciibi cidiYè musungùle. Nènku mu wòwò mwaba awu mmùvwàYe mwà kutwilangana ne bantu, ne ànu mwómò amu nkààyaamù. Nènku tudi tusangana ne Nzambi kacya kàtukù mutèèke Dîna Dyèndè mwaba nànsha umwè to ànu mu Mwàn'Èndè, Yesù Kilistò, ànu mùdibi ne mwànà misangu yònsò ùtu wàngata dîna dyà taatù.

Kàdi mpindyewu wèwè udi wamba ne: “Èè, aci cidi cyàngaciibwa bìshi leelù? Muntu ne muntu ùdi wàmbà ne: ‘Mémè ndi munda mwà Yesù.’”

³ Yèyè's ùdi Dîyi. Ne: “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi. Dîyi dyàkawjiiibwa mubidi ne dyàkasòmbela munkaci mwètù.” Kàbidì, bààkafunda kàbidì mu Bwàkabuulwibwà nshapità wa 19, patùdi tuMumòna ùlwa, Mukàji-musèla ne Mubàki, cinkùtù Cyèndè cizabika mu Mashì ne: “Dîna Dyèndè òvwa dìbiikidiibwa ne n'Dîyi dyà Nzambi.” Yèyè ùdi Dîyi dyà Nzambi.

⁴ Nènku, mbwena kwamba ne, Yèyè ki bukolè bufùùluludi. Yèyè ki Nyumà Mwímpè mbwena kwamba ne, bu—bukolè bwendeshi bùdi bùbwelà mu byamù bilamakaja abi, Mèyi, bùdi bùAvwijà ne mwoyi. Nènku bìkengela bwà byònsò bìkwatè mudimu pàmwè, cyanààna kabyàkukùmbanakù to. Bìkèngela ciikalè Bible mujimà, Kilistò yònsò nkòng, Èvànjeeliyò mu kaabujimà.

5 Ndi muswè kwambila, beena muyiiki wa ku cisanji wúmvwà mbandila ku tèlèviziyò makèèlèlè dilòòlò, bu múmvwà mumanyè ne wùvwa mwà kwediibwa, ki mèmè kuwùbandila. Ndi muswè kwela nsèke ku bìvwa bânà bèètù aba bambè abi, biinè bàvwà ku muyiiki wà ku cisanji abu, mudimu mwowela byanza wà dyandamuna ku nkonko's! Ne mèmè ndi mudyudi wa dikèma, nudi bamanyè's, twamb'eku twamb'eku, kàdi kakùvwa cyà didyùlamù to. Kakùyi mpatà to cìvwa cyà cyà bushùwà, ne mvwa mwà kwitaba aci, lukàmà pa lukàmà. [Disangisha didi dituuta bikàshi—Muf.] Twasàkidilaaayi. Amen. Mandamuna awu àvwa mu wòwò kakùyi cyà didingila to. Mvwa muànyishe cyà bushùwà. Mvwa ànu kujinga kwikalakù ne mukàbà wà bindidimbi wà dilèejakù mu èkèleeziyà mwànyi kwètu. Bìvwa bilenga byà kacya.

6 Ne ndi ne kusàkidila kwàbùngì bwà kumanya ne—ne Nzambì mmukwàte mudimu mu bipaapu bikwàbò, pa kuumusha kasumbù kèètù sungasunga kàà beena Mpenta, usòbola bantu, mamiinu à Nzambì awu, àvwà àsanganyibwà pambèlù pààpa munda mwa bidimu byònsò ebi, mindile bwà Bukènkè bùbàteemènè.

7 Ne cìdi kàbìdì citùpèèsha didimwija's, nwènù balundà bàànyì, bwà kumanya ne Yesù wàkamba ne: “Pààkatwàdijà virgò mukùtākàne ewu kubwela bwà kusumba Maanyì, apu ki pàvwà Mubàki ùlwa.” Pa nàнку tudi mwà kumwèna ku cyòci aci, patùdì tumòna ba-Épiscopaliens, ba-Presbytériens, ba-Méthodistes, ba-Baptistes, ba-Luthériens, bàbwela bwà kupeta Maanyì, piinè apu's ki dîbà dyàkalwà Mubàki adi. Twikalàayi bavùlùke aci.

8 Kacya ncìtukù mwanji kuumvwa Billy, mwanàanyi wa balùme ewu, ùngambila cintu cyà bwena cidiye mungambile, ànu katanci kakesè aka to. Wàmbi ne: “Papa, ncyèna nkwambila cyà dyenza to. Ncyèna ne meeji à kukukèmesha ku kantu nànsha kàmwè to, kàdi,” yèyè ne, “papa, cyònsò cyùdì wenza, fila dîbà dyèbè dyònsò bwà babèèdi abu.” Yèyè ne: “Kacya ncìtukù mwanji kumòna babèèdi bùngì nunku to!” Yèyè ne: “Ndi mufile twartà nkàma yìbìdì ànu mu kasuna kàmwè anyì túbìdì cyanààna.” Yèyè ne: “Kùdi babèèdi bùngì cyanààna!” Yèyè ùtu ùngambila aci ku mpùkàpùkà menemene.

9 Nènku ndi mulwè dilòòlò edi ne tuntu tukesè ndambù tufùnda kaaba aka, ne ndambù wa nsèke pa cilumbulwidi cìcilwàlwa, ne mumanyè ne tudi basòmbe kaaba aka dilòòlò edi ne ciji cìkolè cyà Nzambì cituuta mwinshì mwètù mwà buloba, ne abidi aa necituute bikole. Ne mumanyè ne ciji cìkolè cyà Nzambì ncindile; ànu pa dîbà dyàmbiibwàci, nekùjikè, bwà mìliyò yà bantu. Ne bu mùndì mumanyè aci munda mwà mwoyi wànyi, ne mumanyè ne nebùikalè nàнку! Nènku dîbà adi tudi tumòna babèèdi bùngì cyanààna, bàsukuma ne bàkoka.

¹⁰ Ki mèmè kudyàmbidila ne: “Dilòòlò edi, bààbúngì bàà kùdìbo mbeena Kilstò.” Nènku lekèlaayi ngámbe bwalu ebu, nwènu bàna bàà Nzambì. Cyònsò cyùdi wenza, lekèlè bikwàbò byònsò. Kwàcilà wèwè Nzambì mudimu, butùku ne muunyà, ne mwoyi wèbè wònsò. Wèwè, udi mwà kuumvwa ne kùdi cintu kampàndà cibì. Udi mwà kucyùm vwa paùdi wenda mu misèsù apu, udi ànu . . . ne kwònsò kúyaayà aku. Udi mumanyè’s, wèwè wa nyumà; ne mèmè ndi mumanyè ne ki cyùdi.

¹¹ Nènku mvwa nyiikila ne muntu kampàndà, Mwanèètù Stromei. Ncyèna mumanyè Tony ní ùdi kaaba aka, anyì kènàpu. Yèyè, yèyè uvwa . . . [Mwanèètù kampàndà ùdi wàmba ne: “Tony Salameh anyi?”—Muf.] Tony Salameh, Salameh, Salameh, Salameh? To. Ndi ne Tony udi kàyì yèyè to. [Mwanèètù kampàndà ùdi wàmba cintu kampàndà.] To, awu n’Tony udi kàyì yèyè to. Ewu Tony yèyè ngwa mu—mu—mu Tucson. Dyèndè nganyì? [Muntu mukwàbò ùdi wàmba ne: “Stromei.”] Stromei! Ndi mumanyè ne n’Salameh, Stromei, anyì kampàndà. Ndi ne byònsò . . .

¹² Mu màkàjiinyì èndè, ditùku adi, mwàkabwela muntu, uvwa wa ùkòka ntèmà, ùvwa wàmba cintu kampàndà cyàkamvùlwijà, pàmvwà . . . musangu wà ndekeelu wùm vwa nsanganyibwa mu—mu Inde.

¹³ Mwòmo amu, ngeela meeji ne mmwàkatùpèèsha Mukalenge musùmbù wà mutàmbe bunènè wutùkaadiku bapetè musangu wùm wè, mùvwa mmu Bombay. Katùvwaku mene mwà kupeta myaba yà kubàtèeka to, makùmi à binunu ne binunu byà bantu.

¹⁴ Ne ànu kumpàla kwà kukùfika, kùvwa cibèjibeji kampàndà cikùdimuna. Èè, cívwa, Inde nditunga dyà bàakula myakulu yìbìdì, cívwa—cívwa cibèjibeji cyà mu Anglais. Nènku cyàmba ne: “Èè, dikanka dyà buloba didi ne cyà kwikala dijikè, nyuunyi yikaadi yibùuka yàlukila kwàyì ku maswa.”

¹⁵ Ndambu wa matùkù kumpàlà kwà dikanka dyà buloba adi kwenzekadi, divwà dyupùle mpangu ne bikwàbò adi. Tunyuunyi tukesè tùdi tùdipetela bisokomenu mu mbwebwe, ne twibaka maswa ààtu; ne mu mapingaja anyì mu nkànkàlà, pàdi díbà dyòshà bikolè menemene apu, nyama yònsò yìdi yimanyina ku myelelu yà bimanu byà mabwe abi, bwà kubwela mu ditalàjà. Kàdi munda mwa matùku abidì, nyuunyi yàkashàadila mu micì, kayiyikù mwà kwalukila mu maswa àyì to; ne munda mwà matùku abidì, nyama, mìkòòkò ne ngombe, kayìvwakù mwà kuseemena pabwìpì mu mapingaja amu, anyì kushààla kacya yimana pabwìpì ne bimanu abi to. Yà—yàkashààla pambèlu mu madimi ne myeyèmènàngàne ewu ne mukwèndè, bwà kupeta dilèji.

¹⁶ Pashìishe dyàkamwè, ki dikanka dyà buloba edi pwàà, aci kàdi kunyùkushaci bimanu ne kuupulaci nzùbu. Nènku, nwamònu’s, bu ne tunyuunyi tukesè atu tuvwa túsanganyibwa muntwwamu, nùnkù’s ntufwè. Bu ne ngombe ayi yivwa mishààle

miimànyine mwínshì mwàbì amu, ne mikòòkò, nùnkú's mmifwè. Nzambì ùdìmwija bufùkì's!

¹⁷ Kùkaadi ndambù wa matùkù, mu màkàjiiyì à Mwanèètù Tony mwàmwa, mvwa munkaci mwà kutèeleja muntu mwaba awu wàmba ne... Pààkenzekà dikanka dyà buloba edi mu Alaska, yèyè ùvwa munkaci mwà kulòba mu citùtù tubiikila ne Stony Point, mu Mexique mwàmwa. Ki kwambayè ne: “Nyuunyi kayìvwakù mwà kudyà to, ne mishipa kayìvwakù mwà kudiilà to. Kùvwa cintu kampàndà cyà kaciyi mu cyôci to. Nènku, dyàkàmwè, dikanka dyà buloba adi kukùtukadi.”

¹⁸ Nènku ditùkù adi, pààkenzekà dyôdi adi mu Inde amu, anyi kwónsò kùvwàbì aku, kwambayè ne ùvwa cyàkàbìdi munkaci mwà kulòba. Yèyè kudyàmbidila ne: “Èè, s' mbwalu bwà dikèma. Mishipa ayi's yitu yidiilà lwà pa díbà edi. Kakwèna divwala pa màyi to, mwaba nànsha wùmwè. Màyi àdi ànu matalàle, cikondo cimpè cyà mishipa yidiilà, kàdi kayìvwakù yidiilà to. Ne nyuunyi yónsò yitù pa ciibidilu yisanganyibwa pambèlu apu ayi, byambula-mishipa, yitù yàngulungana ne mishipa ayi ne bikwàbò abi, yivwa yónsò yènda yinyungulukila ku mwelelu wà màyi, myeyèmènàngàne. Mu katanci kakesè, ntutu ya mwínshì mwà mbù kubangayi kubànda mùshindù *ewu*, dikanka dyà buloba òvwa dyenzèkèle dyàmwàmwa ku luseke lukwàbò lwà buloba.” Nwamònu's, mishipa ayi yivwa mimanyè ne kùvwa cintu kampàndà cibì, cintu kampàndà civwa pabwipi ne kwenzeka. Nyuunyi ayi yàkamanya byà mwomùmwè.

¹⁹ Cyà bushùwà, piikalà Nzambì ùpèèsha mushipa ne nyuunyi dijingulula, mmùshindù kaayi mutàmbidile wiikalàYe ne cyà kupèèsha bânà Bèndè—Bèndè! Tudi bamanyè ne tudi ku cikondo cyà nshiikidilu, ne cilumbulwidi ncindile, pa nànkù twikalàayi ne kaneemu kàa menemene. Nyeemènaayi kùdi Nzambì ne mwoyi wènu wónsò! “Éyi Kaapènumà, wèwè udi mubàndishiiibwe too ne mu dyulu awu, neùpwekeshiibwè too ne mu ifernò,” kàdi leelù ewu yèyè's ùdi ùsanganyibwa mwínshì mwà panshì pàa màyi. Ikàlaayi ànu bavùlùke, ne nusambila.

²⁰ Mpindyewu, dilòòlò edi, ndi muswè kubala kaaba mu Mifundu emu, bwà katanci kakesè cyanààna. Netwikalè mwà kusambidila babèedi. Billy mmwambè ne mmwabanye mushiki mujimà wà twarta twà disambila. Ne mmufile tukwàbò makèèlèlè awu, kàdi ncìvwakù mufikè nànsha ku umwe wa kùdìbo makèèlèlè dilòòlò awu to. Ki mémè kudikonka, pàalu Nyumà Mwimpè... Cidi ànu... Kwèna mwà kuMufikisha ku dikwàtà dyà mudimu to. Mbyenzè ànu mùdi kakombo kakesè kampàndà, kàdi ukòka udyela wèwè mwinè mu biteshi. Nwènu mbàdi bafikishà Nyumà Mwimpè ku dikwàtà dyà mudimu, kì mmémè to. Nwènu biinà mbàdi bènza nànkù awu. Pa nànkù mémè, makèèlèlè dilòòlò, mvwa mumòne mene mu dijingulula amu ne, kadivwa nànsha dyèndè bimpè menemene kùdi bantu to. Kabàvwa bamwèke bu ne bàvwa bacyàngata ne mushinga to.

Ndi mucijandùle, kaaba aka pashiishe ne, bìdi bìmweka bu ne, too ne mu mùshindù kampànda, ànu mùmvwà ngaakula, bwa ditentekela dyà babèèdi byanza, bôbò's bàvwà bamanyè.

²¹ S'bvìwà bikèngela bwà twètù kufika ku dymvwà ne tudi bapèèbwe mu twètù emu, twètù bàdi biitàbùùje Yesù Kilistò ne balediibwe kùdi Nyumà Wendè ne buujiibwe tètè ne bukolè bufùùluludi abu aba, bukolè bùdi munda mwènù abu. Ku ditentekelangana dyà byanza, pa bakwàbò, mwàkenzà bayiidi ne munda mwà bikondo, Kakùyì mpatà to Wàkondopa babèèdi, kubiisha bafwè, Wàkaleeja bikeènà-kumòna, bipròfètà. Ne Nyumà mene umwèumwè uvwa musòmbèle munkaci mwà bàpostòlò bàà ku cibangidilu awu ùdi ne mwoyi mu èkéleziyà leelù ewu, wènza bintu ànu bimwèbimwè abi. Patùdiku mwà kucijingulula ne lùkàsà lwónsò! Nwamònu's, nànsha ciikàle cikwàta mudimu bishi, bikèngela ùcijingùlùlè ne ùcitàbùùje. Kacyàkukwàcishakù to nànsha kakesè, paùdi kùyì mucitàbùùje. Kàdi dìbà dyùdi ànu ucitàbuuja, ntàtù yèbè yàjikì. Aci ncilelèlà.

²² Mpindyewu tubuululààyaaku mu Mifùndu. Mwà musòmbè mwaba awu, kùkaadi katanci, mèmè kufùndà ndambù mukwàbò wa Mifùndu, bwà kushintulula cyena-bwalu cyànyì bwà dilòlòlò edi. Nènku ndi muswè kubalakù ndambù mu Díyì dyà Nzambi, mu Mukàndà wà Luukà Munsantu, nshapità wa 8, kubangila ku mvensà wa 40. Tèèlejèàyaaku mpindyewu, nèmbalè byàbùngì.

Nènku byàkenzeka, ne, pààkaalukilà Yesù, bantu bààkamwakidila ne disànkà, bwalu bònso bàvwà bamwindile.

Aci kì ncifwànyìnekù kwikala lwidì lwimpè bwà musùmb'ewu dilòlòlò edi anyì?

Nènku, mònaayi, kulwakù muntu dìnà dyèndè Yayilò, ne yéyè awu ùwà mukòòkeshi wa nsunàngòngà: ne wàkadyèla panshì ku makàsà à Yesù, ne wàkamusèngeleela bwà àbwelekù mu nzùbu mwèndè:

Bwalu yéyè ùwà ne mwànà wa bakàjì umwèpelè, wa bidìmu bitwè ku dikùmi ne bìbìdì, ne ùwà mulàadika ùpùnga ne lufù. Kàdi pàvwàye ùyakù bantu bààkamukùngwila.

Nènku mukàjì kampàndà mwikàle ne dĩaamà dyà mashi àlwa munda kùkaavwa bidìmu dikùmi ne bìbìdì, ùkaavwa mutùùle byèndè byónsò ku bangàngàbukà, kàjì mwà kwondopiibwa nànsha kùdi umwè to,

Wàkalwila paanyimà pendè, ne kulengayè luzemba lwà civwàlù cyèndè: ne dyàkàmwè dĩaamà dyèndè dyà mashi àlwa munda adi dyàkakàma.

Ki Yesù kwambayè ne: Nganyì wàndengì awu? Pààkavilà bònso, Peetèlò ne bàvwàye naabò kwambabò ne, Mulongeshi, musùmbà ewu's mmukukùngwile ne

wùkusàkila, kàdi wêwè wamba ne, Nganyì wândengì awu?

. . . Yesù wàkamba ne: Muntu kampànda mmundengè, bwalu ndi njingulula ne bukolè mbupàtùke mu mèmè.

Nènku pàakamòná mukàjì awu ne kàwva musokòme to, wàkalwa wènda ùzakala, ne wàkudyèla panshì kumpàlà kwèndè, ne wàkamwambila kumpàlà kwà bantu bònsò bwà cinyì wàkamulenga, ne mwàkondopiübàye dyàkamwè.

Ki yéyè kumwambila ne: Mwanàànyì wa bakàjì, kolà mwoyi: diitabuuja dyèbè dyàkwondòpù; ndààku mu ditalala.

Nènku pàvwàye . . . wàkula, mwaba awu kulwakù muntu kampànda ùfùmina kwà mukòkeshi wà nsunàngòngà awu, ùmwambila ne: Mwanèèbè wa bakàjì wàfù; kùtácishi Mulongeshi nànsha.

Kàdi pàakacyùmwà Yesù, wàkamwandamuna, wàmba ne: Kucìnyì nànsha: itàbùùjà nàka, nènku yéyè neàsangajìbwe.

Nènku pàakalwàye kubwela mu nzùbu amu, kààkiitaba bwà muntu nànsha umwe àbwelè to, pa kuumusha Pèetelo, . . . Yakòbò, ne Yònè, ne tatwèndè ne mamwèndè wa mwánà wà bakàjì.

Ne bònsò bàwva bàdila myádi, . . . bànyingalala bwèndè yéyè: kàdi kwambayè ne: Kanùdidi to; kì mmufwè to, kàdi mmulààle tulù.

Ki bóbò kumuseka byà bàmudyombola, bu mùvwàbi ne yéyè ùwva mufwè.

Kàdi yéyè kubàpàtula bònsò pambèlu, ne kumukwàtayè ku cyanza, e kubùkilayè nsongàakàjì awu, wàmba ne: Nsongàakàjì, juukà.

Ki nyumà wèndè kwalukilayè, ne yéyè kjuuka dyàkàmwè: ne yéyè kutùma dìyì bwà kumupèèshabò cyàkudyà.

Ki baledi bèndè kukèmabò, kàdi kubàtùminayè dìyì bwà kabàmbidi muntu nànsha umwe cìvwà cyenzèke aci to.

²³ Mpindyewu túsambilàayi. Taatù wa mu Dyulu munanga, patùdì tubala Dìyì edi apa, tudi bamanye ne aci mbulelèlè. Eci ncyenzèke. Kì mbwalu kampànda bukwàtakaja butùdì bafwànyine kubala pàmwàpa mu cibèjibeji anyì mu mukàndà kampànda wà maalu mafwikakaja to, kadi eci ncifùmìne mu Mukàndà wutùdì bamanyè ne n'Dìyì dyà Nzambì. Tudi twitabuuja ne ncyenzèke. Tudi twitabuuja ne Yesù uvwa mwenzè cintu cyà cikèmesha eci ewu, misangu yìbìdì kaaba aka, cyà

mukàjì uvwa ne mashi àlwa munda awu, ne mwànà mufwè awu, tudì twitabuuja ne Yèyè ùdi Mwànà wa Nzambi, ne Nzambi wàkaMubiisha ku bafwè ne muMulèèje kutùdì, dilòòlò edi, mu mupersonà wà Nyumà Mwîmpè.

24 Ne tudì twitabuuja ne Ùdi neetù kaaba aka dilòòlò edi. Ne biikàle twitabuuja ne Yèyè ùdi umwèumwè awu makèèlèlè, leelù, too ne kashidi, luse Lwèndè lùdi lùya kùdi bantu. Ne pàdì bantu bàMwolwela byanza apu, bipeta bîmwèbîmwè byàkafidiibwà mu ditùkù adi abi nebifidiibwè mu ditùkù edi. Enzàku nàнку cyàkàbìdì, Taatù, bwà twamònakù mwà kupeta dilaabiibwa dipyadiyà. Anu mwàlòmbu Mwanèètù Shakarian ne meeji matòòke ònsò, katanci aka, ne mulòmbè batèèleji bwà kwitabuujaò amu, tudì tulòmba kàbìdì mu Dìnà dyà Yesù Kilistò. Amen.

25 Ndi muswè kwakula ànu bwà katanci kakesè cyanàànà, ne neciikalè bushuwa ànu bwà katanci kakesè cyanàànà, bwalu ndi muswè kufikisha bantu bàdi ne twartà twà disambila abu lwà kùneeku bwà kubàsambidila. Ne mwikàle nteeka cyònsò cikwàbo ku luseka ànu kusambidila kwà babèèdì. Kàdi kumpalà kwà twètù kusambidila babèèdì, bikengela tùfikishè bantu mu lwidì alu. Lwidì kí lùdi misangu yònsò lùtwàla bipeta. Ndwidì lùdi uya naalù kumpalà kwà Nzambi.

26 Muntu mukàjì kampàndà nyèyè ewu mulengè civwàlù Cyèndè, kwondopiibwayè, ku mashi àlwa munda. Disàlaayi dyàkaMutwila matè mwísù ne kuMwasa cifulu cyà mèbà ku mutù, kàdi kàyi mwà kuumvwakù bukolè abu nànsha bùmwè to.

27 Mmùshindù wùdi usèmena. Lwidì lwèbè ndùdi lùkèngela. Ne cyòci aci kí cidiku dilòòlò edi, mulundà wanyì munanga, bìdi bikèngela lwidì. Tudì, ne twitabuuja ne tudì, mu Bwikadi bwà Yesù Kilistò, kàdi lwidì lwèbè ndùdi lùtwàla bipeta. Byamù bilamakaja bìdi apa, ne kí mùdi kàbìdì bukolè bwendeshi. Bu nwènù ànu mwà kubanga cynàànà, Nzambi neènzè bìdi bishààla.

28 Mpindyewu, cyena-bwalu cìndì njinga kwakulapù eci, munda mwà katanci kakesè emu, cidi ne: *Újààdika Dìyì Dyèndè*. Mpindyewu aci's ncintu cinènè, cyà kwela meeji pa bwalu abu ne: *Újààdika Dìyì Dyèndè*.

29 Mpindyewu Nzambi ùdi ne bukolè bwà kujaadika Dìyì Dyèndè, dilòòlò edi, ànu mùkaadiYè mujaadikèjàadike. Ne Bible kàbìdì mmwambè ne: "Nùkenketè bintu byònsò. Nùkwatè bikolè ku cidi cìmpè."

30 Mpindyewu nukàadiku bumvwè, kakùyì mpatà to, bumvwè lusùmwinu lwà kale alu lwà ne: "Úcìjaadikè, nènshiishè kuciitabuuja." Kàdi aci kacýèna cikumbana to. Nkàadikù mumònèmòne bintu bijaadikiibwe misangu ne misangu, byà bwalu bijaadikiibwe bilondèshile maalu à mamanya kabiyi

dyela mpatà to, kàdi nànsha nànkù bantu kabàiyikù babiitabuuja to nànsha bishi.

³¹ Mvwa nyiikilangana ne muntu kampàndà, ànu àbìdì àdì panshì àà. Tuvwa twakula bwà dyondopa dyà kùdì Nzambi. Yèyè ne: “Mémè ncyèna mufwànyinekù kuciitabuuja to. Cidì cìfwànyine kwenzeka nànsha ciikàle cinganyi, nànsha wèwè mwà kucileeja ne bijaadiki búngì munyì, mémè ncyèna ànu ncìitabuuja to.” Èè, cyà bushùwà, cyùdì mufwànyine kwenzela muntu awu nànsha ciikàle cinyì, yèyè’s—yèyè’s mmujimine. Kèna mwà kwitabuujakù to. Kakwèna cintu nànsha cimwè munda mwèndè amu to, bwà kwitabuujayè.

³² Ndi mfùma ku dyenza kaa—kaadilabula kakesè mwab’ewu, kùkaadi bu lumingu lujimà nànkù awu, ànu munùdì bônso bamanyè ne mémè ntu—ntu ngenza bulembi. Nènku pàngálükidì mfùma ku disangisha dyànyì, mvwa muyè kalemba nyama wa ntambwe. Nènku paanyimà pàà mémè mumwangèèle mu Arizona, mbìmpè, ntu muswè kuya kalemba nyama minènè, ne ntu munangè kupàtuka kuya mu bufùkì bwà kubùbandila.

³³ Mpindyewu, mémè ncyèna muyishebeyi to. Ntu ànu nya kulemba. Pa nànkù, ncì—ncìtu muswè kubùtula nyama yà mwitu to, ncyèna—ncyèna ngeela meeji ne mbìmpè to. Ndi ngeela meeji ne cidì ànu mpèkaatù bwà kushipa nyama yà mwitu, paùdì kùyì ne cyà dyenza naayì ne kùyì naayì mudimu mu kiipàcìlà kampàndà to, ànu mùdìbì bifwànyine kwikala bwà kushipa bintu bikwàbò byònsò ebi. Ndi ngeela meeji ne mbìbì. Kabìvwa bikèngela twètù kwenza nànkù to. Nzambi mmutùpèèsheyi bu byàkudyà ne bwà twipàcìla kampànda, kàdi kabìvwa bikèngela twètù kubìbùtula to. Kàdi mpindyewu cidì mikenji yàmba ne nudi mwà kwangata aci, mbìmpè. Kanùcinyangàkàjì ànu cyanàànà to.

³⁴ Nènku mémè kuntwaku, movù awu wùkaadi mujikè bwà bintu bikwàbò byònsò. Ntambwe yìtu yishebeya ngombe búngì cyanàànà. Ne ntu mumanyè beena mudimu batàngidi bàà bimunà mu maafermè mu ditunga emu. Ne musangu wònsò wùdìbò bàsangana bimunà bishebeya, mòna’s, bàdì bàmbiikila, pàdì nyama wa ntambwe mubwelè munkacì mwà mikòòkò. Mulundà wanyì kampàndà, dilòòlò adi, mmujimije ndola mitwè ku binunu bisatù ne nkàmà yìtaanu, mu dilòòlò dimwèpelè, bwà nyama wa ntambwe umwèpelè mushebèye ànu twànà twà mikòòkò pa twòtù. Yèyè kuditwamù, nènku, mu bushùwà bwà bwalu, nebikengelè bwà nyama mikwàbò yà ntambwe yònsò ayi yiyobè bwà mpèkaatù wa yèyè awu. Nènku ki mémè kupeta nyama wa ntambwe awu’s, kàdi ùvwa ntambwe wa katankù’s, wa bule bwà mètres ipacila àsàtù, ne bujitu bwèndè bwipacila cintu cyà kilo lukàmà ne byà munjila, pa nànkù cìvwà—cìvwà ntambwe munènè be.

³⁵ Ki pashiishe mémè kuumuka ku ditungà dyà Arizona, kubwela mu Utah, bwà kulemba nyama. Ne pa nàнку bààkangambila ne kùvwà bantu kuntu aku, ne muntu ùmvwà nya kalemba nendè awu, ùvwà mwedi wa matèyi wa mbùlámàtadi, “Nènku, bwà dinanga dyà Nzambi, kwàkudikù cintu nànsha címwè cyà cìtàngila ntèndeleelu to, pabwipi nendè.” Yèyè ne: “Ùvwà bulelèlè mulùmýàna mukàyàbàle.”

Ki mémè ne, èè, mémè kwambila muntu ùmvwà nya nendè awu, mémè ne: “Ncyàkucitèèlakù to.”

³⁶ Yèyè ne: “Kwàmbikù ne ‘muyiishi’ to. Wèwè mwambè, kwàkupetakù mwà kuya kalemba to. Kààkukwitabilakù to.” Yèyè ne: “Mvwa mulembè nendè matùkù àsàtù, ne mulàale pàmwè nendè bufùkù bwònsò, mudyè nendè ditùkù dyònsò, kàdi kàvwakù nànsha wàmba ne: ‘Mwoyi awu. Wetwàwu! Udi dijinga ne cyàkudyà anyi? Sukulà málòngò.’ Kantu nànsha kamwè!” Yèyè ne: “Mpindyewu kwàmbikù kantu nànsha kamwè pa bwalu abu to.”

Mémè ne: “Ncyàkwàmbakù mwàkù to.” Pa nàнку ncìvwà mumwambile ne ncìvwà mwà kusambila to, kàdi mémè mvwa ànu mutungùnùke ne kumwambila ne ndi. . . Nènku ndi nsambila.

³⁷ Nàнку pàtwakafikà kuntwaku, mwabilaayi awu’s ùvwà wa maalu makolè, nènku ncìvwà ngeelakù meeji ne ùvwà wítabuujakù cintu nànsha címwè to. Nènku ùvwà ùfuma ku dijimija mwànà wa mu dibòkò mu malòlò ndambù kumpalà kwà aci, mwànà mulwè mufwile munda. Pa nàнку, twètù kuya kalemba nyama. Ne pa ditùkù díbiidi, muntu ùmvwà ndemba nendè nyama awu ùvwà mumwambile, mwambè ne ntu nyà kalemba nyama myaba yònsò mu citùpà cyà buloba aci. Nàнку pàvwà cilembi mukwàbò, uvwa nàanyi awu, muumùke, tukààvwà ntantà mule lwà ku nsongo yà mikùnà; kutùvwà anu tulumbatangana ne nyama wa ntambwe, too ne mutwàkamubwejà mu mbwebwe, ne yèyè kuya. Nènku tuvwà basòmbe mwaba awu bindile bwà mbwa àpinganè. Ki muntu ewu kungambilayè, kwamba ne: “Cilembi mukwàbò, mulundà webè awu, ùdi ùngambila ne wèwè ùtu ufika ku diya kalemba myaba yònsò. Udi ne mfrangà yàbúngì?” Yèyè ne: “Ngeela meeji ne aci kí ncintàngile to.”

Ki mémè kwamba ne: “To,” mémè ne: “kí mfrangà yàbúngì to.” Mémè ne: “Bàtu—bàtu bàntùùdila mfrangà.”

Ki yèyè ne: “Kaa, ndi mmòna.” Yèyè ne: “Èè, ngeela meeji kàbìdi ne aci kí ncintàngile to, kàdi,” yèyè ne, “utu ne cyapù cìdi cikutùùdila mfrangà anyi?”

Ùvwà munkaci mwà kucìmpàtwishà ku mishiku. Mémè mvwa mulayè ne ncìvwà mufwanyine kucyàmba to, nwamònu’s. Ki mémè, èyo, mémè kwamba ne: “To, mukalenge. Mémè ntu muyiishi, mpandanjila.”

Yèyè ne: “Cinyi?”

Mémè ne: “Mpandanjila.” Ki kushààlayè mwimàne muntàngile ndambu wa tusunsa.

Mémè ne: “Udikù ne ditèkemena bwà Mwoyi paanyimà pàà mwoyi wà pànù anyi? Dyèbè ditèkemena dyèbè dìdì cinyi?”

Yèyè ne: “Mémè ntu mwena Jack Mormon.”

Ki mémè ne: “Mwena cinyi?”

Yèyè ne: “Mwena Jack Mormon.”

Mémè ne: “Ki wa mùshindù kaayi awu?”

Yèyè ne: “Ewu udi udicìpa ne ùnwa kàfê, ne ùnwa mfwankà.”

Mémè ne: “Èè, ditonda dyà meeji matòòkè dítu dîmpè bwà musùkà’s.”

³⁸ Ki pashiishè kwambayè—kwambayè ne: “Ndi muswè nkukonkèku bwalu.” Yèyè ne: “Mbandondèle ne èkèleeziyà wa beena Mormon ki èkèleeziyà umwèpelè mulelèlà udikù.” Yèyè ne: “Udi witabuuja nàнку anyi?”

³⁹ Mémè ne: “Bwà bìdì bitangila èkèleeziyà, ngeela meeji ne ùdì anu mwîmpè mùdì mikwàbò yònsò eyi amu. Ndi mumanyè Bulelèlà ànu bùmwèpelè, ne bwinè abu n’Yesù Kilistò.” Mémè ne: “Ndi mumanyè ne Yèyè ki udi Mulelèlà.”

⁴⁰ “Èè,” mwàkambàye, “ndi mupetè mwànà mulela dilòlòlò adi, mufwile munda.” Yèyè ne: “Mbangambile ne mwànà mwinè ewu ne, bu mùvwàye mufwile munda, Nzambì kàvwakù mumwelè mupùuyà wà mwoyi to, ne ncyàdyàkumumònakù kàbìdì to.” Yèyè ne: “Udi welakù pèèbè meeji bìshi bwà ciinè aci?”

⁴¹ “Èè,” mémè ne, “Kwakumumòna to wèwè bu mwena Jack Mormon, ncyà bushùwà ne kwakumumòna to. Ki cintu cimwèpelè cyà bushùwà ncyòci aci, kwakumumònakù to paùdì ànu mwena Jack Mormon apu.” Ki kwambayè. . . Èè, yèyè ùvwa ùnsàka’s, nènku ki mémè kumutwà pàànyì cibwa ndambù, nudi numòna’s. Twètù kupeta—kupeta dîbà dyà kutwàngana bibwa’s. Ki yèyè kwamba—yèyè kwamba. . . Mémè ne: “Bwalu bùdì cinyi?”

Yèyè ne: “Kaa, ncyèna mumanyè to.” Ki yèyè ne: “Èè, udikù pèèbè wela meeji bìshi?”

Mémè ne: “Ntu mumanyàngàne ne bààbùngì bàà bîmpè. . .”

⁴² Ncìvwa mumanyè ne yèyè ùvwa mwena Mormon to. Nènku mvwa menemene. . . Ndi mumanyè ne, bu mùdìci ne mmu Utah, mmùvwàbì pàmwàpa, kàdì ndi mémè. . . bwalu bantu bààbùngì bàà muntwamu mbeena Mormon, mu nyùngulukilu mujimà wa Salt Lake City amu. Nànsha nàнку, emu kamùvwa mmu Salt Lake City to. Ki mémè kudyàmbidila ne: “Èè, nkààdikù mupetè balundà bîmpè bàà cyena Mormon, bakààdikù balwè mu milongo yà babèèdì, bantu bîmpè.”

43 Ki mèmè kwamba ne: “Nkààdikù mutwilèt-wilàngàne ne bàmwè bantu bímpè biikàle—biikàle beena Mormon.” Ki yêyè, èè, yêyè ne. . . Mèmè ne: “Ncyèna mumanyè dyàbò dilongesha pa bwalu abu to, nènku ncyèna muswèku kwamba cintu cibèngangana ne dilongesha dyàbò to, bwalu’s ki cyúdi wèwè, ne ndi nnèemeka aci bikolè be.” Ki mèmè ne: “Èè, nènku wèwè udi witabuuja nàнку anyi?”

Yêyè ne: “Èyowà’s, mukalenge, ki cîndi ngiitabuuja. Kàdi,” yêyè ne, “ncîtu ne nsòmbelu waacì to.”

44 Mèmè ne: “Èè, mèmè ndi ngiitabuuja ne Bible ùdi ùlongesha ne Nzambì ùvwa mumanyè mwànà awu, kukàadi millyô yà bidimu, kumpàlà kwà difùkà dyà dyulu ne buloba.” Mèmè ne: “Nzambì wàkambila Yelèmiyà ne: ‘Kumpàla mene kwà wèwè kwimiciibwa mu difù dyà mamwèbè, kumpàlà mene kwà wèwè kupàtuka mu difù, Nkààvwa mukumanyè, mukujidilè, ne mukutèèke mu mudimu bu mupròfetà wa bisàmbà.’” Mèmè ne: “Mùshindù awu ki wùvwà Yè mumanyè mwànà awu, wamònu’s.”

Yêyè ne: “Èè,” yêyè ne, “twasàkidila.”

45 Kubangayè wènda ùpweka kakùnà aku. Ki pashiishè kutwilanganayè ne mulùmyànà mukwàbò ewu, ki kwambayè ne: “Bwà cinyi kùvwa mungambìle ne mwabìlaayi wàwa mmuyiishi?” Nènku ki twètù. . . Kuyiikilayè nendè ndambù ne kubangayè kumulondela maalu à mu masangisha.

46 Mpindyewu, beena Mormon bàtu bìitabuuja bipròfetà. Ncyèna. . . nkufwànyine kubèngakù kwikale umwe wabò kaaba aka, kàdi bôbò—kàdi ncyà bushùwà ne bôbò bàtu bìitabuuja mu—mu bipròfetà. Kàdi, pa nàнку, pàmwàpa ndi ngaakwila mu dipanga, kàdi ndi. . . Èyo. Èyo. Kàdi, nànsha nàнку, bàtu bìitabuuja.

Ki kwambayè, kwalukilayè kùndi, kwambayè ne: “Ndi ngumvwa ne wèwè ewu udi mupròfetà.”

Mèmè ne: “To, mukalenge.” Mèmè ne: “Ndi. . . Mukalenge mmundeejèku ndambù wa bintu bìdi bilwa kwenzeka.”

47 Ki kumba kukàtamukayè, dyàmwè, kwambayè ne: “Tùbwelè.” Ki kubwèlayè mu kàshinyi kèndè, ne kupwekayè ku. . . kaacimenga kèndè kakesè mùvwàye musòmbele amu. Mu tunsunsa tukesè, kujìminayè. Tuvwa munkacì mwà kulongolola mbwa, bwà kuya kalemba kàbìdi dyàkamwè paanyimà pàà didyà dyà mundaamuunya. Ne patùvwà twenza nàнку apu, mona’s, kutukayè ne kàshinyi è kuyayè.

48 Mu katancì kakesè emu, ki nsongàalùmè wa mmwènekèlu mulenga kwalukilayè, wa bidimu bitwè ku dikùmì ne mwandamutèkète, nsongàalume mwena Kilistò mulelèlè wa mmwènekèlu wa cijila. Yêyè ne: “Ewu mmwanèètù wa balùme.” Yêyè ne: “Yêyè kí mmwena Jack Mormon to. Mmwena Mormon wa menemene.”

Mémè ne: “Wetwàwu, mwanàanyi wa balùme!”

Ki yèyè ne: “Ngǔmvù, mùdì mwanèètù mundondèle, ne wèwè udi mupròfetà.”

Mémè ne: “To, mukalenge.” Mémè ne: “Ki nne ndi mupròfetà to.” Mémè ne: “Mukalenge mmundeejè bintu bìdì bilwa kwenzeka.”

⁴⁹ Yèyè ne: “Mbantwè lushingì mu dibòkò mpindyewu mene, ndi ne cyà kwikala ku mèèsà à dipandiibwa.” Yèyè ne: “Kàdi mwanèètù kungambilayè cyòcì eci. Ki mémè kwamba ne: ‘Pìikalàbì nàнку, kabyèna binkèngela dipandiibwa adi to.’” Kuntàngilayè buludì mu mèsù, lutàngilu lwà kweyemena, lulelèlè, lwà meeji matòkè, yèyè ne: “Ntentèkèle byanza. Pìikalà maalu àà nàнку, kabyàkunkèngela dipandiibwa to.” Kwalukilaye kumbèlu musàngàle.

⁵⁰ Mwanèètù wa balùme ewu, mulundà wanyì mwena Kilistò ewu, ùvwa wèza naanyi bulembi, wa ku Phoenix. Kungambilayè, kwamba ne. . . Yimwè yà ku nsongàalùme eyi mmisòmbe mwab’ewu mene mpindyewu. Umwe wa kùdìbo ndi mumanyè ne ùdì kaaba aka. Twètù kwalukila pambèlu. Yèyè ne: “Mwanèètù Branham, bu Mukalenge mwà kukulèejakù cìkèènà-kumònà ne kwenzakù bwà wàmбилè beena Mormon abu ànu cìikalà mwà kwenzeka, aci’s neczyènzè bwalu, bwalu ki cìdìbo bindìle.”

⁵¹ Pa nàнку, mémè kusambila byà byangàtàngàne. Kàdi mu dyalukila dyànyi dyà pambèlu, ngenda mbànda, mu dimwè dyàkalondà, dyàlumingu adi, bu pa dìbà dikùmi nàнку, Mwva mwimàne mu cibambalu, paanyimà pàà disangisha mu dindà adi, mvwa mutàngile pambèlu.

⁵² Ki mémè kumòna myèndù yà toolòshi yipenya, anyì bukènkè bwà mùshindù kampàndà bùpenya. Ki mémè kumòna nyama wa ntambwe uvwa kuulu kwà mucì, kàdi—kàdi uvwa mukesè be bwà mémè kumwasa cingoma. Ncivwa mumuswè to. Kàdi ki muntu mukwàbò kumwasayè, nènku, pààkamwasàye, wàkamwasa ne cingoma cipitèpìte bunène. Kusùnsulaci ntambwe awu. Ncyàkaanyisha mù—mù—mùshindù wàkenjiibwàci awu to.

⁵³ Pàngààkafikà ku Phoenix, mémè kulondela Mwanèètù Dawson bwalu abu, ne Mwanèètù Mosley. Ndi mumanyè ne yèyè udi kaaba aka. Mwva mumumòne ditùkù adi, apa mwaba kampàndà. Nènku ùvwa ùya mubànde pàmwè naanyi, yèyè ne mukàjèndè. Ki mémè ne: “Nùtangilè nùmonè, cidi ng’EMU MMÜDÌ MUKALENGE WÀMBA. Neczyènzekè mùshindù awu.”

⁵⁴ Twètù kwindila mafùkù, mafùkù ànaayi anyì àtaanu, atùvwa benzè bulembi, anyì matùkù. Nku mpùùkàpùùkà kùdìku mwà kupeta nyama wa ntambwe kuulu kwà mucì bufùkù. Kwenzekabi ne, mu dyalukila dyà kumbèlu, kulekelelabò mbwà, cilembi ewu’s, nsongàalùme mwena Mormon ewu. Ki nta—ntambwe kulondayè mupwà, to, mbwa kulondayè mupwa wà

ntambwe's wè, kumunyeemesha è kubàndayè kuulu kwà mucì. Nènku pa dībā dikùmi wa bufùkù bōbō kulwa, kutujuulabō mu bulàalu. Twētù kupàtuka kuya kuntwaku, ki ntambwe umwèumwè awu uvwa kuulu kwà mucì wàwa. Ùpenyesha bukènkè, Mwanèètù Mosley kumwasayè ne kàlibrè kàà makùmi ànaayi ne inaayi, mwambè kutaayisha ntambwe awu mu bitùpà bibìdì. Nènku's ki cyōci aci, ànu menemene mùvwàci cyambiibwe.

Ditùkù dyàkalondà, mèmè kutwilangana ne mfùmù wa bakùbì bàà nyama yà diitu wa province awu, mwena Jack Mormon mukwàbò's. Mèmè kwangata nsongàalùmè ayi pàmwè, kuyilombola kuyàaluja kùdì Kilistò.

Ndi nzwàmìla ne, Yèyè ùdì umwèumwè awu makèèlèlè, leelù, too ne kashidi. Nzambì ùtu ùjaadika ne Dìyì Dyèndè dìdì nàнку.

Nukààdikù bumvwè bantu bàmba ne: “Kumòna ki kwitabuuja.” Aci kacýèna ànu cyònsò cilelèlè to. Bantu bààbùngì bàtu bàmòna kàdì kabàyi bìitabuuja to.

⁵⁵ Matùkù àvwà Yesù pa buloba awu, bwà cinyì kabààkaMujingulula ne, Yèyè nguvwa Dìyì dyà Nzambì adi dimwènèshùbwe? Bwà cinyì bantu kabààkajingululakù ne Mòsà wàkamba ne: “Mukalenge Nzambì wèbè neàjuulè mupròfetà mufwànàngàne naanyi”? Ne Yèyè wàkuuja Dìyì dyònsò dyàkambà Bible ne Neènzè, kàdì bōbō kabààkaciitabuuja to.

⁵⁶ Kàdì Nzambì, mu cikondo ne cikondo cyònsò, ùtu mujaadikèjààdike ne Dìyì Dyèndè ndilelèlè. Ùtu misangu yònsò ànu ùjaadika Dìyì Dyèndè. Pashùshè míngà misangu bàtu bàmba, ne: “Kumòna ki kwitabuuja.” Kabyèna nàнку to. Kàdì twētù tudi bamanyè ne Nzambì ùdì ùtùngunuka ànu ne kujaadika Dìyì Dyèndè mu cikondo ne cikondo cyònsò.

⁵⁷ Tudi bamanyè ne Yèyè wàkacijaadikila Adàmà ne Evà, pàakambaYè ne: “Ditùkù dinwàkùdyà, ditùkù adi ndinwàfwà bulelèlè.” Bìkèngela twitabè cyōci aci ne, mbulelèlè. Tudi twitabuuja aci, bwalu Yèyè mmutùjaadikileci, ne tudi bamanyè ne cidi bulelèlè.

⁵⁸ Mpindyewu netwàngatè ànu myaba kampàndà yàkajaadikà Nzambì Dìyì Dyèndè. Twàngatàayibi, cileejilu, mu matùkù à—à Noà. Nzambì wàkambila Noà mukenji wùvwà bulelèlè wùbèngangana ne maalu à mamanya ne kawùyìkù mwà kwitabuujiibwa to. Muntu nànsha umwe kàvwakù mufwànyìne kwikala muwitàbùùje to. Kacya mvùla kàvwakù mwanjì kulòka pa buloba to. Kabikùyi bìpetangana ne maalu à mamanya to!

⁵⁹ Pàmwàpa bàvwa cikondo cyà citàmbe bunènè cyà maalu à mamanya musangu awu kutàmba mutùdì mpindyewu emu, bwalu bàvwa biibàkà bipaapu byà misàkà ne mpìngù yà ntambwe yà mitù yà bantu, ne bikwàbò, mu miinè matùkù awu, bitùdì twētù katùyi mwà kwibakakù mpindyewu to. Bàvwa

biibidilàngàne ne bukolè kampànda, bukolè bwà mùshindù kampànda bwà byamù, pàmwàpa bwà tupwishipwishi anyi cintu kampànda, mu mùshindù wà ne bàvwa mwà kwambula mabwe manènaanènàalè awu, bitùdi twètù katùyikù bafwànyine kwenza leelù ewu to. Kàdi bàvwa bènza bintu binènè byà maalu à mamanya. Bàvwa ne cintu kampànda cìvwàbo mwà kwela mubidi wà citàlù kawùyi mwà kubola to, bwà kuwùpa mmwènekèlu wà mu bufùki munda mwà nkàmà yà bidimu. Tweètù tudi bajimije ngenzèlù awu.

⁶⁰ Yesù wàkamba ne: “Ànu mwàkadìbi mu matùkù à Noà amu, ki mwikalàbi kàbìdi ku dilwa dyà Mwànà wa muntu.” Ne tudi bamanyè ne bìdi bikèngela bwà twètù kubwela mu cikondo cikwàbò cinènè cyà maalu à mamanya.

⁶¹ Nènku mpindyewu mukenji wùvwà nààwù Noà wùvwà wùbèngangana bikolè ne diitabuujà dyà ditùkù adi, mu èkèleeziyà, ne ùvwa kàbìdi ùbèngàngàne bikolè menemene ne bukebikèbi bwà maalu à mamanya. Kàdi Nzambi wàkajaadika Dìyi Dyèndè ne didi bulelèlè. Nzambi wàkajaadika ne cyàkambà mupròfètà awu aci cìvwa bulelèlè.

⁶² Netwàngatè mukwàbò kàbìdi bwà katancì kakesè cyanàànà. Abraham ùvwa mukwàbò mupròfètà wa Mukalenge, uvwa Dìyi dilwè kùdiye. Ne wàkamwambila, pàvwàye ne bidimu makùmi mwandamutekètè ne bitaanu apu, eku Sarah ne bidimu makùmi àsambòmbò ne bitaanu, ne ùvwa ne cyà kupetela mwànà kùdi Sarah. Mpindyewu, aci's cìvwa cikùminà cyèbè cyà menemene kùdi mwena bupidyà. Nudikù mwà kudifwànyikijila, leelù ewu, cintu bu nànkù cyènzèka mene mu ditùkù edi, ne byenzedi byètù byònsò byà bulòbò byà maalu à mamanya bitùdi bakùmbàje ebi, ne byònsò byà bânà baleleshila mu byamù bàdìbo bamba abu, ne bikwàbò? Kàdi mukàji mukùlākàji ewu, mpindyewu ne bidimu makùmi àsambòmbò ne bitaanu, ne mulùme mukùlākàji wa bidimu makùmi mwandamutekètè ne bitaanu, kàdi Dìyi dyà Mukalenge dyàkalwa kùdi Abraham òmwambila ne eci necyènzèkè. Ne Abraham wàkiitabuujà Nzambi. Mpindyewu, nànsha Nzambi mwakùle bishi, ne nànsha cyòci cilelèlè cyà bishi, byàkàkèngela bwà Abraham kwitabuujayè cìvwà Nzambi mwambè aci, bwà kwenzekaci nànkù. Mpindyewu tàngilààyaaku mwàkeediibwà muntu awu ku diteeta, ne bujaadiki bwèndè bwà ne, yèyè wàkiitabuujà.

⁶³ Muntu umwèumwè wàkenza dijikula adi ne, wàkiitabuujà Nzambi awu, s' mmuntu ànu mùdi wèwè, wèwè udi musòmbe kaaba aka dilòòlò edi ewu. Twètù tucidi ànu twitabuujà Nzambi. Bikèngela twitabuujè ne Dìyi Dyèndè ki Bulelèlè. Ne Yèyè ngwacijaadika ne, Didi Bulelèlè, bu twètù ànu mwà kuciitabuujà.

⁶⁴ Mpindyewu tàngilààyi cipùmbishi cyàkapètà Abraham. Cintu cyà kumpalà cìvwa mbidimu byèndè, ne bidimu makùmi

mwandamutekètè ne bitaanu, ne Sarah mwikàle ne bidimu makùmi àsambòmbò ne bitaanu. Ûkaavwa mupite kale cikondo cyà dishintuluka dyà mwoyi, cyà kàciyi ùya kàbìdi ku mashi aci. Kakùyi mpatà to cìkaavwa ciimàne, kùkaavwa bidimu byàbùngì kumpàlà. Yèyè ùkaavwa mushààle nendè bu mukàjèndè. Ûvwa mmwakùnyèndè mukwàtatwèndè, pàmwàpa mumwangàte pàcìvwàye ànu ne bidimu dikùmi ne byà mu njila, ne mumusèle. Kàdi kàvwa mupetè bânà to. Mukàjì awu kakùyi mpatà to ùvwà nkumba. Nènku mpindyewu tudi tusàngana ne, bwà kwenza cyòci eci, byàkakèngela bwà àtapulukè ne bantu bònsò bàvwa kabàyi bacítàbùùje abu to, bwà kucifikisha ku dyenzeka.

⁶⁵ Ncyèna njinga kwamba ne bìdi bikèngela bwà ùtapulukè ne bantu to. Kàdi bìdi bikèngela bwà wèwè kutàpuluka ne dijaanangana dyònsò dyà bupidyà, ne kushààla kule ne byà nàнку. Pàdi bantu bàmba ne: “Kya, abi bintu kabìtu byènzeka to! Awu mmusùmbà wa bantu bàà katombòtombò! Kakùtukù cintu cyà bwena aci cyènzeka to,” jika wèwè ànu maci ùkebè kwà kuya ùye. Kùtèyikù ntèmà ku byòbi to.

⁶⁶ Bible mmwambè ne “Abraham kààkatènkakanakù ku mulayi wà Nzambì, ku bupidyà to; kadi ùvwa ne dikàndà, mwikàle ùpa Nzambì butùmbi.” Dìna dyèndè dyàkashintuludiibwa kuumuka ku Abram kulwadi Abraham, dishintuluka dyà dìna dyàkavwija dìna dyèndè, “taatù wa matùnga.” Nudikù mwà kudifwànyikijila muntu musòmbe ne mukàjèndè, munanga wèndè, ùvwayè musòmbe nendè mpindyewu mu bidimu byònsò ebi awu, ne mpindyewu mu bidimu byà ku makùmi mwandamukùlù, ne mukajèndè ne bidimu makùmi mwandamutekètè, ne mucìkàle kàyi ne mwànà nànsha umwe anyi ditèkemena dyà mwànà to, kadi nànsha nàнку wàmba mùvwàye “taatù wa matùnga.” Nudikù mwà kudifwànyikijila didyula dyà kùdi bakwèndè bàvwà bàpita abu bafwànyine kwamba ne: “Taatu wa matùnga, mpindyewu bânà biinè baùkaadi naabò pa dìbà edi bàkaadi bùngì kaayi?” Ki didyula dyònsò divwà dikèngela bwà kupicilayeku ndyòdi adi’s!

⁶⁷ Kàdi Abraham kààkatènkakanakù mwaba nànsha wùmwè, ku bupidyà to. Ûvwa mwitàbùùje ne Nzambì ùvwa ne bukolè bwà kwenza ciwvàyè mulayè aci, ne Nzambì ùvwa mwà kujaadika Dìyi Dyèndè, nànsha byòbi byangàte ntantà bule kaayi. Kàdi pamutù pàa kwenda kuteketa dìbà dyònsò, mutùdi twètù tutàmba kwenza amu, yèyè wàkatàmba kukolakana dìbà dyònsò. “Cyòci kaciyi cyènzèke leelù, màalabà neciikalè cishimà citàmbe bunène, bwalu cyàkolù ne ditùkù dijima.” Ûvwa n’Nzambì, ùvwa n’Nzambì munda mwà Abraham, bwalu yèyè ùvwa mumanyè ne Nzambì ùvwa ùjaadika Mèyi Èndè ònsò ne àvwa nàнку.

Bu bâna Bèndè ànu mwà kwangata Dìyì Dyèndè, bwà Wàmòna mwà kuDijaadikila kùdi wèwè aku! Ki mùshindù wùmwèpelè wùdiYekù mwà kujaadika Dìyì Dyèndè awu's.

Yèyè katù uDijaadikila beena bupidyà to. Bòbò kabèèna mwà kubàjaadikila to; bòbò mbeena bupidyà. Kàdi, ki nCitùmina beena bupidyà to. KaCyèna bwà beena bupidyà to.

⁶⁸ Cidi bwà ewu udi witabuujà. Ne bu Yèyè mwà kupetakù kampàndà wíkala mwà kwitabuujà Dìyì Dyèndè, Yèyè's neàjaadikilè Dìyì Dyèndè kùdi. Ne míngà misangu màsaamà ne bikwàbò bitu bitùfikila mùshindù awu, bwà Nzambi wàmónaku mwà kudijaadika Yèyè mwinè.

Nudikù nuvùluka mpofo wàkasangana Yesù awu anyi? Bàakamba ne: “Udi mwenzè mpèkaatù nganyì, n'yèyè anyi, peeshi ntatwèndè, anyi mmamwèndè?”

⁶⁹ KwambaYè ne: “Mu ebu bwalu, nànsha umwe, kàdi mbwà byenzi byà Nzambi bimanyishiibwè.” Nwamònu's, byàkenzekela mwànà wa balùme ewu bwà Yesù wàmòna mwà kutùmbishiibwa. Míngà misangu bubèedi kabùtu mulawu to, bùtu dibènesha, bwà twamòna mwà kuzànjika diitabuujà dyètù ne kubìikila bintu bìdi kabìyikù abi, bu ne bìdikù. Nzambi ngudi mwambè nànkù, ne Yèyè neàjaadikè ne bìdi nànkù bu wèwè kùyi ànu mutekèshìibwe kùdi diteèta adi.

⁷⁰ Úvwa mwà kujaadikila Yobò, musangu awu ne, kàvwa mufwànyine kuMwela mulawu muMutàngile mu mpàla nànsha. Tàngilàayi diteeciibwa dyàkapìcilà Yobò adi. Kàdi mu mbàngà yà lufù mene, nànsha nànkù kwambayè ne: “Mukalenge ngwàkafila, Mukalenge ngwangàci, Dìna dyà Mukalenge dibèneshiibwè!” Ncyà bushùwà ne yèyè wàkacìitabuujà. Nzambi wàkajaadikila Yobò Dìyì Dyèndè. Wàkacìjaadikila Abraham. Wàkacìjaadika nànkù.

⁷¹ Yèyè wàkacìjaadikila kàbìdi Mòsà. Nènku Mòsà, pàakatàmbà lutàtù kumulwisha, Mòsà úvwa nààci mu meeji ne, pàmwàpa, bwà kwikala musùngidi, ne pàmwàpa mamwèndè úvwa mumulondèle ne yèyè úvwa mulediibwe mwànà wa pabwèndè. Yèyè—yèyè úvwa ndeeji wèndè wàkamukoleshila mu nzùbù wa bukalenge wa Pàlò awu, kakùyi mpatà to úvwa mumwambile ne: “Mwànàanyi, tùvwa basambile bwà twamòna mwà kusùngidiibwa, nènku tudi twitabuujà ne wèwè ki mwànà úvwa Nzambi ne cyà kukwàta nèndè mudimu bwà kusùngila.” Ki pashiishè pàvwàye. . .

⁷² Nwamònu's, wàkakola ne byàkakèngela bwà kwikalayè mwànà wa—wa mwànà wa bakàji wa Pàlò, ne tudi tusangana ne yèyè nguvwa ne cyà kwikala mupyànyi wa nkwasà wa butùmbi. Mòna's, kakùyi mpatà to cìvwa mu meeji àbò dìbà adi ne, yèyè nguvwa mwà kushààla Pàlò úvwa ulonda awu, “Nènku mùshindù awu ki wùvwàye mwà kusùngila cisàmbà, mu kwikala Pàlò úvwa ulonda.” Kàdi Nzambi úvwa ne. . . Bu ne

bìwwa nàнку, nùнку yéyè's mmucyènzèle ku cyamù kampàndà cyà mudimu, mu cye—cye—cyenzi cyà cididi. Kàdi Nzambi kàtu ànu ùkwàta mudimu nàнку misangu yònsò to.

⁷³ Nzambi ùtu ne Yèndè mihindù sungasunga bwà kwenza mudimu, ne Wàkamba ne Yéyè nguvwa mwà “kubàpàtula.” Wàkambila Abraham ne: “Paanyimà pàà bidimu nkàmà yinaayi,” Yéyè ùvwa mwà “kubàpàtula, ne cyanza cyà bukolè,” Ùvwa mwà “kuleeja bimanyinu ne maalu à kukèma.” Pa nàнку kàvwa mwà kucyènzà mùshindù awu to, pa nàнку Abra- . . . Tudi tujandula ne Abraham wàkiitabuuja Nzambi, kàdi ki Mòsà nyéyè ewu mpindyewu wìtabuuja Nzambi.

⁷⁴ Nèнку Mòsà wàkatàngidila pambèlu ku dìdidiishi dimwèdimwè kwàkatàngidilà Pàlò aku, kumònaye cisàmbà cimwècimwè aci. Cyàkabàtàngila Pàlò pambèlu apu, bu ne: “Cisàmbà cyediibwè mulawu, cisàmbà cìvwà ànu musùmbà wa dikolesha dyà maalu, bu wabù Nzambi, ne Nzambi kampàndà wa mu cipèelà mu mwaba kampàndà uvwabò kabàyi bamanyè mu kantu nànsha kàmwè to; dikunji kampàndà dyà kadiyi dimwèneka dìvwàbo basambila, kùvwà kakùyi bwà nsongo to. Mmusùmbà wà bakoleshi bàà maalu. Ne bàvwà musùmbà wà bapika. Ne mùvwà Nzambi wàbo mubàlekèle biikàle bapika, cìvwà cijaadika ne Yéyè kàvwa Nzambi to.”

⁷⁵ Kàdi ànu munkaci mene mwà byònsò abi, Yéyè ùvwa munkaci mwà kujuula muntu mwena diina. Nzambi ùtu wènza maalu mu mihindù yà pabwàyi, ànu mu mikòlù yàbò mene. Kàyi mwena tèlòlòji, kàyi mulongeshi, kàyi mwakwidi, kàyi nànsha umwe wa ku bantu bààbò bàà cijila abu to; kàdi ànu muntu wetù wa pàtupù ewu, mulela bwà mudimu awu. Ki Nzambi kumubiikila bwà kwikalayè mupròfeta Wendè, ne kumutùma kuntwaku. Ne kàyi cintu nànsha cimwè mu cyanza to ànu dikombo dikònyàngàle, bwà kakùngamangana ne cilwilu kampàndà, misùmbà yà bantu badyènzè cimùkù yìvwà micimùnè buloba bujimà ayi. Kàdi ne dikombo adi mu cyanza, mwàkamwambilà Nzambi bwà kukwàtayè dikombo adi mu cyanza ne yéyè nguvwa mwà kusùngila Izàlèlèlè, ki kupwekayè ne kucyènzà bwalu Nzambi nguvwa mucilaye. Neàcyènzè munyi? “Mèmè nèngiikalè neebè.”

Kwambayè ne: “Ndèjèku butùmbi Bwèbè, Mukalenge. Mèmè ndi ne lujòòkò mu dyakula. Ncyèna mwà kwakula bimpè to. Ne ndi . . .” Ùvwa ne tubingila mùlìyò mujimà.

⁷⁶ Kadi Yéyè ne: “Mèmè nèngiikalè neebè.” Nèнку ki cyònsò cyàkakèngediibwà ncyòci aci. Wàkaya, mwangàte Díyi dyà Nzambi. Nànsha mùvwà mudimu awu wùmwèka wà njìwù amu, Mòsà wàkatàngunuka ànu ne kwitabuuja Nzambi. Ne Nzambi wàkajaadikila Díyi Dyèndè, kùdi Mòsà ne, mbulelèlè. Bwalu,

nànsha bìvwà byènzekà abi biikàle binganyi, Mòsà wàkashààla anu ne Dìyì. Mu cikondo cyà lwendu. . .

⁷⁷ Nzambi wàkabàmbila, mu Ejiipitù mwàmwa, kàbìdi, bwà ne Yèyè ùvwa ne cyà kubàsùngila, “kubàbweja mu buloba bulaya, buloba bwîmpè, bùle tètè ne mabèèle ne bwìci.” Ne kakùyi mpatà to bùvwakù. Kabàvwa bamanyè ne bùvwakù to, kàdi Wàkamba ne: “Budikù, ne Mèmè Ngánùpèèshibù. Bùkàadi bwènù, ndàayi ànu cyanààna nùkabùnanè!”

⁷⁸ Nènku mu cipèèlà, pààkapàtukà bààbùngì bàà kùdùbo, bàja maja mu Nyumà, pàvwa Mìliyàmà ùtuuta ngoma; biikàle bàdya manà à mu Dyulu; bàtèèleja Mòsà wimba misambu mu Nyumà; bàtàngila bishimà ne bimanyinu bìpàtuka. Kàdi pààkafikàbi ku diteetangana dyà makàndà, bwà kwitabuuja Dìyì dyà Nzambi mu kaabujimà, mulayi wònsò awu, bòbò bààkapangila.

Ànu bàbìdi bàà kùdìbo mbààkawitabuuja, bàvwa n’Yoshùwà ne Kaalèbà. Bòbò bààkaalukila ne cileejì cyà ne buloba abu bùvwa bwîmpè.

⁷⁹ Kàdi, maalu àvwà ènzekà awu, ówò awu ki àkabàpangishà. Bwalu, bààkamba ne: “Katwèna bakùmbàne bwà kukwàta buloba abu to, bwalu bimenga byàbò mbyela mu bimanu, baaminyàmpalà bààbò—bààbò—bààbo abu kuntwaku. Kì mbaaminyàmpalà bààbò to, kàdi bantu bààbò—bààbò mbanènè bàà mfyondo. Mòna’s, twètù tudi tumwèka bu tupasu, ku luseke lwàbò aku.”

⁸⁰ Yoshùwà ne Kaalèbà kwambabò ne: “Twètù tudi batàmbe bukolè bwà kubùkwàta.” Bwà cinyi? Nzambi nguvwa mubàpèèshebù, nànsha bantu bàà mfyondo abu biikàle banènè bàà bishi. Cipùmbishi aci kacìvwakù ne cìvwaci cùmzwija bwàbò bòbò to. Nzambi nguvwa mwambè nànkù! Ne Nzambi wàkacìjaadikila kùdìbo. Nènku bààkasabuka cyà bushùwà ne kukwàta buloba abu, mùvwà Nzambi mwambè ne nebàbùkwàtè amu. Yèyè wàkabàjaadikilaci.

⁸¹ Mpindyewu, pààkafikàbo mu ngondo mwinâyì, pàvwa màyi àpweka àfùmina ku mikùnà, pa mishiki yà nējè apu, ne bikwàbò, ne kumwèkabi bu ne Nzambi uvwà kalààlà kàà màsàlaayi kabi’s, bwà kulombwela cilwilu Cyèndè buludi ne ku mwaba kampànda, kùvwàYe mukabàcìncimikile kule ne buloba bulaya. Ne ànu dībà diinè dyàkabàsabwìshàYè, dìvwàYè muswè bwà kubàsabwìsha adì’s, s’cìvwà nngondo mutàmbe bubì wa mu cidimu. Ngondo uvwa Yadènè nùle mupita ne myeelelu, màyi matangàlàke ne mu mpàta mwònsò. Mòna’s, bu ne bàvwakù ne cyà kubàsabwìsha, s’bìvwakù bifwànyine kwikala mu muvù wa luuyà, mùvwàbo mwà kusabuka bèndela mu màyi bitekètèbitekètè. Kàdi Yèyè wàkindila too ne pààkuulà màyi kulwawù à ndondo mule. Yèyè ùtu munangè kuleeja ne Ùdi Nzambi. Ùtu munangè kujaadika Dìyì Dyèndè, nànsha byà munyi.

82 Kùcyùku to nànsha ngàngàbukà mwambè ne: “Udi upùnga ne lufù bwà kànsèrè.” Aci ki cyònsò cidiyèku pèndè mumanyè. Pàmwäpa mâyi àdi à ndondo mule bwà bàmwè bàà kunùdi, dilòòlò edi. Kàdi, vùlukà ne, Nzambì ngudi mwenzè mulayi. Nzambì ùtu ùshààla mukwàte ku Díyi Dyèndè, ne Nzambì ùtu ùjaadika Díyi Dyèndè. Dyòdi didi Bulelèlà.

83 Wàkindila too ne pààkalwà mâyi awu ne bitoci, too ne mwàkalèèpawù kwondoka kupita ne mitù yàbò, ne bikwàbò, ne pashiishè Yèyè kukàngula njila. Wàkaya kumpàlà kwàbò ne kukàngula njila.

84 Mmunyi mwàbwelàbo, mu Yelèkò amu, pàvwàmu mukànga mwònsò? Yoshùwà ùvwa ùdikonka. Ùvwa mumanyè ne Nzambì ngukààvwa mumulombòle too ne mwaba awu, cidya civwà cìlonà civwà ncyà Nzambì.

85 Dìngà ditùkù, pàvwàye wènda wèndakana, ùbandila bimanu abi, kumònayè Muntu mwimàne ne mwelè Wèndè wà mvità mupàtula mu cimànga. Ki kupàtulayè wèndè pèndè mwelè wà mvità mu cimànga ne kuyayè bwà katwilangana ne Muntu awu, kwambayè ne: “Wèwè udi bwà nganyi? Udi bwètù twètù anyi Udi bwà mulwishi wetù?”

86 Yèyè ne: “Mémè ki Kàpíteenà kàà bilwilu byà Mukalenge.” Ki kumwambila Yè cyà dyenza. Mmunyi mwèlaye mpungi ne lumbu kuupukalu, lwinè alu bafwànyine kunyeemeshilapù matempu à mbilu yà dipiiyangana? Ndipetangana kaayi òvwàku difwànyine kwikalà ne mpungi?

87 Nzambì ùtu ùkwàta mudimu ne ngenzèlù mipwekèle yà nàнку. Bidi nàнку, bupwekèlè bwàci, ki bùdi bwènzà ne cìikalè Nzambì bwànyì mémè. Twètù tutu misangu yònsò ànu tuteeta bwà kupeta cintu kampàndà cyà cinène, cìikalà mwà kwenza cintu kampànda, kàdi Nzambì. . . bulongolodi kampàndà bunènè nebwàngatè cintu cyònsò aci mu kaabujimà ne kucitòòkeshà cyònsò tòò. Pààbi’s, Nzambì ùtu wàngata muntu umupwekèle, ànu muntu umwèpelè udi Yè mwà kukwàta mu byanza Byèndè, ne Yèyè neàjaadikè Díyi dyònsò dyàkambàYe, ku Dyòdi adi. Wàngata ngenzèlù mipwekèlè yà nàнку awu ayi’s!

88 “Elà mpungi.” Kabiyi ne tùbulà disòsò mu cimano to, kàdi: “Elà ànu mpungi cyanààna, ne bimanu abi nebyùpukè. Mwadi mukolè wà mpungi awu newùbyankulè bimanu abi panshi.” Mùshindù mwinè wùdibi bikùtàkàne bwà meeji à musunya’s wè! Kàdi Nzambì wàkajaadika ne Díyi Dyèndè òvwà dilelèlà, bwalu bimanu abi byàkuupuka, byambàtàngàne. Kubàndabò buludi ne kukwàtabò cimenga aci.

89 Kaa, Nzambì ùtu munangè bwà kujaadika Yèyè mwinè ne n’Nzambì! Yoshùwà ùvwa mumanyè aci. Dìngà ditùkù, ne pàvwàye mwimàne mwab’awu apu, cimwè cyà ku bidikà byà bitàmbe bunènè bikaadiku byenzekè, pa kuumusha lufù, dijiikiilbwa, ne dibiikà dyà ku lufù dyà Yesù Kilistò. Pàdi

mwena lukunà . . . Ûvwa mubàyiishè bimpàmbàmba, ne bilwilu bishiilleshiiilàngàne bivwa ku mikunà aku. Ûkaavwa mumanè kubàyiisha bimpàmbàmba, ne díbà dikaavwa dyàmba kubwela. Kaa, ekèlekèle, civwa ncikondo kaayi bwà Kalàlà kàà masàlaayi Yoshùwà awù's wè!

⁹⁰ Vùlukàayi ne, yèyè wàkalwangana ne ditunga adi too ne ku ndekeelu, kàyi ne lùpitaadi, anyi mungàngà, nànsha musumbà wà benji bàà dyondopa dyà lùkàsàlukàsà, anyi ne muntu mutàpika mputa to. Ngambilaanyaayàaku cintu cidiku mwà kutàmba aci. Èyowà's, mukalenge. Kàvwakù nànsha ne mpitaadi, nànsha baamingàngà to, kàdi kaàkajimija muntu nànsha umwe to, bu mùvwàbò ànu bèndela mu diswa ne Dìyì dyà Mukalenge. Nzambi wàkajaadika ne Yèyè ùvwa naabò. Ncyà bushùwà. Mònaayaaku mpindyewu.

⁹¹ Ne tudi tusangana ne Yoshùwà ùvwa mumanyè ne, bufùkù bòbò ànu bwilè, bàvwa bafwànyine kudifinda eku ne eku ne kutwilanganabò muntu ne mukwèndè, ne—ne kudisangabò ne kwenza cilwilu cinènè, ne yèyè mufwànyine kupeta naabò lutàtù lukolè ditùkù dyà pàvwàbu bùcya. Kàvwa mumanyè cyà dyanza to, ki kutàngilayè muulu kùdi Nzambi. Ûvwa dìjinga ne dikwàcisha, ne ùvwa ujinga bwà díbà kushààladi diimàne tэндé. Ki kutùminayè ànu díbà dìyì bwà kushààladi kacya diimana tэндé, ne . . . kwambilayè “ngondo bwà kushààlayè mulembèlèle pa Ayàlònà,” ne kàtentemuku to too ne pàvwàye mwà kumutùmina dìyì. Ki ngondo ne díbà kushààlabi biimàne tэндé munda mwà mèbà makùmi àbidì ne ànaayi, pàvwà Yoshuwa ùlwangana mvità apu, too ne pàakacimunàye mwena lukunà awu, bwalu ùvwa ànu mu njila wa mudimu. Ûvwa ne bukenji bwà kucyènzà, bwalu ùvwa munkaci mwà kutùmikila mèyì matùma à Nzambi.

⁹² Ne wèwè paùdi ànu mu njila wa mudimu, mulamè Dìyì dyà Nzambi, wenza ànu cidiYe mukwambile bwà kwenza aci, wènda bilondèshile mèyì matùma à Nzambi, wèwè udi ne bukenji bwà kwambila mukunà awu ne: “Tentèmùka!”

⁹³ Nzambi ùtu ùshààla mukwàte ku Dìyì Dyèndè. “Wèwè mwambile mukunà ewu ne: ‘Tentèmùka,’ kùyi wela mpatà mu mwoyi wèbè to, kàdi witabuujà ne ciwàmbi aci necyènzekè, udi mwà kupeta cyòci ciwàmbi aci.” Yesù ngwákamba aci, mu Maakò Munsantu 11:22. Ki Bulelèlè mbwòbò abu. Ndi mumanyè ne aci m'Bulelèlè. N'Dìyì dyà Nzambi, ne cidi cijaadika ne m'Bulelèlè. Tutu ànu tuumvwa bwòwà mînga misangu. Tutu tufika mu mùshindù wà ne, tudi tuumvwa bwòwà bwà ne Yèyè kààkushààla mukwàte ku Dìyì adi to. Yèyè's neàshaalè mukwàte ku Dìyì adi. Yèyè wàkamba ne Neàcyènzè. Mpindyewu, tudi tusangana ne aci ncilelèlè. Wàkacìjaadika.

⁹⁴ Cipròfetà cyà Yeshàayi, musangu kampàndà, ncintu kampànda civwà kacya kaciyikù cyanji kwenzeka to; kacya

kwônso eku, ne kacitukù cyanji kwenzekà kacyà to. Wákamba ne: “Virgò neimitè difù.” Nudikù mwà kudifwányikijila mukàji wetù ewu, kàyikù mumanyàngàne ne mulùme, mufwányine kulela mwànà anyi? Yeshàayi wákamba ne: “Virgò neimitè difù.”

Ki Nzambi kwenza ne virgò ìmitè difù, bwà kujaadikaye bulelèlà bwà Dìyì Dyèndè. Wákajaadika Dìyì Dyèndè adi, bwalu virgò wàkiimita difù bulelèlà ne kulelayè Mwànà wa balùme.

⁹⁵ Mpindyewu, Dìyì adi divwijiibwe mubidi, tàngilàayi cyàkenzàDi. Pààkalediibwà Mwànà wa balùme awu, Ùvwa Dìyì Dyòdi diinè. “Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi. Ne Dìyì dyàkavijiibwa mubidi ne dyàkasòmbela munkaci mwètù.”

⁹⁶ Yèyè ùvwa Dìyì dyà mwoyi adi. Wákajaadika ne Yèyè nguvwa Dìyì dyà mwoyi adi. Wákambila balongeshi bàà mu ditùkù adi abu ne: “Nganyì udi mwà kuMpiisha bwà mpèkaatù?” *Mpèkaatù* ùtu “bupidyà.” “Nganyì udi mwà kuNgambila ne Ndi mwena bupidyà? Dìyì dyònsò ditù difùndiibwe bwà bwalu Bwányì adi, s’ndyùle.” Mèyi madyànjila kwamba mwandamutekète à ndekeelu à mu nsòmbelu Wendè àkuujiibwa mu mèbà mwandamutekète à ndekeelu, pa nkùrusè. Byònsò byàkafùndiibwà bwà bwalu Bwèndè abi, byakùjiibwa, bwalu Yèyè ùvwa Dìyì. Wákajaadika ne ki civwàYe, èyowà. Wàkondapa babèedi. Wàkabiisha bafwè. Wàkacimuna lufù, ifernò, ne lukità. Wákajaadika ne Yèyè ùvwa Dìyì.

Mònaayi bwalu bwà ku nzùbu kwà Yayìlò eku ebu. Yèyè ùvwa . . . Ùvwa mubàmbile bulelèlà. Tudi tuMumòna pàvwàYè ùkòsolola ùsabuka mbù. KubwelaYè.

⁹⁷ Kùvwa mukàji mutekète pa kakùnà apu, ùvwa mutùule mfrangà yèndè yònsò ku bangàngàbukà. Kakùyì mpatà to, bangàngàbukà bàvwa benzè mwàbò pààbò mwònsò mwà kwenza amu, bwà kwondopa mukàji awu; pàmwapa bangàngàbukà bàà beena Ebèlù, ne yèyè awu ùvwa mukàji wa beena Ebèlù, nènku bàakenza mwàbò pààbò mwònsò mwà kwenza bwà mwanààbò wa bakàji awu. Nànsha nànkù, kabààkapeta cintu nànsha cìmwè bwà kwimanyika mashi à àlwa munda aa to, civwà, pàmwàpa, cikondo cyà diimana dyà diya dyà ku mashi ne mashi èndè àvwa matuutè nkòkà mu mùshindù wà ne yèyè . . . kakwàcikwètù aku kàkaavwa kalwè katekètàngàne mu mùshindù wà kakàciyi kàbìdi kakùmbana mwà kwendakana to. Nènku yèyè ùvwa muumvwè bààkula bwà Yesù. Ne mmwenzè ànu ùmòna kaabwàtù kakesè aku kènda kàdisàka mu micì yà ku dilobo, kupwekayèku bwà kudìmwènayè.

⁹⁸ BaMudyudi bùngì cyanàànà bàvwa biimàne mwaba awu. Ne Yèyè kì mmupangè badyudi leelù ewu to. Bìikalapù nànsha bamanyè ne Ùvwa Nganyì, nùnkù kabàvwa mwà

kwikala baMudyudi to. Kàdi bàvwa baMudyudi bwalu kabàvwa bamanyè ne Yèyè ùvwa Nganyi to.

Nèнку ki mùshindù wùdibi ne Mukenji nàнку leelù ewu, bantu bààbùngì bàvwa bàjinga bikolè kumòna ditùkù edi. Mémè ncìyì ngenza byenzedi byà Taatù Wanyì to, díbà adi kanùNgiitábùùjì to. Mémè ndi ne bujaadiki butámbe bunènè,” mwàkambàYè, “kutámbe bwà Yone, bwalu byenzedi bìndi Mémè ngenza, bìdi bijaadika ne Taatù ùdi Naanyi.” Ùvwa ne byenzedi bitámbe bunènè, bwalu Yèyè nguvwa Mumanyishiibwe awu. Yone wàkamanyishiibwa pèndè, bu diyì dyà ewu uvwa wela lubilà mu cipèlà. Kàdi pàakalwàYe, Yèyè nguvwa mupròfetà uvwa Mòsà mwambè ne nguvwa mwà kujuudiibwa awu.

⁹⁹ Yesù wàkamba ne: “Bu ne nuvwa bamanyè Mòsà, nùнку nudi baMmanyè Mémè. Mòsà wàkaakula bwànyì Mémè. Bantu banènè bààbùngì bàvwa bàjinga bikolè kumòna ditùkù edi. Mémè ncìyì ngenza byenzedi byà Taatù Wanyì to, díbà adi kanùNgiitábùùjì to. Mémè ndi ne bujaadiki butámbe bunènè,” mwàkambàYè, “kutámbe bwà Yone, bwalu byenzedi bìndi Mémè ngenza, bìdi bijaadika ne Taatù ùdi Naanyi.” Ùvwa ne byenzedi bitámbe bunènè, bwalu Yèyè nguvwa Mumanyishiibwe awu. Yone wàkamanyishiibwa pèndè, bu diyì dyà ewu uvwa wela lubilà mu cipèlà. Kàdi pàakalwàYe, Yèyè nguvwa mupròfetà uvwa Mòsà mwambè ne nguvwa mwà kujuudiibwa awu.

Ànu mùmvwà ngamba dilòòlò adi amu ne, Yèyè mmulwè mu ménà àsatù; dína dyà Mwànà wa Nzambi, Mwànà wa muntu, ne Mwànà wa Davidi.

¹⁰⁰ PàvwàYe pa buloba apa, musangu wà kumpàla, Ùvwa Mwànà wa muntu. Kàvwa mwà kwikala Mwànà wa Nzambi díbà adi to; Yèyè kàakambakù ne ncìvwàYe to. Wàkamba ne Ùvwa “Mwànà wa muntu.” Pàvwa muntu kanà yònsò mwà kuMwela mpatà, Ùvwa wàmbe ne: “Udi umòna Mwànà wa muntu; Mwànà wa muntu.” Mpindyewu, “Mwànà wa muntu” ùdi *mupròfetà*. Bìvwa bikèngela bwà kulwaYè mùshindù awu, bwalu, Mufundu, Yèyè kèna mwà kulwa bibèngàngàne ne Mifundu nànsha.

¹⁰¹ Ki bwà cinyi, leelù ewu, bìdi ne Mukenji wètù—wètù wà cikondo eci kawèna mwà kulwila kùdi beena tèdòlòjì ne ku tèdòlòjì nànsha, bikèngela cyàlukilè ku cintu cìmwècìmwè cyàkalayàci bwà kwenza aci. Bidi ne cyà kwikala mùshindù awu.

¹⁰² Pa nàнку tudi tusangana ne, mu Muntu ewu, bìvwa bikèngela kwikalaYè mupròfetà. Kí m’Mwànà wa Nzambi apu to, bìvwa bikèngela bwà kwikalaYè Mwànà wa muntu. Yehowàh Yèyè wwinè wàkabiikila bapròfetà, Yelèmiyà ne bakwàbò abu ne: “Mwànà wa muntu.” “Panùdì numòna Mwànà wa muntu. . .” “Mwànà wa muntu Nganyi’s?” mwàkatungunukàbo ànu ne kwela lukonko.

¹⁰³ Pashiishe, Wàkakwàta mudimu ne mwànzù Wèndè awu bu Mwànà wa muntu. Pashiishe mMukwàte mudimu ne mwànzù Wèndè awu mpindyewu bu Mwànà wa Nzambi. Nzambi ùdi Nyumà, ne pàdiYe mpindyewu mukwàte mudimu mu Bikondo byà Èkèleeziyà, bu Mwànà wa Nzambi. Mpindyewu, mu Bukalenge bwà bidimu cinunu, Yèyè neikalè Mwànà wa Davidi, pààsòmbàYe pa nkwasà wa butùmbi wa Davidi. Yèyè ngwìkala mupyanyi wa nkwasà wa butùmbi awu, Mwànà wa Davidi.

Mwânà wa muntu, Mwânà wa Nzambi, Mwânà wa Davìdi, kàdi m'Muntu ànu umwèumwè awu díbà dyònsò.

¹⁰⁴ Ànu mùdì Taatù, Mwânà, ne Nyumà Mwîmpè; mudimu wà Nzambi. Yèyè ùvwa Nzambi Taatù, pashiishè kulwaYè Nzambi Mwânà, mpindyewu Ùdì Nzambi Nyumà Mwîmpè. Kaciyi Nzambi yisàtù to; Nzambi umwèpelè, mamwèneshiibwa àsàtù, byambiibwà bisàtù byà Nzambi umwèumwè awu.

Mpindyewu tudi tusangana ne, ne mu díbà mene ditùdì ne mwoyi mpindyewu edi, Nzambi mmushààle mukwàte ku Díyì Dyèndè byà mwomùmwè ànu mwàkenzàYe musangu awu awu.

¹⁰⁵ Tudi tusangana ne Wàkakòsolola mbú. Mukàji ewu ùvwà muMwitàbùùje, kùvwa cintu munda mwèndè amu cyàkabangà kutuuta bikolè. Kàvwa naaci ne Mufùndu to, ànu mùvwàbi ne Yoshùwà kàvwa ne Mufùndu bwà kwimanyikayè díbà to, kàdi mukàji ewu ùvwa mwitàbùùje munda mwà mwoyi wèndè ne Yèyè ùvwa Mwânà wa Nzambi. Pa nàнку kwambayè ne: “Bu mèmè ànu mwà kulenga civwàlu Cyèndè, nèngòndopiibwè.” Ki kudifindayè mu musùmbà wà bantu awu too ne mwàkalengàye civwàlù Cyèndè, nènku mashi àvwà àlwa munda awu kwimanawù.

¹⁰⁶ Mpindyewu, Yèyè kutàngila mu batèeleji amu, bwà kujandula ne wàkaMulenga awu ùvwa nganyi. Kakùyì mpatà to, kùvwa ànu muntu kampànda. KwimanaYè. Bantu bònsò baMungwile; ne bamwè bàMwelulwila, bàmwè bàMuseka; mwàkwidi mwimànyine pa bule ùMwela nkonko, ne balombodi bàà èkèlezìyà, ne bakwàbò. Kàdi kùvwà bàmwè bàvwà baMwitàbùùje. Nènku, ki paanyimà pàà katanci kwimanaYè, dyàkàmwè, kukùdimuka, kwamba ne: “WàNdengi awu nganyi?”

¹⁰⁷ Bamwè bàà kùdìbo kwambabò ne: “Mòna’s, Mulongeshi!” Ngeela meeji ne ùvwa m’Peetèlò wàkamba awu, “Mòna’s, musùmbà mujima ewu’s mmuKungwile. Mòna’s, ne udi ‘muKulenge’ nganyi? Mòna’s, bantu bònsò’s bàdi mukanci mwà kuKulenga!”

Yèyè ne: “Kàdi’s Ndi muumvwè ne bukolè mbupàtùke mu Mèmè emu.” KushààlaYè mutekètàngàne. Dìvwa ndilenga dyà mùshindù mushìlàngàne.

¹⁰⁸ Twìkalapù nànsha mwà kumòna aci’s, mwanèètù wa balùme, mwanèètù wa bakàji! Bu wèwè mwà kuMulengaku ne dilenga dyà mùshindù kampànda’s wè! Kaa, nwènú babèèdì, nkàadi ndìlongolola bwà kunùsambidila, ànu mu tusunsa tukesè cyanàànà emu. Ndi cyà bushùwà ngiitabuuja ne ndi ne Nyumà Mwîmpè, kí Nyumà Mwîmpè mupite unùdì nendè kunùdì aku awu, anyi udibò nendè kùdì bantu aba to. Nyumà Mwîmpè ànu umwèumwè awu, kàdi’s ndíyì ditùma dyà Nzambi; ne nwènú mwà kwitabuuja ne ndíyì ditùma dyà Nzambi, dyà kusambidila babèèdì, ne kubàtentekela byanza, ne kwipata nyumà mibi, ne

milayi yidiYe mwenzè, neciikalè cintu cimècimwè aci bwènu nwènu. Neupètè cyùdi ulòmba aci, bu wèwè mwà kuciitabuuja.

“Udi mwà kwitabuuja ne Ndi ne bukolè bwà kwenza cyòci eci anyi?” mwàkambà Yesù.

¹⁰⁹ “Èyowà’s, Mukalenge, ndi ngiitabuuja,” mwàkambà muntu uvwa ne mwànà ne ciseki awu, “Ndi ngiitabuuja ne Wèwè udi Mwànà wa Nzambi uvwa ne cyà kulwa pa buloba awu.” Mpindyewu, tudi bamanyè ne bìdi mwà kukèngela ànu lwidi alu bwà kutwàla bipeta.

¹¹⁰ Mpindyewu, lùkàsàlùkàsà, twèlàayibi meeki kùdiYe mu katanci kakesè, ki Yèyè ewu wènda ùbanda ne njila Wendè buludi. Mwakwidi mukèsè kampàndà kulwayè, kakùyi mpatà to kakwàcikwètù aku kàvwa keena kwitabuuja kàà ku mikàlu.

¹¹¹ Bàdiku búngi cyanàànà pa buloba leelù ewu, twena kwitabuuja twà ku mikàlu. Mbaswè kwitabuuja Aci. Mbaswè kwitabuuja ne Nyumà Mwimpè ngwa cyà bushùwà. Mbaswè kwitabuuja ne eci ki nkwaka wa bàpostòlò awu, mwàkalayà Nzambi ne mu matùkù à ndekeelu Úvwa mwà kupòngolola Nyumà Wendè. Tudi . . .mmuswè kwitabuuja mu Maalàki 4 ne, Wàkalaya ne, mu matùkù à ndekeelu Diitabuuja dyà—dyà Mpenta dyà ku cibangidilu divwa mwà kwalujuludiibwa cyàkàbìdi kùdi—kùdi èkèleeziyà.

¹¹² Maalàki 4 ngudi ucyàmba. “Mònaayi, Nènnùtùminè Eliya mu ditùkù dyà ndekeelu,” ncyà bushùwà, “ne yèyè nealujululè Diitabuuja dyà bânà kùdi baataatù,” nwamònu’s, “kàbìdi, Diitabuuja dyà baataatù kùdi bânà.” Nwamònu’s, ki cidi ne cyà kwikalakù.

Wèwè udi wamba ne: “Èè, awu’s ùvwa n’Yone Mubàtiji.” Bwàlà, bwàlà.

¹¹³ Yone Mubàtiji ùvwa Maalàki 3. Ncyà bushùwà. Maatàayi 11 ngudi mwambè nàнку ne: “Bu nwènu mwà kucyàkidila, yèyè ewu ki wàkambabò ne: ‘Mònaayi, Ndi ntùma mùsànjeelà Wanyi kumpàlà Kwànyì.’” Úvwa Eliya, cyà bushùwà. Yesù mmwambè ne ncìvwayè. Kàdi kí ng’Eliya wa Maalàki 4 to, nànsha kakesè.

¹¹⁴ Bwalu: “Dyàkàmwè paanyimà pàà Mukenji awu, bìkèngela buloba bwòshiihwè ne kapyà, ne baakàne bèndelè pa butù bwà beena lwonji.” Pa nàнку kacýàkenzeka mu cikondo cyà Yone to. Bìkèngela tùpetè Mukenji wà wàlukila wùpàtula bantu mu ngiikàdilù yònsò yà cyena-màngumba eyi, wùbààluja ku Diitabuuja dyà ku cibangidilu, dishùwashùwàlè dyà beena mpenta. Ne tudi tucimòna cyènjiibwa, ciikàle cyùja Mufùndù wùdi wùkèngela bwà wènzekè. Mifùndu yònsò yidi ne cyà kuula. Mùshindù mwinè wutùdi bafwànyine kwangata mikwàbò yàbúngi ku yòyi, mbifwànyine kungangata dibà dyàbúngi kutàmba dindì nàadi mpindyewu, bwà kuleeja. Kàdi nudi nuumvwa bintu ebi ne, bìkèngela byènzekè ànu menemene

mùshindù ewu, kùdì bânà bàà Abraham, ànu mwàkalayàYe amu.

115 Tudi tumòna Yesù ùbanda mpindyewu bwà kuya kondopa mwànà mukesè wa bakàji awu. Bwalu, taatù awu, mwena kwitabuuja mukesè wa ku mikàlu awu, cintu kampàndà cyàkafika mu mùshindù wà cimukèngela bwà àjingululè Yesù, pa nànkù, ngàngàbukà ùkaavwa mumwèlè làà. Ki kwasaye kafulu kèndè kafìke aku ne kuyayè kuntwaku bwà kakeba ní ùvwàkù mufwànyine kapeta Yesù. Nwamònu's, Yèyè ùtu ànukù misangu yònsò paùdì Nendè dijinga. WàkaMupeta mucikàle ùfùminakù ku dibwela ku mwelelu wà màyi aku.

116 Ki yèyè ne: "Lwà kwòkò kùdì mwanàànyì mukesè wa bakàji eku, Ùmutentèkèlèku byanza, nènku neàsangalè." Yèyè ne: "Mmulààle ùpùnga ne lufù. Mmwanàànyì mulela umwe." Yèyè ne: "Ùdi ne bidimu dikùmi ne bibidì. Katwèna ne bânà bakwàbò to. Mèmè ne mukàjàànyì," pàmwàpa, "tukàadi twenda tukùlakaja. Ne ewu ki mwànà umwèpelè utùdiku pèètù nendè, kàdi nyewu mulààle ùpùnga ne lufù. Mukalenge, ndi muKwitàbùùje. Bu Wèwè ànu mwà kulwa kamutentekelakù byanza, yèyè neàsangalè."

Nwamònu's, cyàkajingululàye ncinyi? Wàkajingulula ne Dìyì dilaya dyà Nzambì adi divwa dimwènèshìibwè mu Muntu ewu.

117 Ànu byà mwomùmwe ne mwàkambà Nikòdemè ne: "Laabi, mulongeshi, tudi bamanyè ne Wèwè udi mulongeshi mufùmìne kùdì Nzambì. Bwà aci kaayi tudi bamanyè. Bàfaalèsà mbacimanyè." Bòbò kabààkacijikula bwà cinyi? "Muntu nànsha umwe kì mmufwànyinekù kwenza bintu byùdì Wèwè wenza ebi to, piikalà Nzambì kàyi Nendè. Tudi bamanyè ne Wèwè udi mufùmìne kùdì Nzambì."

118 Apa tudi tusangana ne Yayilò ùvwa mwitàbùùje cintu cimwècimwè aci. Wàkamba ne: "Lwàku Ùmutentèkèlè byanza." Ùvwa mumanyè ne Nzambì ùvwa munda Mwèndè. "Tentèkèlè mwanàànyì byanza. Nànsha yèyè ùpùnga ne lufù, neikalè ne mwoyi."

119 KuyaYè ànu nendè. Ne pàcivwàye wènda ùya apu, ki mutùmìibwè ne mukenji ùlwàlwa ewu pwàà, wàmba ne: "Lekèla kuMutàcisha, kùtácishi kàbidì Mulongeshi to. Mwànà wa—wa bakàji awu, wáfù, wàmanyì kufwà patùdì twakulangana apa. Ùkaadi mutùùle nkindà."

Yesù kukùdimuka kùdì Yayilò, kwamba ne: "Ncyènakù mukwambile ne: 'Wèwè mwitàbùùje ànu nàka, neumonè butùmì bwà Nzambì' anyi? Wèwè ànu mwitàbùùje nàka!"

120 KubwelaYè mu cibambalu amu, ki bòbò abu, bònsò bàdyàbakeena bàdila myadi, bàtwa mikèmù, ànu mùtù bantu kanà bònsò aba bafwànyine kwenza's. Mwànà wa bakàji mukesè mulenga, mmwànà wa bakàji wà mpaasàtà, nguvwa mufwè, ne mumàne kuumushiibwa ne pa buloba ebu. Kàdi pàmwàpa

ùvwa mufwè kùkaavwa ndambu wa mēbà, ne pashìshe bamanè kumulààdika ne mu nkwasà wa fòteyè, ne bàkaavwa ne pabwìpì ne kwela mubidi wèndè bwanga bwà kubèngawù kubola, pàmwàpa, ne bakamutèèke ku luseke, bwà kumujiika.

Pashìshe tudi tusangana ne Yesù wàkabwela mu nzùbu amu. Bòbò bònsò bàvwa munkaci mwà kutwà mikèmu. KwambaYè ne: “Anji pùwayi.” Yèyè ne: “Ki mmufwè to, kàdi mmulààle tulù.”

¹²¹ Mpindyewu nudikù mwà kudifwànyikijila cìvwàbo bòbò bàdyàmbidìle anyì? “Mòna’s, twàmanyi muntu ewu, bwà mpindyewu. Tutu tuumvwa ne Yèyè ewu mmwànà mulela mu masandi. Ne tutu tuumvwa bwà bwalu Bwèndè, bwà maalu Èndè ònsò à mafi àtùYe mudyànjlile kwamba awu. Bwà mpindyewu kaayi twàmanyi ne mwakwidi ùvwa wàm bilamù ne, ‘muntu ewu mmupàle,’ bwalu twètù tudi bamanè ne mwànà wa bakàji ewu mmufwè. Ngàngàbukà’s mmujikùle ne ‘mmufwè,’ s’nyèyè wàwa mulààdika panshì. Mufwè mwìnè, ne twètù bamanè ne mmufwè.” Kwambabò, kuMusekabò byà bàMudyombola, mu ngaakwilù mukwabò ne, kwenzabò bwà kuMufwìsha bundù, mu diMudyula amu.

¹²² Kàdi Yèyè ùkaavwa mumanè kwamba ne kì mmufwè to. Ki cyònsò cìvwà cikèngelà. “Mmulààle tulù.” Nànsha badyùdi biikàlekù búngì kaayi, Yèyè neàjaadikè Dìyì Dyèndè! KubàpàtulaYè bònsò mu nzùbu amu, mwipàte beena bupidyà bònsò abu. KwangataYè Peetèlo, Yakòbò, ne Yone, beena kwitabuuja abu, bantèmù bàsàtù, ne taatù ne maamù, kubwela e kukwata mwànà wa bakàji awu ku cyanza, ne kwakula mu ngaakwilù wàkabiiikila musùùkà wèndè kuwàlujila mwàmwa mu mwaba kampàndà mu Cyendèèlèlè. Ki mwànà wa bakàji kwikalayè ne mwoyi.

¹²³ CyàkenzaYè ncinyì? Wàkajaadika Dìyì Dyèndè. Wàkajaadika cyàkambaYè aci. Kàvwa mufwè to. Ùvwa mulààle tulù. Mpindyewu tudi tujandula ne, mu kwenza kwà cyòci eci, tudi tujandula, ne Yèyè wàkajaadika cintu kampàndà cikwàbò kuntwaku. Mpindyewu Wàkajaadika ne Ùvwa Nzambi. Wàkajaadika ne Ùvwa ne didyànjlila-kumanya. Tàngilàayi nùmonè cìvwà Dìyì Dyèndè dyambè mpindyewu. “Ki mmufwè to, kàdi mmulààle tulù.” Nwamònu’s, kàvwa mufwè to, twamb’eku twamb’eku. Ùvwa mulààle tulù. KuleejaYè didyànjlila-kumanya Dyèndè. Mpindyewu, kùvwa kufwànyine kwikala bàná bàà bakàji batekètè bààbúngì bafwè mu dindà dimwèdimwè adi, kàdi bwà ewu kaayi kàvwa mufwè to. Ùvwa mulààle, ànu mùvwà Lazàrò amu. Ki kumubiikilaYè bwà àpatukè mu tulù atu, bwalu kàvwa mufwè to.

¹²⁴ “Ne ewu udi ungiitabuuja Mémè, nànsha byòbì ne mmufwè, kàdi neikalè ne mwoyi; ne ewu yònsò udi ne mwoyi ne ungiitabuuja Mémè, kàadyàkufwàku to.” Ànu aba bàdi mu Mukàndà wà Mwoyi wà Mwànà wà mùkòkò, bààkapikulàYè

pàakafwàYe apu abu, ki bààbikilàYe bwa kupàtulabò mu tulù atu, mu ditùkù adi, aba bàdi bafuùlùlùdiibwè kùdi bukolè Bwèndè, bàdi ne bukolè bufuùluludi abu búsanganyiibwa munda mwàbò abu. Ànu mene mûngãmbi makèèlèlè dilòlò awu amu; nànsha paanyimà pàà Elishà mumanè kufwà, ne mifùbà yèndè yisanganyiibwa mu lukità, bukolè bufuùluludi abu bùcìvwa ànu pa mifùbà yèndè ayi's.

¹²⁵ Bushùwà, Wàkajaadika ne Ûvwa Nganyi. Mpindyewu tudi tusangana kàbìdi, byà mwomùmwe, Yèyè wàkajaadika kàbìdi, ne, mu Ebèlù nshapità mwi4 ku mvensà wa 12, Wàkajaadika ne Yèyè ùvwa Dìyì dyà Nzambi. Wàkenza nàнку cyà bushùwà. Mònaayi cyàkenzàYe. Ebèlù, 12, Ebèlù 4:12 ùdi wàmba ne: “Dìyì dyà Nzambi nditàmbe bukolè, ditwè kutàmbe mwelè wà mvità wà nseke yìbìdi, ne—ne Didi kàbìdi Dijinguludi dyà meeji ne mapàngadika à mu mwoyi.” Tàngilàayi ànu katanci kakesè cyanàànà mpindyewu.

¹²⁶ PàcìvwaYe ùbangilakù mudimu Wèndè wà bwambi, paanyimà pàà Yèyè mumanè kupàtuka bwà kuleeja ne Yèyè ùvwa Dìyì, pààkapàtukàYe mu cipèèlè ùmukila ku diteeciibwa Dyèndè, kùvwa muntu dìnà dyèndè Peetèlò, dìnà dyèndè dìbà adi dìvwa Simonà. Ki kulwayè kùdi Yesù ne mwanàabò wa balùme, Àndèlè. Kàdi mmwenzè ànu ùbwela mu Bwikadi bwà Yesù Kilistò anyì, Yesù kwambaYè ne: “Dìnà dyèbè n'Simonà. Ne dyà tatwèbè ùvwa n'Yona. Kubangila ku mpindyewu nebakubiikilè Peetèlò.” Aci's cyàkajaadika ne Yèyè ùvwa Dìyì, bwalu Dìyì n'Dijinguludi dyà meeji ne mapàngadika à mu mwoyi. Yèyè ùvwa Dìyì.

¹²⁷ Filipò wàkamòna eci cyènzeka. Kuyayè mu nyùngulukilu wa mukùnà, muyè ditùkù dijimà, ne kwalukilayè. Ki kulwayè ne mulundà wèndè dìnà dyèndè Nàtànàèlè. Ki yèyè ne: “Maalu àà's àdi cyà bushùwà munkaci mwà kwenzeka. Mòsà wàkamba ne 'Mukalenge Nzambi wetù neàjuulè Mupròfetà' bu yèyè, kàdi's ki Muntu nyewù. Mòna's, Yèyè's mmwambile Simonà ne ùvwa nganyi, ne tatwèndè mene ne ùvwa nganyi, ne twètù tudi bamanyè ne cìdiYe wàmba aci mbulelèlè. Bwalu, Nzambi mmucyãmbè mu Dìyì, nènku's ki cyôci eci cijaadikiibwe ne Yèyè nguvwa ne cyà kwenza cyôci aci, ne aci's ncidi cijaadika ne awu m'Maasiyà.”

Nènku mmwenzè ànu ùbwela mu Bwikadi Bwèndè, Yesù kumwambilaYè, wàmba ne: “Mònaayi mwena Izàlèèlè, mwena munda mùdi kamùyi lubombo.”

Awu ne: “Laabi, Udi mummanyè dìbà kaayi?”

Yèyè ne: “Kumpàlà kwà Filipò kukubiikilayè, paùvwa mwinshi mwà mucì apu, Mèmè mvwa mukumòne.” KujaadikaYè Dìyì Dyèndè. KujaadikaYè Dìyì dyà Nzambi. Ki cyàkenzàYe.

¹²⁸ Mukàjì wa ku ciinà cyà màyi awu, pàvwàye ne...Èè, Wàkamulòmba bwà kuMupèeshilayè màyi à kunwà mu mulòndò

wùvwàye ùsunyina mâyi mu ciinà awu, ki yêyè ne: “Kacitu ciibidilu cyènú nwènú beena Yudà bwà kutùlòmba twètù bakàji bàà beena Sàmaalèyà cintu bu nàнку to, bwalu katùtu neenù malanda to.”

Yêyè ne: “Kàdi bu wêwè mumanyè ùdi wakula nendè ewu ne Nganyi, nùнку wêwè's nguvwa mufwànyì kundòmba Mémè mâyi à kunwà.”

Yêyè ne: “Ciinà cyà mâyi ncile be.”

Ki muyiiki awu, pàvwàwu wùtùngunuka, ndekeelu wa byònsò kujandulaYè ciwà lutàtu lwèndè. Ki Yêyè ne: “Ndà ùkangàtè bàyeebè, ùlwe mwaba ewu.”

Yêyè ne: “Ncitu ne bàyaanyì bwalà.”

Yêyè ne: “Wambì bulelèlè, bwalu ukààvwa naabò bàtaanu, kàdi ùdi musòmbè nendè mpindyewu awu kì mbàyeebè to.”

¹²⁹ “Mòna's,” mwàkambàye, “mukalenge, ndi mmòna ne Wêwè ewu udi mupròfetà.” Yêyè. . . “Katùvwakù bapetè mupròfetà to kùkaavwa bidimu nkàmà yìnaayi, udi mumanyè's.” Yêyè ne: “Ndi mmòna ne Wêwè ewu udi mupròfetà. Mpindyewu, tudi bamanyè ne pààlwà Maasiyà, udi ubiikidiibwa ne n'Kilistò awu, pààlwàYe, Yêyè neàtwàmbilè bintu byà mùshindù ewu ebi. Ki ciikalà cimanyinu Cyèndè ncyòci aci.”

PàakambàYe ne: “Mémè ki Yêyè udi wakula neebè ewu,” s'Wàkajaadika Dìyì Dyèndè. Yêyè. . . tudi tujaadika cyàkambaYe ne ncidiYe. Yêyè nguvwa Maasiyà awu, Mwànà wa Nzambì.

¹³⁰ Mpindyewu tudi kàbidì tusangana, ne, mukàji mukesè uvwa ne disaamà dyà mashi àlwa munda edi, wàkalenga ciwàlù Cyèndè awu, aci cyàkamujaadikila kàbidì ne Yêyè ùvwa Dìyì dyà Nzambì.

¹³¹ Mpindyewu vùlukàayi, dilòlò edi ne, Yesù wàkamba. . . Kàbidì, mu Ebèlù, 1, Ebèlù nshapità mwi3, ngeela meeji nyèyè, Mmwambè ne: “Yêyè ùdi mpindyewu Mwakwidi Munènè,” cikondo citùdi ne mwoyi mpindyewu eci, “Mwakwidi Munènè musòmbè mu Ngiikàdilù mutàmbe bunènè wa Nzambì, mu Maulu, udi mwà kulengiibwa kùdi mateketa etù.”

Ebèlù 13:8 mmwambè ne: “Yêyè ùdi umwèumwè awu, makèlèlèlè, leelù, too ne kashidi.” Yêyè ùdi Nzambì umwèumwè awu ànu mùvwàYe amu. Ùdi umwèumwè awu dilòlò edi.

¹³² Yone Munsantu 14:12, Yàyè mmwambè ne: “Ewu udi ungiitabuuja Mémè, byenzedi bîNdi ngenza yêyè neàbyènzè pèndè. Neènzè mene ne bitàmbe ebi, bwalu Ndi nyà ku Taatù Wanyi.” Nwamònu anyi? “Ewu udi ungiitabuuja Mémè, byenzedi bîNdi ngenza ebi yêyè neàbyènzè pèndè.”

¹³³ Mu Maatàayi 28, Yêyè mmwambè ne: “Katancì kakesè aka bàà pa buloba kabàakuMmòna kàbidì to, kàdi nwènú

nenùMmòne, bwalu nêNgüikalè neenù mene too ne ku ndekeelu kwà buloba.”

134 Yesù Kilistò ùdi umwèumwè awu makèèlèlè, leelù, too ne kashidi. Mmwimàne, dilòòlò edi, bwà kujaadika Dîyi Dyèndè. (Dìbà dyànyi dyàyi.) Kàdi Yèyè wàkajaadika ne Ûvwa mwà kucyènza. Wàkajaadika Dîyi Dyèndè dìbà adi, cyàkalayàYe bwà ditùkù adi aci. Wàkajaadika mèyi à Yeshàayi. Wàkajaadika mèyi à Noà. Wàkajaadika mèyi à Mòsà. Wàkajaadika mèyi à yònsò wa ku baprófetà.

135 Yèyè wàkalaya ne mu ditùkù edi, ditùkù ditùdi twètù ne mwoyi edi ne, bàà pa buloba nebüikalè mu ngiikàdìlù wa Sodomà, balùmè ne balùmè bàsèlangana. Cìtàngìlaayi ànu pa buloba leelù ewu, pa buloba bujimà kùnyaaya mu ngendu; kì ng’ànù muneemu to, myaba yònsò. Mbyà njiwù mikolè. Mu Suède, nsongààlùmè ne nsongààkàji yìyaaya kenza manàyi à skì pa nêjè, ànu butakà bwà pulupulu ebu. Nènku bàdi mu Alèmanyè ne mu France, ne myaba mikwàbò yònsò, bìdi ànu bantu bàà lukutukutu lwà menemene lutùdi naalù münü mu États-Unis emu. Ncikondo’s. Mémè, mémè mupetè mùshindù wà kwalukila, ndi njinga kwakulakù pa bìmwe byà ku bintu byà ciprófetà, kwakula neenù, bwà kunùleeja ne, cikondo citùdi ne mwoyi eci. Bible mmwambè ne: “Bànà nebàkookeshè baledi bààbò.” [Katùpà kàà mukaba wà mèyi munda mutupù—Muf.]

136 . . .Dîyi. Kàdi, vùlukàayi ne, Abraham ùvwa ne dimiinu, òvwa dimiinu Izàkà. Ûvwa ne mamiinu makwàbò paanyimà pàà lufù lwà Sarah. Nènku ùkaavwa ne bidimu lukàmà ne makùmi ànaayi ne bitaanu, kusèlayè mukàji mukwàbò, kupetayè bânà bàà balùmè mwandamutekète pa kuumusha bàà bakàji, bwalu Nzambì ùkaavwa mumwalùje nsongààlùmè pàkaavwàye ne bidimu lukàmà apu. Ùkaavwa dìbà adi kàbìdi ànu ne bidimu makùmi ànaayi ne bitaanu, ki pashüishè yèyè. . . Tudi bamanye aci. Nkàadi munüyiishèci mu Californie emu, kukàadi bidimu.

137 Nènku mpindyewu tudi tuumvwa ne Dimiinu dyà Abraham adi kadivwa dimiinu dilelèlè dyà ku disangila dyà mulùme ne mukàji kùdi Sarah to, òvwa Izàkà, dyàkènza ditùnga adi, kàdi Dimiinu dyà bukalenge òvwa nku mulayi, òvwa n’Yesù Kilistò. Nènku ku Dimiinu adi, Yèyè wàkajuula Dimiinu dyà bukalenge. Kaa, ekèlekèle! Mpindyewu twètù tudi bwakwidi bwà bukalenge, ditùngà dyà bukalenge, ditùngà dyà cijila, biikàle tulàmbula butùmbi kùdi Nzambì, mulàmbù wà mishikù yètù yidi yifila butùmbi kùdi Dìnà Dyèndè. Nzambi wàkajaadika Dîyi Dyèndè, Wàkiicia Nyumà Mwimpè pambidi pèètù.

138 Wàkamba ne: “Ànu mwàkadìbi mu matùkù a Sodomà, ki mwikalàbi kàbìdi mu ditùkù diikalà Mwànà wa muntu munkaci mwà kubuuludiibwa.” Mpindyewu nwamònu anyi? Kuumuka ku Mwànà wa Nzambì, ànu pabwipi menemene ne kulwa Yè Mwànà

wa Davidi, Ûdi uDibuulula cyàkàbìdi bu Mwànà wa muntu. Nwamònu Mufùndu awu anyi?

¹³⁹ Bwalu, ki mùtùYe wènza misangu yònsò, Kàtukù wènza cintu nànsha címwè to Kàyi mwanji kucìmanyisha basadidi Bèndè bapròfetà. Mmwómò menemene. Ki címwà mulayi Wèndè. Nwamònu anyi? Yèyè kàtukù wènza cintu nànsha címwè. . . Nzambi kèna mwà kushima to. Ûtu misangu yònsò ànu wànji kucibuulula, dyàmbedi, kumpàlà kwà Yèyè kucyèna.

¹⁴⁰ Tàngilàayi mu nsòmbelu utùdi tusanganyibwa leelù ewu ewu. Tàngilàayi kutùkaadi. Yònsò wa kunùdi neitabèku ne tudu mu Sodomà wa cyèna-leelù. Nudi bamanyè ne ditùnga edi ndimanè kubwelakana. Kùdi. . .kakùcyèna ditèkemenà to; kakùcyèna kushààlè lupàndù bwà ditùnga edi anyi nì mbwà dikwàbò ditùnga kampànda to. Tukàadi bapite apu mpindyewu. Bipròfetà bitù byamba bwà bwalu ebu, bikaadi byùle. Nzambi ùdi munkaci mwà kupumbulula, ùkèbangana ne kàkòòkò kàà ndekeelu mwaba wònsò wùdiku awu. Yònsò neyibwelè, díngà ditùkù. Tukàadi ku cikondo cyà nshìikidilu. Tàngilàayi, bilondèshìle myaba.

¹⁴¹ Ndi nkulòmbakù wèwè, ànu bu mwanèètù wa balùme anyi wa bakàji, bwà ùtambèku kudyundisha diitabuuja ànu bwà katanci kakesè kumpàlà kwà twètù kusambidila bantu aba. Ne ndi mumanyè ne kabyèna bìkèngela bwà twètù kuya pa díbà kampànda to. Kàdi ndi—ndi—ndi muswè kubanga mulongo wa babèèdi, pashiishè nwènù bàdi ne cyà kuya abu nenùye díbà adi. Nwamònu anyi? Nwènù bàdi baswè kushààla mu mulongo wà babèèdi abu nudi mwà kushààlaayi. Kàdi anji ngaanyishilaayikù, ànu bu mwanèènù, nnùfunkwinèku ànu cintu kampànda mu katanci kakesè cyanààna.

¹⁴² Tàngilàayi Yesù, mu Luukà 17:30, nwamònu's, pàvwàYe wamba mwaba awu bwà cikondo cyà nshìikidilu, mùvwàbi mwà kwikala bu mu matùkù à Noà. Pashiishè kwambaYe ne: “Ne bu mùvwàbi, byà mwómùmwè kàbìdi, mu matùkù à Sodomà,” yèyè ne, “piikalà Mwànà wa muntu munkaci mwà kubuuludiibwa.” Mwànà wa muntu cyàkàbìdi, kàyi Mwànà wa Nzambi to. “Mwànà wa muntu,” nwamònu's, aci cidi citwàla cyàkàbìdi Maalàki 4, twalukilamù buludi. Bipròfetà bikwàbò byònsò ebi bidibwinkamù buludi, mùshindù wùvwàbi ne cyà kwenzeka. Yèyè ùtu ùjaadika ne Dìyi Dyèndè dìdi nàнку. Ncyà bushùwà.

¹⁴³ Nènku mònaayi, mu kwenza kwà nàнку, mwikalàYe mwà kwicikija Nyumà Wèndè pa musunya wònsò, ne ciikalà mwà kwenzeka aci, mwikalà dyalujulula mwà kwalukila. “Nènku bânà bèènù balela bàà balùme ne bàà bakàji nebàmbè bipròfetà. Pa basadidi Bàànyi balùme ne bakàji Mèmè nèngìcìkijè Nyumà Wànyi. Ne Nèndeejè bimanyinu mu maulu muulu.”

144 Ndi ne fòtò kaaba aka, wa Mwanèètù Lee Vayle udi mwab'ewu ewu. Ndi njinga kunùleeja ànu cìdì cyenzèke pa mukùnà, ditùkù adi, pàvwàbo bapàtule bânà balongi bônso mu tùlaasà, pabwìpì menemene ne cyena-bwalu cinènè eci cyà dikàngula, Bitampì Mwandamutekète abi. Pààkapàtulàbo bânà balongi apu, mèmè mvwà kuulu aku mwikàle nsambila, ki Kapyà kàdi kàpwekà aka mu mmwènekèlu wa mùlòngoji, pashiishè kààlukila kàbandà ne kàbwayika, ne kànyùnguluka ne kàpweka cyàkàbìdì. Ki pàkambaYè cyà kuya kambila bantu. Twètù... Kì Cyòcì aci's, mwaba wùvwa tùlaasà twà ku Tucson...ne kwàkabàndàCi mu mpèèpele aku.

145 Ki beena maalu a mamanya kukwàtabò fòtò, ne bikwàbò, ne kwelabò nkonko pa Cyòcì. Kwambabò ne: "Cìdì kwèpì? Cìdì cyenzèke ncinyì?" Kabèènakù mwà kucyùmvwa to, nwamònu's. Kaa, kì ncyenzela mu musokoko to, ànu kondo kàà mwoyi kabweja mu mìdimà's. Kacya... Yesù, pàvwàYe pànwapa apu, kùvwa mìliyò yà bantu bàvwà kabàyi bamanyè ne Yèyè ùvwa pa buloba to. Eyowà. Nekwikalè mìliyò leelù ewu bìikalà kabàyi mwà kuumvwakù to, makùmì à mìliyò yà bantu.

146 Kàdi nekwikalè, kùdì aba bàdìCi citùmina, bôbò abu ki bìikalà mwà kuumvwa. "Beena meeji nebàmanyè Nzambì wabò mu ditùkù adi, ne bôbò nebènzè byenzedi byà bulòbo." Aci tudì bamanyè, dîbà ditùdì ne mwoyi mpindyewu edi.

147 Tàngilàayi mpindyewu Sodomà, tàngilàayaaku cyàkenzekà aci. KwambaYè ne: "Ànu mwàkadibi mu matùkù à Sodomà." Kùvwa kasùmbù kàà bantu bàvwa bindile mwànà mulaya. Twètù tudì twitabuuja nànkù. Ùvwa ng'Abraham ne kasùmbù kèndè aku. Kùvwa musùmbà wà bàà civùmvù, Lotà, mutwè ndambù cimpìngà, nànsha nànkù mwena kwitabuuja; mu Sodomà mwàmwa. Bitùpà bisàtù byà bantu.

148 Kùtu misangu yònsò ànu bitùpà bisàtù abi. Beena Ham, beena Sem, ne beena Yafètè. Kàbìdì, beena kwitabuuja, beena kwitabuuja bàà budìngìbudìngì, ne beena bupidyà. Bàdì myaba yònsò, ne tudì—tudì tubàsangana mu kasùmbù ne kasùmbù kònsò. Nènku, myaba yònsò, udi ubàsangana. Ne tusùmbù atu tucìdì ànu mwab'ewu. Bìkèngela ùbitàpùlùlè. Udi mwà kubìlondeshila mu Mifùndu mwònsò amu, bìdì binwàngana ànu pyòpyòpyò.

149 Tèèlejàayi eci. Tàngilàayi mwaba wutùdì twètù basòmbe, bilondèshile myaba ne mèyì à cipròfetà, dilòlò edi. Mpindyewu, yònsò wa kutùdì mmumanyè ne buloba bùdì mu ngiikàdìlu wa Sodomà.

Tudi bamanyè bipròfetà byònsò byà Izalèlèlà, ùdì mu buloba bwèndè. Nwènù baswè kumanya bilondèshile matùnga mwaba wutùdì biimànyìne, tàngilàayi Izalèlèlà, mwaba wùdiye ùsanganyiibwa.

150 Nwênù baswè kumanya ne mmu ngiikàdìlù kaayi mùdì èkèleeziyà, tàngilàayi nùmonè mùshindù wùdì bakàjì bènza maalu. Mukàjì ng'èkèleeziyà. Mumònaayi, mùdiye ne nsòmbelu wa masandi, mupangè maalu; tàngilàayi, nùmonè kùdì èkèleeziyà ùsanganyiibwa. Anjì mutàngilaayi, nwamònu's, nwamònu's, tàngilàayi ànu bakàjì. Nudi numòna mwaba, mùdì bakàjì bèènu bàdìpwekesha milongo ne bàlwa bakooyike bikolè, ki mùdì èkèleeziyà wenù nàнку, nwamònu's, cimfwànyì.

151 Tàngilàayi mwaba wùdì Izalèlèlà ùsanganyiibwa, nudi numòna cimfwànyì cyà cikondo menemene citùdì. Nwamònu's, tàngilàayi ànu bimanyinu abi ne maalu à kukèma. Bu nwênù—bu nwênù, anyì mèsù ènu wòwò makàngula, nenùmonè mwaba wutùdì tusanganyiibwa.

152 Mpindyewu tàngilàayi bilondèshìle myaba mwaba wutùdì tusanganyiibwa, buloba bùdì mu ngiikàdìlù wa Sodomà. Mpindyewu mònaayi ne: “ànu mwàkadibi.” Mpindyewu mònaayi, kùvwa muntu, mu ditùkù adi, mwindile dila dya mwànà mulaya. Abraham ne Sarah, bàvwa bindile mwànà mulaya mu kasumbù kàà Abraham amu. Bòbò kabàvwa mu Sodomà to. Kàdì ànu pa dībà edi mene, nshapità wa ndekeelu wa bwalu abu, pabwìpì menemene ne mwànà mulaya awu kulwayè, kwàkatùluka bantu bàsàtù mu Dyulu, Mwanjèlò... Banjèlò bàbidì ne Nzambi. Ne bààkatùluka ne kuyiikila ne Abraham, mwìnshì mwà mucì wà nsànga awu. Ncyà bushùwà anyì? Kàdì bàbidì bàà kùdibo bààpweka e kubwela mu Sodomà ne kwela lubilà bwà kupiisha mpèkaatù yà cimenga. Ne pàvwa ànu pabwìpì menemene ne dyoshiibwa dya bàà Bisàmbà byà bendè, mwinè musangu awu. Sodomà mujimà wàkabùtuka ànu piinè apu. Ànu bakesè menemene mbààkapàtùdiibwà, Lòtà ne bàna bèndè bàà bakàjì bàbidì. Mukàjèndè kààkangula mene mpasu to; wàkakùdimuka paanyimà. Mùshindù mwinè wùmvwàku mufwànyine kujinga kwikala ne dībà bwà kunùleeja cyòci aci mpindyewu mene, mwaba wùdì èkèleeziyà awu mwimàne pa kaaba aku. Ndi muswè bwà nùmonè mpindyewu.

153 Nènku Muntu umwe wàkashàadila paanyimà, wàkayiiikila ne Abraham awu, ne Wàkenzela Abraham cimanyinu. Nènku, tàngilàayi, Abraham ùkaavwa mumònèmòne Nzambi mu bimanyinu binènè byàbùngì. Tudi twitabuuja aci, kì mmwòmò anyì? Pabwìpì menemene ne mwànà wa balùme uvwa ulwa awu. Kàdì kumpàlà kwà mwànà awu kumwèneshiibwayè, kùvwa cimanyinu cyàkapèèbwàye.

154 Bwalu, Mwànà awu, Mwànà mulelèlà awu, ùvwa ne cyà kwikala Mwànà wa Nzambi, ku diitabuuja dya Abraham, nwamònu's, ùvwa n'Yesù. Twètù bu dimiinu dya Abraham, bafwè mu Kilistò, tudi dimiinu dya Abraham.

155 Mònaayi mpindyewu kumpàlà menemene kwà aci kwenzekaci, kwà mwànà ewu kulwayè. Mpindyewu, Ewu

wàkashààla ùyiikila ne Abraham awu, Uvwa mwelè nyimà ku ntentà awu, wàkamba ne: “Abraham.” Mpindyewu, ànu ditùkù òm̀wè cyanààna kumpàlà kwà cyòci aci’s, yèyè ùvwa Abram. Mpindyewu Yèyè kwamba ne: “Abraham, mukàjèèbè Sarah, ùdi penyì?” kàyi Sarra, S-a-r-r-a to. S-a-r-a-h, mwànà wà bakàji wà mfumu. “Mukàjèèbè Sarah, udi penyì?”

Yèyè ne: “Ùdi mu ntenta paanyimà Pèèbè apu.”

156 Yèyè ne: “Nèndwe kukumwènekela, nwamònu’s, bilondèshile mulayi Wányi wùNdi mukupèèshe.” Mu ngàakwilù mukwàbò ne: “Cikondo cyà mwoyi, Sarah neàbangululè cikondo cyèndè cyà ciibidilu cyà mwoyi aci.”

157 Kàdi Sarah, bu mùkaavwàye mununu, ne bidimu lukàma lujimà mpindyewu, mu ntentà amu, kusekelayè mu dyàpà. Nwamònu’s, wàkafùkisha mimwemwe mu yèyè mwìnè, wamba ne: “Mmunyi mùdi Muntu wàwa mwà kwikala wàmbilamu? Wamònu’s, mèmè mukàji mukùlàkàji, mukalenge wanyi Abraham wàwa, mukùlkàji pèndè, maalu à bwena nzùbu mamananè kuya kùkaadi bidimu.” Yèyè ne: “Mmunyi mùndiku mwà kwikala kàbìdi ne milòwù ne mukalenge wanyi? Yèyè pèndè mukùlàkàji, eku mèmè mukùlàkàji, bapicishe cikondo cyà dilela, mijilu yà mabèèlè myumìnyine, yònsò. . . ‘Yèyè’s ùkaadi mùme yònsò.’ Mmunyi mutùdiku bafwànyine kwikala kàbìdi ne milòwù?”

158 Kàdi Muntu wàwa, ne nyimà Wendè mwela ku ntentà, kwambaYè ne: “Bwà cinyi Sarah wàsekì, wamba ne: ‘Biinè bintu ebi bìdi mwà kwenzeka munyi?’” Cìvwa ncinyi aci? Dijingulula, dyà cipròfetà! Nwamònu anyi? Nwamònu anyi? Ki cyàkamònàye ncyaci.

159 Mpindyewu kwambaYè ne: “Aci necyàlukilè cyàkàbìdi, ne Mwànà wa muntu,” cìvwàci aci, ùvwa m’Mwànà wa muntu ànu mwaba awu mene. Èè, kuMubiikilayè ne ng’Elohim: “Mukalenge Nzambì.” Elohim, muntu yònsò mmumanyè ne aci ncyà bushùwà, Elohim awu m’Mukalenge Nzambì. “Ku cibangidilu Elohim wàkafùka maulu ne buloba,” Ewu udi udikùmbanyina mu byònsò. Mwànà wa muntu muvwijìlìbwe mubidi, ki Yèyè uvwa mwimàne mwaba awu awu mu mubidi musangu awu, bu tèòfàni, mwimàne mwaba awu ùjingulula cìvwà Sarah wamba mu ntentà paanyimà Pèndè. KulayaYè. Tàngilàayi. Dimiinu dyà Bukalenge dyà Abraham ndilayiibwe bwà kumòna cintu cìmwècìmwè aci.

160 Kàdi mònaayi ne Lòtà, wàkapeta pèndè mùsanjeelà muntwamu, bàbìdi bààkapwekà muntwamu abu. Umwe wa kùdìbo kupweka, ne mukwàbo kupwekayè nendè, ki kuyiishabò ne kubiikila bantu bwà kunyeemabò ciiji cìkolè cìvwà ne cyà kulwa aci.

161 Bilondèshile myaba, bàà pa buloba kacya kabàtukù banji kusòmba mu ngiikàdilù awu to, kacya ànu ku ditùkù adi

dyàkafila Yesù mulayi awu adi, too ne mpindyewu mene. Ndi muswè kulòmba mulongi kanà yònsò wa maalu-malonda udi mufwànyinekù kwikala mu nzubu emu, anyi pawikala utèelejila nànsha ku mukaba wà mēyi ewu, ne ucitèeleja dībà kanà dyònsò, swakù ùmfùndile. Mēmè ndi ndonga maalu-malonda kwēnjì mpindyewu bidimu bitwè ku makùmi àsatù, bwalu-bulonda bwà mu Bible, kàdi kacya kakùtukù kwanjì kwikala muntu ùnkaadiku mumòne mu maalu-malonda ónsò a èkèleeziyà, munda mwà bikondo byònsò mwandamutekètè byà èkèleeziyà. Mutùdì mpindyewu mu Laòdikiyà, ne tudi bamanyè nànkù.

¹⁶² Kacya kakùtukù kwanjì kwikala musànjeelà, utu muyè ku èkèleeziyà mujimà, mwikàle ne dìnà dijika ne h-a-m to, too ne mpindyewu. G-r-a-h-a-m, Billy Graham. Kùkaadi baa Moody, Finney, Sankey, Knox, Luther, ne bakwàbò, kàdi kacypà ne h-a-m, “taatù wa matùnga.” Mpindyewu vùlukàayi ne, yèyè ùdì G-r-a-h-a-m, màleetà àsambòmbò. Kàdi A-b-r-a-h-a-m ùdì yèyè màleetà mwandamutekètè. Mònaayi, bàdi muntwamu, Billy Graham, ùya mu bi—bitùpà byònsò byà pa buloba, ne ùbiikila bwà kupàtuka mu Sodomà ne: “Pàtukàayi, nyeemàayi ciiji cikolè cìlwalwà.” Kakwèna muntu nànsha umwe ùndiku mumanyè, mu budimi bwà bwambi, udi mushààle kacya wàkwata Nzambì, pa dìyi dyà dibingishiibwa adi, bu mùdì Billy Graham mukwàte to. Yèyè ùdì mwà kucilèèja. Yèyè kí mmwena tèlòlji wa mùshindù wà. . . Ngeela meeji ne yèyè mmwena tèlòlji, kàdi kí mmulongeshi wa bukòlè menemene to. Kàdi Nzambì ùdì nendè. Muntu awu ùdì mwà kwimana mwaba awu mwikàle bu ne dileesònà dyà kàlaasà kàà Dyàlumingu, mulamè bantu abu bàshààla bu bakwàcìke ku nzembu. Yèyè mmusadidi wa Nzambì wa dībà edi. Mutùmina nganyì? Èkèleeziyà wa mubidi, udi mu Sodomà awu.

¹⁶³ Kàdi vùlukàayi ne, kùvwa èkèleeziyà umwèpelè wa nyumà, uvwa kàyi mu cikòwelu cyà cyena-màngumba aci, to. Kasùmbù kabiikila bwà kupàtuka, ne bôbò bàakakidila pààbò mukenji kampànda, ne mùsànjeelà. Nènku civwa cinyi? Dijingulula dyà meeji àvwà mu mwoyi. Nzambì ùtu misangu yònsò ànu ùjaadika Dìyi Dyèndè.

¹⁶⁴ Tùsambilàayi. Taatù wa mu Dyulu munanga, dībà dyà ntàpè-nkutàpè edi, mùdì mapàngadika ne cyà kwangaciibwa, dībà nditùngùnùke ne kutuuta ku ntankù, katwèna bamanyè ne ndībà kaayi didì Mukalenge wetù mwà kulwa to. Kàdi patùdì tumòna bipròfetà byàkafidiibwà kùdìYe ebi, ku bapròfetà Bèèbè munda mwà bikondo, biikàle mpindyewu munkaci mwà kuvùnguludiibwa. Éyi Nzambì, mùshindù mwinè wùndì nKusàkidila bwà cyòci eci’s, bwà ne nànsha mene bantu bàdi bakùmbàne, bantu bamanyi bapilùke mu—mu tèlòlji, bàdi mwà kukandamèèna matèyi a bàà pa buloba ne beena bupidyà, ne mu miyiiki yà ku tèlèviziyò eyi, ne kakùyi mpatà nànsha mikesè to bafwànyine kwimana ne dikima ne bukitù, bamanyè

mwaba wùdibo biimànyine ne bàjaadika ne Dìyì adi ndilelèlè, ku Mifundu. Ne dībà adi twètù bàdi bindile Dilwa Dyèbè aba, Mukalenge, twitabuuja ne bintu bikwàbò bikaavwà byamba mu bipròfetà ne nebyènzekè abi, bwà kujuuka ne kusànka patùdì tuKumòna wenda munkaci mwètù mene ne wenza cintu ciinè cyŪvwà mwambè ne necyènzekè aci, ujaadika Dìyì Dyèbè ne ndilelèlè. Nzambi wa Cyendèlèlè, bânà Bèèbè bàdi bàsaamà mbaabà basòmbe kaaba aka.

¹⁶⁵ Ncyèna mumanyè ne ndībà kàayi dikwàbò didi dikèngelà bwà twètù kwenza mudimu to. Dībà dya dilòòlò ndyedi dyènda dibwela. Kàdi Wèwè wàkalaya, wambila mupròfetà ne: “Nekwikalè Bukènkè lwà pa ibaamulòòlò.” Ne tudi tumòna ne dībà dimwèdimwè didi dijuukà ku esètè adi, ndyòdì didi dikabwelà ku wesètè. Dishidimuka ndyenzè lwendu pàmwè ne dībà ne mpindyewu tukàadi ku Côte Ouest, ne Èvànjeeliyò mmwenzè lwendu pàmwè ne dishidimuka. Mpindyewu, Taatù, tudi bamanyè ne eci ki ndekeelu wa Èvànjeeliyò, ndekeelu wa dībà, ndekeelu wa cikondo. Cikaadi cijiminangana mu Cyendèlèlè. Kàdi Wèwè wàkalaya ne Mwànà uvwa mwà kupàtuka, Mwànà wa muntu uvwa mwà kubuuludiibwa. Mu matùkù à ndekeelu, cyòci eci ncivwà mwà kwenzeka. Makènkè à dilòòlò àfikì, Taatù. Tudi tuKwela twasàkidila bwà cyòci aci. Ne didipwekesha dyònsò mùdibi emu, kàdi Wèwè utu ucyenza mu bupwekèle, misangu yàbùngì, mu mùshindù wà ne citu cipicila banène pa mitu, bàdi bàdyamba ne mbeedi baà meeji à ndondo, ne ucibuulwila bânà bakesè bàdi baswè kulonga.

¹⁶⁶ Ndi ndòmba, Nzambi, bwà Ūcivwijèku nàнку, dilòòlò edi, bwà bânà Bèèbè babèèdi bàdi bakwàte ne byà luse aba bààmònakù mulayi wà Nzambi awu, nènku yònsò wa kùdibo òndopiibwè, ne àpatukè kaaba aka, màalabà, ne mibidi mipyamipya yà makàndà, ne bàsangalè kàbidì. Enzàku nàнку, Mukalenge, bwà bààmònakù mwà kutwàdilangana Mukenji muntu ne mukwèndè, too ne pàabwela wa ndekeelu mu cikumbi, ne dībà adi biibi nebikangiibwè. Tùkwàcisheku, Nzambi munanga. Ndi nKulòmbakù, dilòòlò edi, kumpàla kwà byònsò ebi, bu Wèwè mwà kwenzakù bwà musangu ewu kàbidì, Taatù, bwànyì mèmè.

¹⁶⁷ Bivwa—bivwa bimwèka, dilòòlò adi bu ne, bantu kabàvwa batàmbe kucimòna to. Kàdi, ndi ndòmba ne, cyènzekèku kàbidì dilòòlò edi, Mukalenge. Bwalu, nkàadi mupicishe ne dībà dinkòsela bwà kwakula, kàdi ncyèna mumanyè ne ntoo ne ku dībà kaayi kwàkèngelàbi bwà kwenza cyòci eci to. Pa nàнку, ndi ndòmba, Taatù, Udikù mwà kungumvwila anyì? Ne umvwàku disambila dya balùmè bàà difwànà dya Nzambi aba ne bakàji bàdi basòmbe kaaba aka dilòòlò edi, bàdi bùle tètè ne Nyumà Webè aba. Mbeena kwitabuuja, Mukalenge, Wèwè udikù ànu mwà kukwàta mudimu munkaci mwàbò. Nènku tudi. . . Ndi ndòmba bwà Ūshindikèku Dìyì Dyèbè dyŪdì mwamba ne, “Ewu

udi ungiitabuuya Mêmè, byenzedi biNdi ngenza yèyè neàbyénzè pèndè” adi. Byènzèkèku cyàkàbìdì, Yesù, bwà kujaadika ne Wèwè udi umwèumwè awu makèèlèlè, leelù, too ne kashidi. Ndi ndòmba nànkù bwà butùmbi bwà Nzambi, mu Dîna dyà Mwân’Èndè, Yesù Kilistò. Amen.

¹⁶⁸ Mpindyewu, ànu bwà katanci kakesè cyanààna, ndi njinga kumanyà ne mbantu búngì kaayì mwab’ewu bàdi ne twartà twà disambila. Ndi—ndi muswè nwélè byanza muulu, yònsò wa kunùdi udi ne kartà kàà disambila awu. Èè, mpabwîpì ne bònsò, ngeela meeji, ànu bu myaba yònsò.

¹⁶⁹ Ndi ndikonka ne mbantu búngì kaayì mwab’ewu bàdi kabàyi ne twartà twà disambila, kàdi pèèbè mwikàle usaama, nudikù mwà kwela byanza muulu kwamba ne: “Ncyèna ne kartà kàà disambila to, kàdi ndi nsaama. Ndi ne dijinga.”

¹⁷⁰ Ndi muswè kunulòmba bwà nwikalèku ne kaneemu bwà katanci kakesè. Mpindyewu, ntu munangè kwakula neenù. Ki lwànyì lutàtù misangu yònsò ndwalù’s, ntu ngaakula ntàntà mupitèpìte bule. Kàdi kumpàlà kwà nwènù kulwa, ndi—ndi mutèkèmèna ne mutwishiiibwe ne Nzambi neàjaadikè eci ne cingàmbi aci ne m’Bulelèlè, nenku Yèyè anji—anji àmonè tǔng.

Mpindyewu, mbanganyì bàdi basòmbe aku biikàle bàsaama, bàdi bamanyè ne mêmè ncyèna mumanyè kantu nànsha kàmwe pa bidì binùtàngila, elàayi byanza muulu. Tàngilàayi ànu nùmonè. Èyo.

Ndi njinga nwènù bàdi kabàyi ne twartà twà disambila abu mpindyewu. Nebàbiikidishè twartà twà disambila atu. Ndi muswè nùsambilè.

¹⁷¹ Bible mmwambè ne: “Yesù Kilistò ùdi umwèumwè awu makèèlèlè, leelù, too ne kashidi.” Yèyè ùdi wamba ne: “Yèyè m’Mwakwidi Munène musòmbe mwaba awu ùtwàkwila bwà bitùdi tujikula.” Bidi bikèngela twànji kubijikùla, kumpàlà kwà Yèyè kwikala Mwakwidi Munène, bwalu Yèyè ùdi wàkwila ànu pa dijikula dyètù. Ncyà bushùwà anyì, nwènù bambi naanyì? Nwamònu’s, Ùtu wàkwila ànu pa dijikula dyètù, citùdi tujikula ne ncidi Ye, cidi Ye mutwènzèle aci. Kí ne *ncùkalà Ye* mwà kwenza to. Ùkaadi mumanè kucyènza. Butùdi naabù mbwà kujikula ne Yèyè ùkaadi mucyènza. “Wàkatàpiibwa mputà bwà kushipa kwètù kwà mikenji, ku mibùndàbùndà Yèndè twàkondopiibwa.”

¹⁷² Mpindyewu, Taatù wa mu Dyulu mmumanyè. Nènku pàndi mukutàngile apa, mbwà kumònakù ne ndi mujingùlùle mulundà wanyì mwîmpè wa ku Ohio kwàka, yèyè ne mukàjèndè basòmbe apa, m’Mukalenge Dauch ne mukàjèndè. Ne ndi ngeela meeji ne, udi musòmbè mwibìdi anyì mwisàtu kuumukila kùdìbo aku awu, n’kàbìdì Révérend awu, Mukalenge Blair ùngàmònu makèèlèlè dilòòlò awu. Bwànyì mêmè, mu batèèleji mmubwicidile, bwa bukènkè bwà midilu yidi apa eyi yidi yimpangisha ndambù bwa kumòna, nènku ncyèna—ncyèna nnumòna bimpè menemene to.

173 Kàdi ndi muswè bwà nùsambilè. Ne tèeka pa mwoyi wèbè cintu cyùdi naaci dijinga aci, ne lòmba Mwakwidi wetù Munènè, Udi mwà kulengiibwa kùdi dyumvwa dyà mateketa ètù awu.

174 Mpindyewu, mèmè ncìyi mukumanyè to, ne udi mufwànyine ànu kundenga pambidi pajimà, bu udi ulenga mwanèènu wa balùme, bàyebè, mpaasàtà webè, muntu kampàndà, kî mbifwànyine—kî mbifwànyine kwikala ne dikwàcisha to. Kàdi wèwè muMulengè Yèyè, ne twètù cyà bushùwà mu dipetangana ne Nyumà Wendè, díbà adi Yèyè ùdi mwà kukwàtà mudimu ne diitabuuja dyèbè bwà kuMulenga, ne dipà dyànyi bwà kwandamwinakù.

175 Nwamònu's, ndi mufwànyine kwikala ànu kamàmà ànu mùdi eci emu, cìdi *apa* eci, kakùyi díyi kampàndà dyàkwilamù to. Bìkèngela bwà . . . Eci, eci cìdi kamàmà pàdiku kakùyi cintu kampàndà kaaba aka bwà kwakwilamù to. Nènku ki mùdi kàbìdi muntu kanà yònsò ewu, nkamàmà, pa bìdi bìtàngila maalu aa, ànu Nzambi mwakwile mu yèyè.

176 Mpindyewu sambilà, nàнку tùmonebi bintu bingãmbi ebi ní bìdi bulelèlè. Nzambi àkwacishèku bwà bìikalè nàнку. Ncyèna ngamba ne Neènzè to. Ndi ntèkemena ne Neènzè. Ndi mutwishiiibwe ne Neènzè. Kacyà Yèyè kàtukù mwanji kungeela màyi ku makàsà to, mu bidimu byònsò ebi, mu dikòsolola ne dinyùnguluka dyà buloba bujimà, mu matùngà à mìshindù yònsò, ne kùdi mìlìyò yà bantu. Kacyà Katukù mwanji kumfwisha bundù to. Ne mèmè ndi mutwishiiibwe, ànu mùndi mutwishiiibwe ne mwitabùuje ne ndi mwimàne kaaba aka emu, ne Yèyè kàakumfwisha bundù mpindyewu to.

177 Nènnùlòmbèku ànu bwà kwikala ne kanèemu ne kushààla basòmbè, ànu bwà katanci kakesè cyanààna. Netùtantalajè citùpà cinènè cyà batèèleji bwà kusambidila babèèdi, ànu mu katanci kakesè cyanààna.

178 Kàdi ndi njinga bwà ne nwènu, nwènu beena kwitabuuja, bwà ne bu nwènu ànu mwà kubènga kuntàngila mèmè, kàdi kwitabuuja. Ambàayi ne: “Ndi ngiitabuuja ne cìdi muntu ewu mwambè m’Mufundu. Ncyèna mumanyè ní tukaàdi basemena kule menemene mu cikondo mùdiye wàmba ne mmutùkàadi emu to. Kàdi, byòbì nàнку, díbà adi bìdi ne cyà kwenzeka. Mèyi èndè ôwò Mèyi à Nzambi, díbà adi, èndè mèyi’s neapangilè kàdi Mèyi à Nzambi kàakupangilakù to.”

179 Nzambi mmwenzèjiiibwe bwà kutwà Díyi Dyèndè nyama ku mikòlò. Yèyè neàDijaadikè. Yèyè neàDijaadikè. “Ewu udi ungiitabuuja Mèmè.” Wàkajaadika ne edi nditùkù dyà ndekeelu. Wàkajaadika civwà mwà kwenzeka. Wàkajaadika ne eci ncìvwà ne cyà kwenzeka.

180 Nènku, vùlukàayi ne, Abraham ne kasùmbù kèndè kabààkapeta kàbìdi cingà cimanyinu cyà kùdi Nzambi to, too ne mwàkafikà mwàna mulaya awu. Mbanganyi bàdi bamanye

ne aci ncilelèlà? Cimonyinu cyà djingulula aci! Nènkù Dimiinu dyà bukalenge dyà Abraham, ngànjì nnùtèlèjèkù. . . Lekelàayi nnwàmbilè, EMU MMÙDÌ MUKALENGE WÀMBA, nudi munkaci mwà kwakidila cyèù cimanyinu cyà ndekeelu. Aci mbilondèshile Mifundu ne dibuulula dyà Nzambì didì munda mwà mwoyi wànyì, diikàlè dyàmba ne eci m'Bulelèlà. Ne ndi mutwìshìbwe ne nenùcìtàbùùjè ne m'Bulelèlà.

¹⁸¹ Mpindyewu itàbùùjaayi. Bantu bònso bìitabuuje, bàmba ne: “Mukalenge Yesù, enzàku bwà nKulengè. Ndi ne djinga munda mwà mwoyi wànyì, ne ndi mumanyè ne Mwanèètù Branham kí mmumanyè kantu nànsha kamwè pa bìdì bintàngilà to. Ncyèna nànsha mene mumanyè muntu awu to, yèyè kí mmummanyè to, kàdi Wèwè udi mumanyè. Ne piikalàbi ne mmungambile Bulelèlà, bwalu ebu nebwènzekè.” Ndi nnulòmbaku ne, kanùtentemuku mpindyewu to, ànu bwà katancì kakesè cyanààna. Ikàlaayi menemene. . .

Nwamònu's, wèwè udi nyumà. Nènkù ndi ngangata nyumà yònsò udi munda emu ku bukòòkeshi bwànyì mèmè, mu Dìna dyà Yesù Kilistò, bwà Dìyì Dyèndè dyùlè.

Mpindyewu ikàlaayi ànu ne kaneemu. Sambilaayi. Tàngilàayi kùdiYe, nwamba ne: “Mukalenge, ndi ncìitabuuja. Kwàcishàku bupidyà bwànyì.”

Tùbàngàayi. Bìkèngela bwà nshààle mubùmbàkàjìle meeji pa citùpà cyà nzùbu eci, bwalu, nwamònu's, nudi bààbùngì be, ne yònsò wa kunùdì ùdì nyumà.

¹⁸² Ncyèna mwà kucyènzà to. Wèwè udi wamba ne: “Kàdi mèmè?” Ncyèna mufwànyine kukwambila to. Ncidishikàmìne's. Byenzèdì byònsò byà Nzambì mbidishikàmìne. Nekwikalè bantu bààbùngì bòndopiibwà bààpicilà pa cibumbà cyà ku cyambilu eku, dilòlòlò edi, pàmwàpà nekwikalè bààbùngì bààbenga kwondopiibwa. Byònsò bìdì mu budishikaminyi bwà Nzambì. Nganyì udi mwà kuMwambila cyà dyenza? Nànsha umwe. Ùtu ùkwàta mudimu bilondèshile diswa Dyèndè Yèyè mwinè, ndongamu Wendè Yèyè mwinè.

¹⁸³ Kàdi wèwè itàbùùjà nàka. Ikàlè mudìpwekèshe. Kwikadikù ubinduluka to. Olòlò ànu cyanza cyanààna ùlengè Nzambì, wàmbè ne: “Mukalenge Nzambì, ndi ncìitabuuja.” Nwamònu anyì? “Lekèlaku ndengè civwàlù Cyèbè. Ndi nkèngela *cikampànda*. Ndi mumanyè ne mwanèètù ewu kí mmummanyè anyì mumanyè djinga dyànyì to, kàdi mmutùlondèle maalu aWàkenzà, ne mmwambè ne Wèwè udi umwèumwè awu leelù.”

¹⁸⁴ Aci kacyèna cìnùùmusha nwènu bàna bèètù bàdì pa cibumbà cyà ku cyambilu apa to, muntu yònsò wa kunùdì. Ndi ànu nnulòmba cyanààna, nwènu bàna bèètù, bu beena mudimu naanyì wà—wà Èvànjeeliyò wa Kilistò. Ndi ngakula neenù ànu ne meeji matòòke ònsò mùndì paanyì mumanyè amu, bu—bu muntu ufwàfwà bu nwènu, nwamònu's, kushiyangana

ne buloba ebu. Nebikengelè bwà tùumukè. Ne ndi ne cyà kulumbulula ku Ditùkù dyà Cilumbulwidi, bwà bìndì mwambè. Ndi mumanyè aci, mumanyè ànu menemene. Nènkù ndi nwanyisha nwènù balümyàna, cinùdì aci, nwènù bàdì biimàne nàanyi apa aba, munkaci mwà kunkwàcisha. Mèmè ndi nteeta bwà kunùkwàcisha, bwà kwenza cyònsò cìndiku pàanyi mwà kwenza aci, bwà bwalu bwà Bukalenge bwà Nzambì.

Ndi nsambila ne ndòmba.

Mòna, mbanganyi bàkaadiku bamòne Bukènkè abu mu fòtò? Nukàadikù bamòne fòtò waBù anyi? M'Wòbù bwàbwa bulembèlèlè *kwàka*. Kanwènakù mwà kuBùmòna anyi?

¹⁸⁵ Bùdi kumutù kwà inàbànzà udi musòmbe pàapa ne mùshwalà wèndè wàwa. Ùdi ùsambidila munanga kampànda. Ncyà bushùwà, inàbànzà. Munanga mwinè awu... Udi witabuuja ne mèmè ndi mupròfetà Wendè, anyi mfwilèku luse, musadidi Wendè anyi? [Mwanèètù wa bakàji awu ùdi wàmba ne: “Ncyà bushùwà ne ndi ngiitabuuja.”—Muf.] Udi witabuuja nànkù anyi? Èyo. Mpindyewu, bu Nzambì mwà kunsokolwela cìdì kaciyi cyènda bìmpè aci, mòna's, neucìtàbè ne ncyà kùdì Nzambì, ànu bu mukàji wàkalenga civwalù Cyèndè awu anyi? Mpindyewu, udi mumanyè ne udi—udi naanyi mu ntàntà wa mètres àsambòmbò anyi citèemà, anyi mapìte apu, kí mmèmè ùdiku mulengè awu to. Kàdi udi mulengè Cintu kampànda, cyùdì mumanyè ne udi mu dipetangana ne Cintu kampànda, Kampànda. Cìdici, mbwà mukàji kampànda, mwinè awu mmwanèèbè wa bakàji. Ncyà bushùwà. Udi witabuuja ne yèyè neàsangajiiwbè anyi? Mmukwaciki wa maadrogues. Ncyà bushùwà menemene. Ndi mmumòna wòwela, mukwàcike. Nwamònu anyi? Mpindyewu, mushwalà wùdì naawù mu cyaanza awu, ùkamutèèkèwu pambidi, kàdi kwèdikù mpatà to. Ndi ngiitabuuja ne Nzambì neàmusingilè. Udi muswè kucìtabuuja pàmwè naanyi anyi? Amen.

Mpindyewu, mèmè ncìtu mumanyè mukàji ewu to, kàdi Nzambì mmumumanyè. Udi witabuuja mpindyewu ne mwoyi wèbè wònsò anyi?

¹⁸⁶ Muntu mulùme udi musòmbe pàapa wàwa muvwàle mutèèlù wa mishoonyimishoonyi, mwikàle ne kààmunda, udi witabuuja ne Nzambì mmufwànyine kukwondopa ne kukusangaja anyi? Udi witabuuja ne Yèyè neàcyènzè anyi? Kacya ncitukù mwanji kumòna muntu wàwa to kacya bàndela. Udi ne kartà kàà disambila anyi, mukalenge? [Mwanèètù wa balùme awu ùdi wàmba ne: “To, ncyèna naakù to.”—Muf.] Kwèna naakù? Kwèna naaku dijinga to.

“Bu wèwè mwà kwitabuuja!”

¹⁸⁷ Mukàji kampànda nyewù musòmbe ùteeta bwà kutàngidila lwà pamutù pàa mukàji udi musòmbele apa mene ewu. Mmwenyi kùndì. Kàdi ùtu ùbinduluka bikolè. Ncìtu mmumanyè to.

Ncitu mwanji kumumònakù to, kacya bàndela. Kàdi Nzambi mmumumanyè, ne mmujingùlùle mpindyewu mene ne ùdi mu dipetangana ne Cintu kampànda. Wèwè uvwa munkaci mwà kusambila bwà bwalu kampànda. Kabingila, mbwalu kwèna mwà kushàala paanyimà pàa dilòlò edi to. Udi ne cyà kushiyangana ne masangisha aa. Udi udilongolola bwà kwalukila kwèbè, màalabà. Kùtu wa muneemu, anyi kwèna wa mu Californie to. Udi uya mutàngile ku esètè kuumukila apa. Uyàaya ku ndèkè. Udi munkaci mwà kulongolola, bwà kuya ku ndèkè. Udi wa mu Oklahoma. Èyowà. Ncyà bushùwà.

¹⁸⁸ Udi kàbìdi mu ngiikàdilù wa ùpunga ne lufù. Udi mulwè apa bwà kukusambidilabò. Kwèna ne kartà kàa disambila to. Kàdi uvwa mwitabùuje ne newòndopiibwè, bu wèwè ànu mwà kufika apa. Ncyà bushùwà. Kàbìdi, disaamà dyèbè nkànsèrè. Kànsèrè aku kàdi mu mufùbà. Udi witabuuja ne newòndopiibwè mpindyewu anyi? Udikù witabuuja ne udi mu dipetangana Nendè anyi, mwanètù wa bakàji? Pàmwàpa Nzambi neàngambile ne wèwè udi nganyi, dîbà adi aci ncifwànyine kukwambulwisha anyi? Byòbì nànkù, elà cyanza muulu pawikalà witabuuja nànkù, ne (Nzambi) mbifwànyine kukukwàcisha. Èyo, Màndàmù Steel, udi mwà kwalukila ku Oklahoma.

Ncitu mumanyè inàbànzà ewu to. Ncitu mwanji kumumònakù to.

¹⁸⁹ Inàbànzà kampànda nyèyè ewu musòmbèle lwà paanyimà pèndè apa. Ùdi ùsaama mijilu myùle. Ne ùdi kàbìdi ne mwànà wa balùme udi mukwàciki wa maalà à kapyà, ne yèyè ngudiye ùsambidila. Bu yèyè mwà kwitabuuja, ùdi mwà kwondopiibwa. Màndàmù Mason, udi mwà kwitabuuja ne mwoyi wèbè wònsò, ne kwitabuuja ne Yesù Kilstò neàkupèèshè dyondopa adi anyi? Udi witabuuja anyi?

Èyo, nànkù tentèkèlaaku inàbànzà udi musòmbè ku luseke lwèbè aku awu cyanza, yèyè ùdi ùsambidila bàyendè udi kàyi musungidiibwe. Nzambi neàfilè dyondopa adi.

Tùsambilàayi.

¹⁹⁰ Nzambi munanga, ndi ndòmba bwà Ùmupèèshèku dibènesha adi. Pèèshakù mukàji awu dijinga dyà mwoyi wèndè, Mukalenge. Diitabuuja dyèndè didi pabwipi Nèèbè, mu mùshindù wà ne dyàKulengi. Ne ndi ndòmba, Taatù, bwà Ùmukwàcishèku, mu Dìnà dyà Yesù. Amen.

Mpindyewu itàbùùjà ne mwoyi wèbè wònsò, ne udi ucipeta. Udikù muswè kwenza nànkù anyi? Èyo. Nzambi àkubènèshè.

Udikù witabuuja ne bàyèbè neàsungidiibwe anyi, inàbànzà? Udi witabuuja ne mwoyi wèbè wònsò anyi? Elà cyanza muulu ne, udi witabuuja.

¹⁹¹ Bidi bimwèka bu ne kùdi, kumpàlà kwànyì eku, mukàji wa bujitu bwàbúngì. Nyéyè udi musòmbe pàapa wàwa. Udi witabuuja ne ndi musadidi wa Nzambi anyi? Udi witabuuja ne ndi musadidi wa Nzambi anyi? Udi witabuuja. Èyo. Ncyèna mukumanyè to. Lutàtù lwebè, ntujilu. Udi ne bujitu bupìte búngì. Ukaàvwa kwà ngàngàbukà, mwambè ne kèna ne cyà dyenza pa bwalu abu to nànsha cikesè, kàdi awu úvwa ngàngàbukà wa pa buloba. Wamònu anyi? Webè... Udi ufùma ku dipeta dibungama dyàbúngì. Udi mufwishe bàyebè. Kwèna wa muneemu to. Udi cyà bushùwà wa ku Arkansas. Kàbìdi udi wenda ukèba mudimu, kàdi kùyi mwà kupeta mudimu to. Uvwa ne bwôwà bwà ne, cintu kampàndà, ne nkwèpi kuwàbènga kubìkidiibwa. Kàdi diitabuuja dyèbè mpindyewu dyàlengì Nzambi. Mwanèètù wa bakàji, ndàaku, itàbùùjà. Nzambi àkupèèshèku mudimu, àkupèèshèku dijinga dyà mwoyi wèbè.

Nzambi útù ùjaadika ne Díyi Dyèndè ndilelèlà. Nudi nwitabuuja ne mmwòmò anyi? Mpindyewu ndi muswè ànu bwà nùsambilèku kàbìdi pàmwè naanyi.

¹⁹² Taatù Nzambi, Wèwè udi Nzambi umwèumwè wàkajaadika awu. PaWàkambà ne: “Mwànà wa bakàji awu kî mmufwè to, mmulàalè tulù,” díbà adì’s bìvwa bìkèngela bwà Wèwè kuciijaadika. Mpindyewu, Wèwè wàkalaya ne, ànu pabwìpi menemene ne dilwa dyà cikondo cyà nshìikidilu ne, Mwànà wa muntu mwà kuDibuulula mu mùshindù wùmweùmwe wàkenzàYe ku Sodomà awu. Wèwè ngwàkacilaya, Mukalenge. Mpindyewu Wàlu pa buloba, mu mmwènekeli wa Nyumà Mwimpè, ne mubwelè munkaci mwètù, dilòlò edi, twètù beena kwitabuuja, ne mucijaadikè. Wèwè udi mujaadikè Díyi Dyèbè muWàkenzà ditùkù adi. Mukalenge, katwèna dijinga ne cijaadiki cikwàbo to. Wèwè udi munkaci mwètù. Tudi baKunangè. Nènkù tudi tujungulula ne eci ki cimanyinu cyà ndekeelu pabwìpi menemene ne Dilwa Dyèbè, bilondèshile Mifùndu. Ne mindìdimbì yònsò ne bimfwànyì kacya kabìtukù bìpangila to. Bìkèngela bìikalè byà cyà bushùwà.

¹⁹³ Pa nànkù tudi tulòmba, Taatù, pàdì bânà Bèèbè bàlwa mpindyewu bwà kubàsambidilabò apa, bwà muntu ne muntu òndopiibwè. Swàku bwà kakùshàadikù mubèèdì munkaci mwètù, ku ndekeelu kwà mudimu wà dyondopa ewu to. Èyi Nzambi munanga, Udikù mwà kwenza bwà dilaabiibwa Dyèbè diikalè dyàbúngì pa cisàmbà Cyèbè mpindyewu mene, bwà yònsò wa kùdìbo wàmòna mwà kondopiibwaku anyi?

¹⁹⁴ Ne kwòkò kwikàle bàmwè kaaba aka, bàdì kabàyi banji kwikala bânà Bèèbè to, ne pa nshìndameenu wa bintu ebi, bwà ne... Bâtèèleji Díyi ne bàmònu cintu cyenzèke, cijaadikiibwe ànu menemene ku dileetà ne ku dileetà, ne Wèwè udi Nganyi ne CyÛdi, ne Wèwè udi kaaba aka.

195 Kàdi, Mukalenge, Wèwè udikù mufwànyine—Wèwè udikù mufwànyine kubènesha mashimi anyi? Mòna's, nànsha kakesè, Mukalenge. Kàdi Wàkalaya cyà bushùwà bwà kubènesha Dìyì Dyèbè, ne kî nDifwànyine kwalukila kadìyi ne cididi dyanzè to. Dìvwa mwà kukùmbaja civwàDi ditùmina. Nènku mpindyewu Wenji aci kumpàlà kwètù, dilòlò edi, kakùyì mpatà nànsha mikesè to.

196 Nènku ne mitù yètù miinyika, kùdikù bantu mwab'ewu bàtù kacya kabàyikù banji kwitabuuja kwònsò eku, bàdi bafwànyine kuswa bwà kwela ànu cianza muulu cyaààà anyi? Ne mutù wèbè mwinyika, elà wèwè ànu cianza cyèbè muulu cyaààà. Nènku juukilaaku kuulu, wàmbè ne: “Ndi mpindyewu ngiitabuuja, ne mwoyi wànyì wònsò. Ne ndi muswè kwitaba Yesù Kilistò, mpindyewu mene.” Nudikù mwà kwenza aci, bantu kanà bònsò, bantu kanà bònsò bàdi kaaba aka, bàtù kacya kabàyikù banji kwitaba Kilistò, kàdi biikàle baswè mwà kucyènza pa dîbà edi anyi? Mémè Ncyàkukwambila . . . Ndà ku èkèleeziyà ùdì mulisungwile. Kàdi ndi nkulòmba bwà wèwè kwakidila Yesù Kilistò paucidi . . . Pàmwàpa kwàkutàmba kuseèmena pabwipi Nendè to too ne pawàMumòna ne èbè àbidi pààlwaYè mu mubidi Wèndè wà wùmweka ne mèsù awu ùfùmina mu Maulu. Udiku mpindyewu mwà kuMwitaba anyi pawikalà kùyì mwanji kucyènza?

197 Pa kumòna ne muntu nànsha umwe kaaba aka kî mmwimàne kuulu to, ndi ngiitabuuja dîbà adi ne nwènù bònsò nudi ne meeji mu wòwò, bantu bàà lumvu, ne bajingulula cinùdì nwenza. Pawikalà musòmbè mwaba awu mwinshì mwà cyòci eci, vùlukà ne: “Wèwè uMfwà bundù kumpàlà kwà bantu, Mémè nènkufwè bundù kumpàlà kwà Taatù Wanyi.” Kùvwa muntu mwimàne kuulu, pàmwàpa, èyowà, mu batèeleji amu, mundekeelu mwàmwa.

198 Nzambì munanga, bàba bàdi mwà, ncyèna mmòna to, bàdi biimàne kuulu abu, mbaswè kuKwitaba. Mbajingùlùle, Mukalenge, bwà ne eci kacitukù cyenjiiibwe to too ne mpindyewu, nènku mpindyewu nyewù Ucishindika ne ucijaadika ne cidi nànkù. Ndi ndòmba, Taatù, bwà mu myoyi yàbò, yidì minyung'ishiiibwe mu mùshindù wùdì kawùyì wùmvwika pa dîbà edi eyi . . . Mmuniyì mutwàmanyà ne ewu kî muntu wa ndekeelu udi ne cyà kubwela? Eci cidi mwà kwikala ndekeelu bwà Los Angeles. Ewu ùdì mwà kwikala musùukà wà ndekeelu wikalà mwà kulediibwa mu Bukalenge. Katwèna bamanyè ne cikondo aci necilwe dîbà kaayi to. Kàdi pènzekàci, ciibi necikangiiibwe, Mubidi newùkumbanganè. Kacyàkwikala Mubidi mulèma anyi Mukàji-musèla mulèma to. Newikalè ànu ne bidimba bûngì kampànda byena mènà àvwa mafùnda mu Mukàndà wà Mwoyi wà Mwànà wa mùkòòkò kumpàlà kwà difùkà dyà dyulu ne buloba, bààlwilà Yesù bwà kwangata, bu Àdàmà, ùpàtuka buludì bwà kusungila

mukàjèndè. Ndi ndòmba, Nzambi, bwà Ûbàkidilèku mpindyewu mu Bukalenge Bwèbè. Bàdi mu byanza Byèbè. Kwatàku naabu mudimu, Mukalenge, ndi ndòmba mu Dìná dyà Yesù. Amen.

¹⁹⁹ Nzambi àbeneshèku yònsò wa kunùdi uvwa mwimàne kuulu awu. Nciwva mumanyè ne bamwè bàà kunùdi bàvwa biimàne kuulu to. Bàmwè bàvwa biimàne mundekeelu mwàmwa, bàmwè kuulu mu cisàsà. Mpindyewu ndi muswè ùngenzèlèku cintu cimwèpelè. Bu nwènù mwà kuswà ngumvwàyikù. Nutwilanganèku ne mwambi kampànda mwaba ewu ne nùyiikilanganè nendè, paanyimà pàà disangisha dimanè kujika. Nudikù mwà kwenza nàнку anyi? Kanùlekedikù cipangila to. Pawikala kacya kùyikù mwanjì kubàtijiibwa mu dibàtiiza dyà bwena Kilistò to, enzà nàнку pashìishè apa, ne pashìishe ùshaalè ne byanza byela muulu too ne paùdi upeta Nyumà Mwímpè.

²⁰⁰ Mpindyewu, bantu bààbúngì bàdi ne twartà twà disambila kaaba aka. Netùbàlòmbè bwà bàjuukilè kuulu, ne bàbandè kùneeku, ne ngeela meeji ne bàkosolwelè apa. Anyi nebikengelè bwà mèmè kulwa...[Mwanèètù wa balùme kampànda ùdi wàmba ne: “To.”—Muf.] Ncyàkupeta mùshindù to. [“Lwilàyi ku elu luseke.”] Kuumukila ku *elu* luseke, bàdi mwà kupàtukilaayi elu, lwà ku elu luseke, aba bàdi ne twartà twà disambila abu.

²⁰¹ Ne mpindyewu kwòkò muntu wa kunùdi udi ne cyà kuya, cidi... Dìbà dikaadi dimpìte. Mfwilaayikù luse. Nènteetè bwà kulengeja ndambù mààlabà dilòòlò. Ku...tudi dìbà dikùmi ne tusunsa dikùmi, ku ntankù ùdi ku cimanu wàwa's. Twasàkidilaayi wàbúngì bwà dilwa dyènù dilòòlò edi, ne Nzambi wa mu Dyulu ànùbènèshèku. Nwènù baswè kushààla bwà kutàngila mulongo wà babèèdi, tutu àmu ne disanka dyà kwikala neenù. Kàdi netùbangè kusambidila babèèdi mpindyewu, ne ncyèna muswè kunùlama ambà ànu nwènù baswè kushààla. Nwátangàlájìibù mu Dìná dyà Mukalenge Yesù. Ditalala dyà Nzambi dyèndè neenù ne dinùbènèshè, ne dinùpèèshè diikisha mu mibidi yènù, bufùkù bujimà ebu, ne dinùpèèshèku bukòlè bwà mubidi bwà nwamònakù mwà kwalukila kàbidi mààlabà dilòòlò. Mpindyewu Nzambi ìkalèku neenù.

²⁰² Nènku bàdi ne twartà twà disambila abu bàjuukile kuulu bwà disambila mpindyewu, mutùdi tusambidila bantu cyàpàmwè. Mpindyewu tudi baswè bwà nùmanyè, mpindyewu, nwènù bàdi biimàne ne kartà kàà disambila abu, kùdikù mpatà kampànda mu nsòmbelu webè amu anyi? Kùdikù, nùmfwilè luse, mpèkaatù kampànda mu nsòmbelu webè ùdi kùyi mutondè anyi? Yèyèmu, indilà nkulòmbèku nùнку. Kùlukù mu mulongo wà babèèdi emu ne mpèkaatù kàyì mutonda munda mwà mwoyi wèbè to. Bwalu, udi ne cyà...Eci ndyàmpà dyà bânà, nwamònu's. Nènku pawikalà kùyì mwena Kilistò to, lekèlèlè mwoyi wèbè kùdi Kilistò, mu mulongo wa babèèdi amu, pashìishè ùlwe. Ndyà mwena kwitabuuja. Udikù muswè

kucyènza anyi? Mwitabè Yèyè dyàmbedi bu Musungidi webè, ne pashiishè ùlwe pa cibumbà cyà ku cyambilu apa, bwà kukusambidilabò.

²⁰³ Mpindyewu nêngiikalè mwà kusambidila muntu ne muntu; nciyi anu mbàpicisha, byènze bu mushingà wutùtù twenzena to. Tudi mu èkèleeziyà mpindyewu. Ngeela meeji ne Mwanèètù wa bakàjì Wyatt wátùpèèshi kabingilà bwà ne tudi mwà kushààla ne kusambila. [Mwanèètù wa balùme kampàndà ùdi wàmba ne: “Èyo, bufùkù bujimà, ntàntà yònsò ùdi muswè awu.”—Muf.] Tudi mwà kushààla ntàntà yònsò utùdi baswè awu. Nènku ndi nsàkidila Mwanèètù wa bakàjì Wyatt ne musumbà wà kaaba aka, bwà mùdibo batùlekèle twenza nànkù’s. Nzambì àmubènèshè. Bàyèndè wa bukitù awu wàkiimana pa cibumbà cyà ku cyambilu eci, kusambidila babèèdi, too ne pàakafwàye, bwà ku dyànyì pàànyì dimanya, dísàlaayi dilelèlè dyà nkùrusè. Nènku mpindyewu ndi nteeta bwà kutùngunuka ne kwenza cintu cimwècimwè aci, kubènèsha cisambà eci.

²⁰⁴ Nènku mpindyewu ndi ndòmba bwà yònsò wa kunùdi wapicila mwab’ewu awu...Kabyèna bikèngela bwà wèwè kujìkula cintu kanà cyònsò cyùdi muswè nànsha. Kabyèna bikèngela bwà wèwè kwamba cintu nànsha cimwè cidi cikutàcisha to. Lwàku ànu cyanààna mèmè nkusambidilè, kàdi wèwè itàbùùjà.

²⁰⁵ Nudi nwitabuuja ne Nzambì ngudi muntùme bwà mèmè kwenza cyòci eci anyi? Elàayi byanza byènù muulu. Nudi bavùlùke cyàkambà Mwanjèlò wa Mukalenge aci anyi? “Wèwè mufikishe bantu ku dikwitabuuja, mwikalè ne meeji matòòkè paùdi usambila, kakwèna cyàkàndameenà disambila to.” Ne nwènù’s nudi bamanyè ne aci ncilelèlè. Cikaadi cijaadikiibwe, misangu ne misangu.

Mpindyewu néndombè Mwanèètù wa bakàjì Rose, bu yèyè mwà kuswà, bwà kwimbaku, *Itàbùùjà Nàka*, anyi, *Ngàngàbukà Munènè Ukaadi Mpindyewu Pabwipi*, anyi cintu kampàndà.

²⁰⁶ Ndi muswè bwà yònsò wa kunùdi mpindyewu ìkalè naanyì mu—mu bwobùmwè. Nenwikalèku, kàbidi, nwènù bàdi kabàyi mu mulongo wa babèèdi abu, nenwikalèku munkaci mwà kusambidila bantu aba anyi? Èè, balayàayikù nànkù awu, mu kwela cyanza muulu ne: “Nêngiikalè nsambila, nwamònu’s. Netwikalè bònsò tusambila.” Èyo. Èyowà’s.

Ndi muswè bwà nwìkalakù, byòbì bikèngela ne nùumukè, nwàyakù ne lutùlù lwònsò mpindyewu, bwà kabàyi bàtàcisha patùdi tusambila apu to.

Udi witabuuja ne necijikè mpindyewu anyi, mwanèètù wa bakàjì? [Mwanèètù wa bakàjì awu ùdi wàmba ne: “Ne mwoyi wanyi wònsò.”—Muf.]

Nzambi munanga, nyewù ntentekela mwanèètù wa bakàji byanza, ngèèla lutatù lwà mu mubidi wèndè kadyòmbò. Mu Dìná dyà Yesù Kilistò, swàku lùmuumùkè. Amen.

Àkubènèshè, mwanèètù wa bakàji.

Udi witabuuja ne mwoyi wèbè wònsò anyi? Mpèkaatù yèbè yònsò mmitonda anyi? Udi, bwà ku dyèbè dimanya, udi mudilongòlòle bwà kwakidila dyondopiibwa dyèbè anyi?

²⁰⁷ Nzambi munanga, nyewu ntentekela mwanèètù wa bakàji byanza, mu Dìná dyà Mwân'Èbè, Yesù Kilistò, ne ndòmba bwà ne lutatù lwà mubidi wèndè lwìkalè luumùke luyè, mu Dìná dyà Yesù. Amen.

Mpèkaatù yònsò mmitonda, ne wèwè ukàadi mudilongòlòle bwà dyondopiibwa dyèbè anyi? Udi witabuuja anyi, mwanèètù wa balùme? [Mwanèètù wa balùme awu ùdi wàmba ne: “Ndi ngiitabuuja ne mwoyi wanyì wònsò.”—Muf.]

²⁰⁸ Nzambi munanga, nyewu ntentekela mwanèètù wa balùme byanza, bu mutùdi bamanyè ne Wèwè udi kaaba aka, Mukalenge. Ndi ndòmba bwà Wèwè kumwondopa, mu Dìná dyà Yesù Kilistò. Amen.

Mpèkaatù yònsò mmitonda anyi? To, kwèna umvwa to. Udi witabuuja ne neúmvwè anyi? [Mwanèètù wa bakàji awu ùdi wàmba ne: “Ndi ngiitabuuja. Kàdi's ntu mpudimaci.”—Muf.] Udi witabuuja.

Mpindyewu mukàji ewu m'mpudimaci. Netùsambilè kaaba aka.

²⁰⁹ Nzambi munanga, ndi ndòmba bwà Wòndopèku mwanèètù wà bakàji, ne ùmuushèku bumpudimaci ebu. Mmusòmbe pa buloba bupàtàkàne, pàdiye kàyì mwà kuumvwa to. Ndi ndòmba bwà Ùmupèeshèku dyondopiibwa dyèndè, mu Dìná dyà Yesù.

²¹⁰ Nèndombè bantu bwà kulama mitu yàbò miinyika, katanci kakesè. Ndi muswè mmonèbi cidi cimwenzèkèle. Mpindyewu, bu nwènù mwà kuswà, mu Dìná dyà Yesù Kilistò, muntu nànsha umwe kajuulukù mutù anyi kàtábadi to. Mpindyewu, kanwèna ne cyà kwenza nànkù to too ne pàngàànwàmbilà bwà kucyenza.

²¹¹ Udi mwà kungumvwa mpindyewu anyi? [Mwanèètù wa bakàji awu ùdi wàmba ne: “Bikònyàngàle ndambù.” Mwanèètù Branham ùdi ùtuutakaja byanza musangu wùmwè. “Ndi mwà kuumvwa.”—Muf.] Udi unguumvwa anyi? [“Ndambù.”] Udi mwà kuumvwa anyi? Ùdi mwà kuumvwa mpindyewu. [Mwanèètù Branham ùdi ùtuutakaja kàbidi byanza.] Wamònu anyi? Udi umvwa mutooyi awu anyi?

²¹² Mpindyewu udi witabuuja ne mwoyi wèbè wònsò. Mmwòmò's? Wèwè witabuuja, apu Nzambi neàkusàngàjè mu kaabujimà. Mmùdiye mwambè. Ndi ànu mumusambidile ne mumutentèle byanza pa maci cyanààná, ne nyewù wàmbi ne ùdi mwà kuumvwa cintu kampànda. Eyo, tùngunukà ànu

cyanààna mpindyewu, witabuuja ne newikalè mwà kuumvwa bimpè menemene, nènku neúmvwè.

Mpèkaatù yònsò mmitonda anyi, mwanèètù wa bakàji? [Mwanèètù wa bakàji awu ùdi wàmba ne: “Èyo.”—Muf.] Udi mudilongòlòle bwà dyondopiibwa dyèbè anyi? [“Èyowà.”]

²¹³ Nzambì munanga, nyewù ntentekela mwanèètù wa bakàji byanza, bu mudibi ne mu twètù emu kamwèna cyà nsongo nànsha cimwè, munda mwètù twètù biinè emu. Kàdi tudi bamanyè ne tudi beena Kilistò, balediibwè kùdi Nyumà wa Nzambì. Nènku tudi tutentekela mwanèètù wa bakàji byanza ne tulòmba dyondopiibwa dyèndè, mu Dìna dyà Yesù Kilistò. Amen.

²¹⁴ Mpindyewu udi witabuuja ne newikalè mwà kuumvwa bimpè anyi? [Mwanèètù wa bakàji awu ùdi wàmba ne: “Bimpè.”—Muf.] Èyo, mpindyewu udi—udi mwondòpiibwè. Ki mùshindù wà kucyènga ngwòwò awu. Ncyà bushùwà. Bushùwà.

²¹⁵ Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Èyowà’s, mukalenge.”—Muf.] Ne wèwè udi mudilongòlòle bwà dyondopiibwa dyèbè anyi? [“Èyo.”] Udi witabuuja ne, ku ditentekelangana dyà byanza, Nzambì Udi mumanyè mwoyi yà bantu awu, neàkwondòpe anyi? [“Ndi ngiitabuuja.”]

²¹⁶ Taatù wetù wa mu Dyulu, ndi ndòmba bwà Wèwè kwondòpakù mwanèètù wa bakàji, patùdi tumutentekela byanza ne tulòmba mu Dìna dyà Yesù Kilistò bwà Ùmwondòpe apa. Amen.

²¹⁷ Wetwàwu! Mu bushùwà bwà bwalu, wèwè’s udi mumanyè ne mèmè ndi mumanyè cìdi cikutàcisha. Kàdi ncyèna ànu ncyàmba to; bwalu, wèwè mucyamba, neciikalè—neciikalè citungùnùke ànu kutungunuka. Kàdi bu wèwè mwà kuswà...Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Èyowà’s, mukalenge.”—Muf.] Ne udi witabuuja ne Nzambì neàkusàngàjè anyi? [“Èyowà’s, mukalenge.”] Udi witabuuja ne binyòka abi . . . Ngààmanyi kucyàmba’s.

Nzambì munanga, ndi ndòmba bwà Ùmwambùlwishèku ne ùmwondòpè. Enzàku nànkù, mu Dìna dyà Yesù.

Kwàkucibukila panshì to. Ndààku, witabuuje ne mwoyi wèbè wònsò.

²¹⁸ Udi witabuuja ne Nzambì neàkusàngàjè anyi? [Mwanèètù wa bakàji awu ùdi wàmba ne: “Amen.”—Muf.] Mpèkaatù yònsò mmitonda ne udi mudilongòlòle bwà dyondopiibwa dyèbè anyi? Udi witabuuja ne nyimà wèbè awu neàsangalè anyi?

Taatù wa mu Dyulu munanga, ndi ndòmba bwà Ùmwondòpèku ne ùmusàngàjè. Mu Dìna dyà Yesù Kilistò, biikalèku nànkù. Amen.

Nzambi àkubènèshè, mwanèètù wa bakàjì. Ndààku, mwikàle witabuuja mpindyewu.

Mpèkaatù yònsò mmitonda anyì, mwanèètù wa bakàjì, udi mudilongòlòle bwà dyondopiibwa dyèbè anyì?

Nzambi munanga, mpèkaatù yèndè, mùdiye wàmba, mmitonda. Nyewù ntentekela mukàjì ewu byanza, mu Dìna dyà Yesù Kilstò, ndòmba dyondopiibwa dyèndè. Amen.

²¹⁹ Mpèkaatù yònsò mmitonda anyì? Udi ne cyà kwamba bulelèlà, udi usaama bikolè, bwà aci's udi mumanyè. Udi mumanyè ne mémè ndi mumanyè cidi cikutàcisha aci. Kàdi udi witabuuja ne Nzambi neàkusàngaje, kwondopa mwoyi wèbè ne kukusàngaja mu kabujimà anyì?

Nzambi munanga, ndi ndòmba ne mu Dìna dyà Yesù Kilstò, Wèwè ùmwondòpèku ne ùmusàngàjè. Swàku bwà eci cimuumùkè, Taatù, mu Dìna dyà Yesù. Amen.

Nzambi àkubènèshèku mpindyewu. Kwèdikù mpatà to. Ndààku, mwikàle witabuuja.

Mpèkaatù yònsò mmitonda anyì? Udi mudilongòlòle bwà dyondopiibwa anyì?

Taatù wa mu Dyulu munanga, nyewù ntentekela mwanèètù wa bakàjì byanza. Mu Dìna dyà Yesù Kilstò, swàku bwà òndopiibwè. Amen.

Kwèdikù mpatà to. Ndààku, mwikàle witabuuja.

Mpèkaatù yònsò mmitonda, udi mudilongòlòle bwà dyondopiibwa anyì?

²²⁰ Taatù wa mu Dyulu munanga, ndi ndòmba bwà Wòndòpèku mwanèètù wa balùme, ùmusàngàjè. Enzàku nàнку, Taatù. Nyewù mmutentekela byanza, mu kiipàcilà aka, mu Dìna dyà Yesù Kilstò. Amen.

Nzambi akubènèshè. Ndi ncìitabuuja ne mwoyi wanyì wònsò.

Udi witabuuja mpindyewu anyì, mwanèètù wa bakàjì? Mpèkaatù yònsò mmitonda ne ukàadi mudilongòlòle bwà dyondopiibwa anyì?

Nzambi munanga, nyewù ntentekela mwanèètù wa bakàjì byanza, mu Dìna dyà Yesù Kilstò, swàku bwà òndopiibwè bwà butumbi Bwèbè. Amen.

²²¹ Mpindyewu ànu misangu yàbúngì nàнку awu, ànu dilenga cyanààna, mwàkambà Yesù amu ne: “Bimanyinu ebi nebìfilè bàdi bìitabuujà. Bòbò batentèkéle babèedi byanza.” Ndi mubangè kumòna ne, mu masangisha, cidi cifulà bipeta bimpè ne byà lukàmà makùmi àtaanu kutàmba mùtùbi byènta paùdi ubiikila bantu mu mulongo, wenza dijingulula, bwalu udi ufika ànu ku bantu bakesè cyanààna. Kàdi, ewu mùshindù wòwò, kùdi bààbúngì batámbe bòndopiibwa.

222 Ùkààdi mutondè mpèkaatù yèbè yònsò yà bupidyà ne bikwàbo byònsò anyi? Udi witabuuja mpindyewu ne newòndopiibwe anyi? [Mwanèètù wa bakàji awu ùdi wàmba ne: “Èyo, ne musùngìdiibwe.”—Muf.]

Nzambi munanga, ndi ndòmba bwà Wòndopèku mwanèètù wa bakàji ewu pàndi mumukwàte ku byanza ne ndòmba mu Dìna dyà Yesù Kilstò bwà dyondopiibwa dyèndè apa. Amen.

Nzambi àkubènèshè, mwanèètù wa bakàji.

Udi witabuuja mpindyewu anyi? [Mwanèètù wa bakàji awu ùdi wàmba ne: “Èyowà.”—Muf.] Mpèkaatù yònsò mmitonda anyi? [“Èyowà.”]

Nzambi munanga, nyewù nntetekela mwanèètù wa bakàji byanza, mu Dìna dyà Yesù Kilstò, bwà dyondopiibwa dyèndè. Amen.

Nzambi àkubènèshè, mwanèètù wa bakàji.

Cìdi cìmwèka ànu kantu kakesè menemene, kàdi Nzambi ngWàkacilaya.

Mpèkaatù mmitonda anyi?

Nzambi munanga, ndi ndòmba bwà Wòndopèku mwanèètù wa bakàji ewu. Pàndi mmutentekela byanza mu Dìna dyà Yesù Kilstò apa, swaku bwà àye musàngàle. Amen.

Mpèkaatù mmitonda anyi?

Nzambi munanga, ndi ndòmba bwà Wòndopèku mwanèètù wa bakàji ewu, pàndi mmutentekela byanza apa, mu Dìna dyà Yesù Kilstò. Amen.

Mpindyewu paùdi ulwa ne byamù bilamakaja apu, swàku bwà bidituutè ku bukolè bwendeshi, nebikwatè mudimu’s.

Mpèkaatù mmitonda anyi? [Mwanèètù wa bakàji awu ùdi wàndamuna—Muf.] Ùkààdi mudilongòlòle.

Nzambi munanga, ndi ndòmba bwà Ùmwondòpèku ne ùmusàngàjè, mu Dìna dyà Yesù Kilstò. Amen.

Nzambi àkubènèshè, mwanèètù wa bakàji.

Mpèkaatù yònsò mmitonda anyi? [Mwanèètù wa bakàji awu ùdi wàmba ne: “Byònsò.”—Muf.]

Nzambi munanga, pàdi mukàji ewu muntàngile mwísù apa, ndi ngiitabuuja nàнку. Ndi ndòmba bwà Ùmwondòpèku, mu Dìna dyà Yesù.

223 Udi mulwè ànu kumufila cyanàànà, kí mmwòmò anyi, mwanèètù wa bakàji? Udi mulwè ànu kumufila cyanàànà’s? Èyo. Udi witabuuja, mwanèètù wa bakàji, ne Nzambi neàkusàngàje anyi? [Mwanèètù wa bakàji awu ùdi wàmba ne: “Ndi ngiitabuuja ne Nzambi mmufwànyineku kumpèèshulula lumònu lwànyi.”—Muf.] Nzambi àkubènèshè.

²²⁴ Taatù wa mu Dyulu, Wèwè utu misangu yònsò ànu ne luse kùdi mpofo, ne kùdi bàdi mu lukèngelu. Mpindyewu bàmònu ciWénji dilòlòlò edi eci. Pa nàнку tudi twitabuuja, Mukalenge, ne cimanyinu cinènè cyà ndekeelu cidì munkaci mwà kukwàta mudimu munkaci mwètù mpindyewu eci. Ndi ndòmba bwà lumònù lwà mukàji mpofo ewu lumwalùkidilè, mu Dîna dyà Yesù Kilistò. Amen.

Mpindyewu, watùtùminakù mulubù mpindyewu. Watùtùminawù.

[Mwanèètù wa bakàji kàmpàndà ùdi wàkula ne Mwanèètù Branham—Muf.] Kaa, èyowà's, udi witabuuja ne Nzambi neàkondòpè anyi? ["Alèluuyàh!"]

Taatù wa mu Dyulu munanga nyewù ntentekela mwanèètù wa bakàji ewu byanza ne ndòmba bwà Ùmwondòpèku, mu Dîna dyà Yesù Kilistò. Amen.

Nzambi àkubènèshè, mwanèètù wa bakàji. Watùmanyishakù muwikalà—muwikalà mudyùmvwè.

Udi witabuuja anyi, mwanèètù wa bakàji? [Mwanèètù wa bakàji awu ùdi wàmba ne: "Èyowà, ndi ngiitabuuja."—Muf.]

Éyi Taatù wa mu Dyulu munanga, nyewù ndòmba bwà mwanèètù wa bakàji, mutwishibwe ne Wèwè neùmwendòpè mpindyewu. Nyewù mmutentekela byanza, mu Dîna dyà Yesù Kilistò.

Mpindyewu itàbùùjà. Ncyà bushùwà. Ndààku ànu cyanààna, mwikàle witabuuja.

Udi witabuuja anyi, mwanèètù wa balùme? [Mwanèètù wa balùme awu ùdi wàmba ne: "Èyowà."—Muf.] Mpèkaatù yònsò mmitonda anyi?

Nzambi munanga, ndi ndòmba bwà Wòndopèku mwanèètù wa balùme ne ùmusàngàjè, mu Dîna dyà Yesù Kilistò. Amen.

Udi witabuuja anyi, mwanèètù wa bakàji?

²²⁵ Éyi Nzambi, ndi ndòmbakù ne, mu Dîna dyà Yesù Kilistò, mu kudipwekesha, mu kalolo kònsò ne bupòlè byà pa dibà edi, swàku bwà Nyumà Mwîmpè àsangàjè mukàji ewu mu kaabujimà. [Mwanèètù wa bakàji awu ùdi wàmba ne: "Ndi ndòmba kàbidì ne, ùsambidilèku mwanàanyi wa balùme. Ncyèna mumumòne to kukàadi bidimu makumi àbidì."—Muf.] Ndi ndòmba bwà Nzambi àkutùmine mwanèèbè wa balùme awu, mwanèètù wa bakàji, munanga. Nzambi àkubènèshè.

Taatù munanga, ndi ndòmba bwà mwanèètù wa bakàji ewu. Mu kalolo kàà Nyumà Mwîmpè, swàku bwà Àlwe mpindyewu ondopè mwanèètù wa bakàji ewu, mu Dîna dyà Yesù. Amen.

Àkubènèshèku, mwanèètù wa bakàji.

Nzambì munanga, ndi ndòmba bwà mwanèètù wa balume, pàdiye mwimàne mwaba ewu ne mèmè mumutentèkèle byanza apa, ne ndòmba bwà dyondopiibwa dyèndè, mu Dîna dyà Yesù.

Àkubènèshèku, mwanèètù wanyi wa balùme. Èyo.

Mwànà mukesè wa balùme?

Nzambì munanga, pândi ntentekela mwànà mukesè ewu byanza apa, ndi mmubènesha mu Dîna dyà Yesù Kilistò, bwà dyondopiibwa dyèndè.

Udi witabuuja mpindyewu anyi, mwanèètù wa bakàji? [Mwanèètù wa bakàji awu ùdi wàmba ne: “Èyowà.”—Muf.] Udi pèèbè muswe bwà nkusambidilè anyi?

²²⁶ Nzambì munanga, nyewù mmusambidila, pândi mumutentèkèle byanza apa. Mpindyewu, eci’s mmudimu Wèbè mutùtùma naawù, eci’s ki ciWàkambà bwà kwenza ne: “Bimanyinu ebi nebifile bàdi biitabuuja. Bòbò batentèkèle babèèdi byanza, babèèdi nebàsangalè.” Wèwè ngwàkacyàmba, Mukalenge. Amen.

Mpindyewu, Yèyè ngwàkacyàmba, kî mmwòmò anyi? Bikèngela biikalè mshindù awu, mwanèètù wa bakàji.

Nzambì munanga, ndi ndòmba bwà Wòndopèku mwanèètù wa bakàji ewu ne ùmusàngajè, mu Dîna dyà Yesù Kilistò. Amen. Nzambì àkubènèshè, mwanèètù wa bakàji.

Udi mulwè mwikàle witabuuja anyi, mwanèètù wa bakàji?

²²⁷ Taatù wa mu Dyulu munanga, ndi ndòmba mabènesha Èbè pa mwanèètù wa bakàji, mwikàle ànu ntùmikila ciWàkambà bwà kwenza aci. Wèwè wàkamba ne: “Bimanyinu ebi nebifile bàdi biitabuuja. Bòbò batentèkèle babèèdi byanza,” Wàkamba ne: “nebàsàngalè.”

²²⁸ Swayi ngiimanèku ndambù kaaba aka, bwà kwambaku mu cyòci eci, ànu bwà kulekelakù bantu biikishèku katancì, ànu bwà katancì kakesè cyanààna. Mudyudi kampàndà, wàkangambila musangu kampàndà ne, kacyèna nàngu to. Kàdi, nudi numòna’s, Yèyè wàkamba ne: “Bimanyinu ebi nebifilè.”

²²⁹ Nukàadi bumvwè Diyiisha dyànyì pa *Dilumbulwisha*, batèèke Yesù ku dilumbulwisha. Nwamònu’s, Yèyè wàkambila Noà ne: “Mvùla neàlokè.” Mvùla kàakalòkakù to munda mwà bidimu lukàmà ne makùmi àbidì, kadi’s nanshà nàngu wàkalòka. Kwambila Yè Abraham ne ùwà mwà kupetele mwànà kùdi Sarah. Kwenzekaci bidimu makùmi àbidì ne bitaanu pashiishe. Yèyè kàvwakù mwambè ne ndìbà kaayi to. Wàkamba ànu ne bàvwà mwà kupeta mwànà wa balùme. Bidimu makùmi àbidì ne bitaanu pashiishe, kwenzekaci. Nwamònu’s, Yèyè kàvwakù mwambè ne ndìbà kaayi to.

²³⁰ Yèyè wàkamba ne: “Disambila dyà diitabuuja nedisungilè mubèèdi. Nzambì neàmjuulè panshi. bòbò batentèkèle babèèdi

byanza, babèèdi nebasangalè.” Ki cyakambàYe anyi? Yèyè kàakamba ne nebàtupikè e kusangala ànu piine apu to. Wàkamba ne: “Nebàsangalè.” Nwamònu’s, ki mulayi Wèndè ngwòwò awu. Ki citùdi twètù twitabuuja ncyòci aci.

Lwàku, mwanèètù wa bakàji. Udi witabuuja ne aci ncilelèlè anyi? [Mwanèètù wa bakàji awu ùdi wàmba ne: “Èyowà, ndi ngiitabuuja.”—Muf.] Dìbà adi kakwèna mùshindù wa kukupangisha kwondopiibwa to.

Ndi ntentekela mwanèètù wa bakàji byanza, mu Dìna dyà Yesù Kilstò, bwà dyondopiibwa dyèndè. Amen.

Udi witabuuja anyi, mwanèètù wa bakàji? [Mwanèètù wa bakàji awu ùdi wàmba ne: “Èyowà.”—Muf.] Mpèkaatù yònsò mmitonda, ne wèwè mudilongòlòle anyi?

Nzambi munanga, nyewù ntentekela mwanèètù wa bakàji byanza, mu ditùmikila dyà díyì Dyèbè ditùma, ne ndòmba dyondopiibwa dyèndè, mu Dìna dyà Yesù. Amen.

²³¹ Ndi muswè bwà nwènú bàdibo bàsambidila abu, ndi muswè bwà nùngaanyishilèku bwalu kampànda. Ndi muswè bwà nwaflakù bujaadiki, kumpàlà kwà masangisha aa kujikawù, bwà cìdi cyènzekà; ne nwènzèku ànu bwà ne batèèleji, bantu bakwàbo abu, bàmonè cìdi cyènzekà bulelèlè. Pàmwàpa mààlabà, ditùkù dyàlondà, anyi ní ndìbà kaayi, nwatàngilàayi ànu cìdi cyènzekà aci.

²³² Mikàndà yìndi mpeta mmileejè ne mbi—mbishùilangàne bikolè kutàmba byà kubàlekela ànu batèèta, bàpima diitabuuja dyàbò sungasunga cyanààna. Bwalu, Yesù wàkamba ne: “Bàdi bàbàtentekela byanza. Bàdi bàbàtentekela byanza, babèèdi nebasangalè.” Mpindyewu ikàlaayi bumvwè cyakambàYe aci. Kàakamba ne nebàtupikè bànyeemakananganè eku ne eku bàya muulu bààlukila nànsha. Mbafwànyine kwenza nàнку. Kàdi Yèyè wàkamba ne: “Nebàsangalè.” Ki cyakambàYe anyi? Ki cyakambàYe ncyòci aci. Ki cìndi mèmè ngiitabuuja. Ne Yèyè ùdi kaaba aka mpindyewu, Yèyè wàkamba Díyì awu ùdi kaaba aka bwà kucyènza nàнку.

Wèwè udi witabuuja anyi, mukalenge? [Mwanèètù wa balùme awu ùdi wàmba ne: “Amen.”—Muf.]

Taatù wa mu Dyulu munanga, mwimànyine pa dijìkula dyà diitabuuja dyèndè ne mwikàle wìtabuuja, Nyewù mmutentekela byanza, mu Dìna dyà Yesù Kilstò, bwà dyondopiibwa dyèndè.

Nzambi munanga, nyewù ntentekela mukàji ewu byanza, mu Dìna dyà Yesù Kilstò, bwà dyondopiibwa dyèndè. Èyo.

Taatù munanga, nyewù ntentekela mukàji ewu byanza, mu Dìna dyà Yesù Kilstò, bwà dyondopiibwa dyèndè. Wèwè wàkamba ne: “Mukàji ewu neàsangalè.”

Udi mudilongòlòle bwà dyondopiibwa anyi, mwanèètù wa bakàji?

Nzambì munanga, nyewù mmutentekela byanza, mu Dîna dyà Yesù Kilistò, bwà Wèwè kumwondopa.

Èyo, mwanèètù wa bakàji, munanga, byònsò mbilongolola bwà dyondopiibwa anyi? Diitabuuja dyèbè dyashùishi mpindyewu kukùmbana, udi witabuuja ne neùmvwè bîmpè anyi?

²³³ Nènku, Nzambì, nyewù mmutentekela byanza, bwà kutùmikila dîyì Dyèbè ditùma ne: “Pa buloba bujima, kùdì cifùkùlìbwà cyònsò.” Nyewù mmutentekela byanza, mu Dîna dyà Yesù, bwà dyondopiibwa dyèndè.

Nzambì munanga, nyewù ntentekela mwanèètù wa balùme byanza, mu Dîna dyà Yesù Kilistò, bwà dyondopiibwa dyèndè.

Nzambì munanga, nyewù ntentekela mwanèètù wa bakàji byanza, mu Dîna dyà Yesù Kilistò, bwà dyondopiibwa dyèndè.

[Katùpà kàà mukàbà wà mēyì munda mutupù—Muf.] . . . mpweka ne kajila aku. Ncivwa ànu muswè kunùtàcisha to. Neùsàngalè bu wèwè mwà kwitabuuja aci mpindyewu.

Nzambì munanga, ndi ndòmba bwà Wòndopèku mwanèètù wa bakàji, mu Dîna dyà Yesù Kilistò. Amen.

[Katùpa kàà mukàbà wà mēyì munda mutupù—Muf.] . . . kungambulwishakù bwà kasambidila bantu aba.

²³⁴ Mpindyewu tudi ne ndambù wa mishwàlà mwab’ewu, ne bikwàbò, mwómò emu, byà kusambidila. Nènku ndi muswè bwà nwènu kutùngunuka ne kusambila pàmwe naanyi mpindyewu, mpindyewu, tubùkì tukesè etu, mpindyewu. Ndi mumanýè ne eci cìdì cimwèka cyà pabwàcì menemene kùdì bantu bwà kusambidila kaacintu kakesè bu nùнку ewu. Kàdì bu wèwè ànu mwà kubwela mu birò byànyì, musangu kampàndà, ne kutàngila ànu cyanàànà’s wè. Bu twikalakù balamè majaaniki à mu bidimu byònsò ebi, ngeela meeji ne kanùvwa bafwànyine kwikala bayitentàkàje yònsò pa cibumbà cyà ku cyambilu eci to, yà bàdì bondopiibwe ànu ku ditùminangana dyà tulàmbà tusambidila etu mùshindù ewu, mìliyò mijimà, pa buloba bujimà. Mpindyewu, nudi bamanyè ne ncinyì—ncinyì aci anyi?

Kampàndà ùdi wàngacila nsongà awu—awu mushwàlà awu . . . Neùmanyè mushwàlà wèbè, kì mmwómò anyi, mwanèètù wa balùme? Èyo.

²³⁵ Ne mémè nkààdikù mumòne bânà bakesè, bàà bikalàbà bondopiibwe. Nènku nudi numòna’s, cidìci’s, cidi ànu mmwaba wà dipetangana cyanàànà, mùvwà Oral Roberts ne ciibidilu cyà kwamba’s. Mmwaba nàka wà dipetangana. Tudi tusambila. Mpindyewu, katwena tudyènzela eci mu twètù to, tudi tucyènza bwalu Bible mmutùtùme ne mudimu wà dicyènza. Tudi bònsò bamanyè ne aci ncilelèlà.

²³⁶ Mpindyewu, kùdì bantu bààbùngì bàdì bàlaabà mishwàlà maanyi, ne bikwàbò. Èè, mpindyewu, tudi twela meeji ne abi

bìdi ànu bîmpè, cyà bushùwà's, kàdi bu twètù ànu . . .Bible kí mmwambè ne bàvwa “beela maanyi” pa mishwâlà to.

237 “Kàdi bàvwa bàngata mishwâlà pambidi pàà Pòlò.” Mpindyewu nudi numòna cîmvwà ngamba aci anyi? Mpindyewu, cîvwàbo bamòne, bukolè bufùùluludi bùvwà munda mwà Pòlò abu, ki kumanyabò ne ùvwa musadidi wa Nzambì. Bàvwa bamanyè ne Nzambì ùvwa munda mwèndè. Bàvwa bamanyè ne byònsò bìvwàye mulengè bìvwà bibèneshiibwe. Mbanganyi bàdi bûmvwa nànkù? Ambàayi ne: “Amen.” [Disangisha dìdi dyàmba ne: “Amen.”—Muf.]

238 Nudi numòna's, ngeela meeji ne Pòlò ùvwa ànu mu Mifùndu mu bìvwàye wénza. Kanwènaayikù nwela meeji nànkù anyi? Nudi baswè bwà nmwàmbilè kùndi ngeela meeji ne nkwaikapetèlàyè lungènyi lwà dicyènza anyi? [Muntu kampàndà ùdi wàmba ne: “Kùdì Elishà.”—Muf.] Kùdì Elishà, ncyà bushùwà. Nwamònu's, Eliyà wàkamba ne: “Angàta dikombo edi ùye kaditenteka pa mwànà awu.” Nenku mupròfètà wàkatùma dikombo bwalu ùvwa mumanyè ne cintu cyònsò cìvwàye mulengè cìvwa cibèneshiibwe. Ùvwa mumanyè kaaba kèndè. Yèyè . . . bu yèyè ànu mwà kufikisha mukàji awu ku diitabuuja cintu cimwècimwè aci.

Mpindyewu nwamònu's, mpindyewu, kacya Bible kàtukù mwambè ne: “Nebàsambidilè babèèdi to.” Mmwambè ne: “Nebàtentekèlè babèèdi byanza.”

239 Mpindyewu anjì elàayibì meeji, bantu bààkamòna, mu mùpostòlo Peetèlò, Bwikadi bwà Nzambì bumwèneshiibwe mu muntu ewu, mu mùshindù wà ne bôbò—bôbò bààkalaadika mene ne bantu mu mundidìmbì wèndè, ne bantu abu kwondopiibwabò. Mbanganyi bàdi bamanyè ne aci ncyà mu Mifùndu? Aci's m'Mufundù menemene ànu mùdì Yone 3:16 amu. Nwamònu's, byònsò abi's n'Diyì dyà Nzambì. Mpindyewu, bantu abu, s'nudi bamanyè ne mundidìmbì wà muntu awu kí ngùvwà wòndopa bantu.

240 Kàdi, tàngilàayi, pìikalàbi ne bukolè bwà Nzambì bùvwà pa mupròfètà awu, munda mwà bidimu ne bidimu paanyimà pàà yèyè mumanè kufwà, mu mùshindù wà ne muntu wetù ewu mufwè bamwimànshe pa mubidi wèndè, mifùbà yèndè. Mubidi kawùciyipù mene to; mifùbà nyìvwàpu. Kàdi Bwikadi bwà Nzambì mbùvwà pa mifùbà ayi, mu mùshindù wà ne muntu mufwè awu wàkaalukila ku mwoyi.

241 Mpindyewu kanwènaayikù bamanyè ne Nzambì umwèumwè wàkenza bintu byònsò abi awu ùdi mwab'ewu dilòdòlò edi anyi? Bwà—bwànyì mèmè, ndi ngeela meeji ne bìvwà bikèngela bwà twètù kwikala bantu bàà disànkà ditàmbe pa buloba bujimà. Anjì elàayibì meeji ku bwalu ebu.

242 Ndi—ndi ntèkemena ne ncyèna mukèmèshe batèèleji bàanyi bwà kwitabuujabò ne ncintu cìndì mèmè mwinè ndyènzela to.

Nudi—nudi bamanyè bîmpè kutàmba aci. Mêmè, ndi mwanèènu wa balùme, nwamònu's, ne ndi ànu mwanèènu cyanààna.

²⁴³ Kàdi ndi cyà bushùwà mumanyè, ndi cyà bushùwà mumanyè eci ne, Nzambì ùdi kaaba aka. Ne ndi mumanyè ne Yéyè mmutùpèeshe cintu kampànda, citùdi katùyi mwà kuumvwija to, ànu ku Dìyì dyà Nzambì, dìdì dyàmba ne bìvwa bìkèngela kwikalaci apa pa dîbà edi. Pa nàнку, cidi kàbìdì citùpèesha dimanyishiibwa bwà kumanya ne tudi ne mwoyi mu matùkù à ndekeelu. Cidi citùpèesha dimanyishiibwa bwà kumanya ne bantu aba, basungula, basòbola, babìkidiibwe bwà kupàtuka, badyànjila kulongolola aba . . .

²⁴⁴ Mpindyewu, aci's mmwakù munène, *didyànjila-kulongolola*, kàdi tudi bònsò bamanyè ne mbulelèlè. Tudi bamanyè kakùyi mpatà to ne Nzambì udi kàyi mikàlù awu wàkadyànjila kulongolola bintu byònsò ku didyànjila-kumanyà kumpàlà kwà difukà dyà dyulu ne buloba, nànsa Mwànà wa mùkòòkò mwinè wàkashiibwa; ne dîna dyònsò divwàku mwà kwikala mu Mukàndà adi, dyàkafundiibwa mu Mukàndà kumpàlà kwà Mukàndà awu kufundiibwawù. Mpindyewu mbanganyi bàdi bamanyè ne aci ncilelèlè?

²⁴⁵ Nèнку Yesù wàkalwa bwà—bwà kupikula aba bàvwà mu Mukàndà. Mu Bible, Mwànà wa mùkòòkò wàkalwila paanyimà pàà cilùlù cikùdika, ne kwangata Mukàndà ne kukàngula Bitampì bìvwàWu mukànga naabi abi, bwalu Wàkalwa bwà kunana bònsò bàkààvwàYe mupikùle abu. Yéyè ùdi Mwakwidyanganyi mpindyewu, Mwakwidyanganyi mwikàle wàkwila aba bàdiYe mupikùle. Yònsò mwena dîna dyàkafundiibwà mu Mukàndà wà Mwoyi wà Mwànà wa mùkòòkò awu, wàkapikudiibwa.

²⁴⁶ Ànu mùmvwà mwambè dîyì dikesè dyà dikàyàbale dilòòlò adi . . . Ndi mwindile . . . mishwàlà yònsò eyi mwab'ewu. Ncyèna ànu nteeta bwà kuyiisha kàbìdì to, kàdi ngàmbì ne kùvwa dîyì dikesè . . . Ndi ntèkemena ne eci kacýèna cyùmvwika bu cyà cinyangakaja cijila to, nwamònu's. Kàdi ànu mùvwà cidimè wàkatèeka nzòòlò wa cikuka mu ciswa, kàdi kàyi ne mayi bùngì bukùmbàne to, ki kupetayè dîyì dyà mukankù, e kuditéekelayè nzòòlò wa cikuka awu nèнку yéyè kutooya mukankù. Kàdi kàvwa kalùmyàna kàà pabwbwàkù munkaci mwà tuzòòlò twnsò atu, bwalu katùvwakù tùmòna bintu mùshindù wà mwomùmwe to. Kàdi aci ki cyònsò cìvwàku pààkù kamòne, cìvwa nznòòlò wa cikuka awu. Kàvwa kùmvwa ànu dîyì kampànda, kadìyi dyùmvwika bu dyàkù kòkò adi to. Anyì kakàvwa mwà kupàtula dîyì bu dyà nzòòlò wa cikuka awu anyì tuzòòlò atu to. Kakàvwa kàànyisha byàdidyà byàtù abi to, pàvwàtu tùdiila mu lupangu lwà nzòòlò amu apu. Kùvwa cintu kampànda cyà cishiilàngàne mu kòkò, kadi kakàyi kamanyè ne dishiilàngana divwa cinyi to.

247 Ki pashiishe dîngà ditùkù, kùvwa maamù mukankù kampànda uvwa mumanyè ne ùvwakù mwelè mayi búngì kampànda. Ne kùvwa òmwè dyà ku mayi awu, òvwa ne cyà kwikala kànà kèndè kà balùme, òvwa dipangike. Ki kuyayè wènda ùkèbangana naakù, kàdi kukàanganayè mu lupangu lwà nzòlò amu. Ki kwelayè lubilà lukolè. Ne pàakeelàye lubilà lukolè alu, kànà kàà mukankù aku kumanyakù díyì dyà maamù adi. Bu mwàkambà Yesù ne: “Mikòòkò Yànyì mmimanyè Díyì Dyànyì.”

248 Ngeela meeji ne, makèlèlè dilòlò, pàmvwà mumòne muyiiki wà ku tèlèviziyò wà ba-Baptistes, ba-Presbytériens, ne bakwàbò awu, bàvwa bafwànyine kwikala batooyishila mwinshi mwà nzòlò wa cikuka. Ùmfwilèku luse, wèwè mwanèètù wa balùme, wamònu’s. Kàdi Maamù ùvwa mumanyè ne Ùvwa ne bananga Bèndè mwómò amu mwaba kampànda. Pa nànkù bantu abu biimàne mwab’awu, kabàyi bàlwishaa byàkudyà bìvwàbò bàpeta kùdi maamù cikuka awu to, ne bikwàbò, kàdi mpindyewu bòbò mmikankù, nudi numòna’s, yìdi yìbùùka bwà kakèba byàkudyà byànyì. Nwamònu anyì?

249 Nènku ngeela meeji ne èkèleeziyà ùdi bu cyalu cìmvwà mumòne ànu matùkù mashàale aa, pàmvwà ndwa mfùmina ku Tucson, anyì mfùmina ku—ku Phoenix, mutàngile ku Tucson. Mémè kumòna cintu cyà kaciyi cyùmvwika to. Kàdi kwenzaci bu cimbandè mwoyi, pa kumòna cìvwà cyenzèke, mùvwà... kabemba, kàsòmbèèlè kàbùùka mu mpeepèlè aku’s, mwanààbò ne mukankù, wùdi cìfwànyikijilu cyà èkèleeziyà awu.

Ne Yèhowàh ùtu m’Mukankù. Wakabiikila bapròfetà Bèndè ne m’“mikankù.” WàkaDibiikila Nyéyè mwine ne, Yèhowàh, “Mukankù.”

250 Kàdi kabemba aka kàkaadi kajimije dimanyishiibwa dyàkù kùkaadi ntàntà mule, bwalu kakàcyèna kàbìdi kèndela mu mpeepèlè kènda kàkèba cyàkudyà cyàkù mùvwàku ne cyà kwikala kàkèba to. Kàdi kakaadi kasòmbè pa nshinga yà tèlèfonè ne kènza maalù bu cidy’á bibolè. Kàdi—kàdi kènda kakèbangana ne tùlulù tufwè tùdi tushipa ku màshinyì, ne kòkò ne nkùmbikùmbi bìdi bìpàtuka bikadiila pàmwè. Kàdi kàtùpika bu nkùmbikùmbi, pamutù pàà kwendakù mùvwàbì bikèngela bwà kòkò kwenda. Nkàjimije dimanyishiibwa dyàkò.

251 Kàdi ndi ngamba eci ne dinanga dyònsò dyà difwanà dyà Nzambi ne kaneemu ne, èkèleeziyà mmujimije dimanyishiibwa dyèndè bu mwanèètù wa bakàjì mukankù kùkaadi ntàntà mule. Mmusòmbè pànshì. Pamutù pàà kwondola mu Díyì bwà kujandula maalù aa nì ngàà bushùwà, mmwindile mushiki wà mikànda yà kubala yà kalaasà kàà Dyàlumingu yìdi mikwàtakaja kùdi musùmbà wà beena mamanya a mu mitù mu mwaba kampànda, kàlulù kampànda kafwè kàà kashipeela mu mungà mwaba. Ùtùpika bu nkùmbikùmbi!

Nzambi àtùkwàcishèku bwà twètù kubùuka kuya kule ne cyòci aci.

Milayi eyi mmilelèlà. Kí ncidi muntu kampànda mwambè pa Cyòci aci to, kàdi cidì Nzambi mwambè bwàyi yòyi! Mmìlèlèlà. Ndi ne disànkà dngì bwà kwikala muswìkàkàne ne mikankù.

Tùsambilàayi pàmwè bwà babèèdi bèètù.

²⁵² Taatù wa mu Dyulu munanga, mbilongèshùbwe mu Bible ne bàvwa bàngata mishwàlà ne tulùlù, ku mubidi wa Pòlò, ne démons yivwa yipàtuka munda mwà bantu, ne nyumà, ya bukooyà yivwa yibàshìya. Mpindyewu, Taatù, mémè mwimàne mwaba ewu pa mishwàlà eyi, ndi ndeeja mpàla wa muntu yònsò ùdi kaaba aka. M'Mubidi wà Kilistò, twètù bònsò pàmwè. Tudi twamba, ku ngàsà ne dinanga ne, tudi kaaba aka bwà kuleeja mpàla wa Mukàj'Èndè-musela, ne biikàle twitabuuja, bàswìkàkàne Nendè mu Bukalenge Bwendè. Ne tudi bamanyè ne twètù katwèna Pòlò Munsantu to, kàdi tudi bamanyè ne Wèwè uci di ànu Yesù.

²⁵³ Nènkù tudi tulòmba bwà Wàtwakù mushinga diitabuuja dyà bantu aba. Bu ne bàvwa ne mwoyi kale mu matùkù à Pòlò, nùnkù mbatèlèlje Èvanjeeliyò umwèumwè ewu, bamòne bintu bimwèbimwè ebi. Ki bwà cinyi, bóbò mbantu bàà mùshindù wùmweùmwe awu. Wèwè udi Nzambi umwèumwè awu. Pa nànkù ndi ndòmba, Nzambi Munanga, bwà Útwèkù diitabuuja dyàbò mushinga, ànu muWàkatwà dyà bóbò abu mu matùkù à Bible. Nènkù swàku bwà bukolè bwònsò bwà démon, bubèèdi bwònsò, lutàtù lwònsò, bidì biswìke bantu bàdi mishwàlà eyi ne mabuki bileeja kaaba aka, swàku bwà bukolè bubì bwà bubèèdi abu bùbùmùkè.

²⁵⁴ Bààkamba, musangu kampànda ne, Izalèlèlà ùvwa wènda ùya mu njila wa mudimu, mutàngile ku buloba bulaya. Kàdi ànu mu njila wa mudimu mene amu, mwena lukunà kulwa e kubàcìncimikila mu ditumba kampànda, ne Mbù Mukùnze kubàcyàmakanayè mu njila wa mudimu amu, ne mu lwendu lwàbò alu. Ki Nzambi mu maulu kutàngilaYè panshi, mutàngidile mu Dikunji dyà Kapyà, ki mbù kukwàcikayè bwòwà. Kwalujayè mavwala èndè awu cyànyimà, bwalu mavwala à Nzambi àvwa mwìnshì mwà mbù amu. Ki kusebeelaDi bânà Bèndè njila, bàvwa bènda bàya mu njila wa ditùmikila abu.

²⁵⁵ Mpindyewu, Nzambi, pìikalabi ne Mbù Mukùnze wàkakwàcika bwòwà, ne kwaluja mavwala èndè cyànyimà, kwaluja màyi èndè cyànyimà, kushìlèlà bânà bàvwa mu lwendu bèndela mu ditùmikila abu mwaba; Nzambi munanga, dilòòlò edi, pwekèshèlàku mèsù mu Mashì à Mwân'Èbè, Yesù, Uvwa mufìle mulayi awu. Nènkù pàatèèkiibwà mishwàlà eyi pa mibidi yà bantu yidi yisaamà ayi, swàku bwà mèsù à Nzambi àtangilè, ne bubèèdi abu, démon awu, àkwacikè bwòwà ne

ùmukè àye. Nènku swàku bwà bantu bàtungunukè ne lwendu too ne ku Buloba bulaya, biikàle ne mubidi tumatuma ne makàndà. Pàvwa Izàlèlèlà wènda wèndela mu cipèèla, kakùvwa muntu nànsha umwe ne butekètè munkaci mwàbò to, ku ntengu mukwàbò aku. Swàku bwà byènzekelèku bantu aba, Taatù, bwalu tudi tutùma mìshwàlà eyi, mu Dìna dyà Yesù Kilistò. Amen.

²⁵⁶ Nzambi ànubènèshè, muntu ne muntu. Panùdi nupeta mìshwàlà yènù mpindyewu apu, itàbùùjaayi ne mwoyi wènù wònsò. Nudi nwitabuuja ne Nzambi ùdi ùmvwa cyòci eci anyi? Nwamònu anyi? Ndi—ndi muswè kwamba nùku ewu. Kanwèdikù, kanwèdiku mpatà to, nànsha kakesè. Nwamònu's, cìdi mwà kumwèka cyà pabwàci cyà menemene. Mfwilaayikù luse, katancì kakesè cyanàànà. Kanwèdikù mpatà to, nànsha kakesè. Kàdi itabùùjaayi mpindyewu ne, citwàlòmbu aci, Nzambi ùdi ucìfila.

²⁵⁷ Udi witabuuja ne aci n'Nzambi kaaba aka, udi mumanyè mùnsokontù wà mwoyi wèbè anyi? Udi mumanyè ne witabuuja ne awu n'Nzambi anyi? Mpindyewu sòmbeshà ànu meeji èbè awu mpindyewu ne, kacyèna mwà kwikala cìngà cintu to. Nwamònu anyi?

²⁵⁸ Mpindyewu, ambàbi tǔng bu ne nkufwànyìne kwikala mààlabà munènè, kule kwàka kùkaadi kupite bidimu eci cishààle bwalu-bulonda. Nènku pìikalà bantu, mu bidimu bicilwalwà, bu byòbi mwa nànkù, bóbò's bàvwa mwà kulwa kwamba ne: "Èè, bu ne mvwakù ne mwoyi mwinè musangu awu's, nùku's ndi mumòne aci cyenzèke, balùmyànà wa yààya, s'ki cyònsò cìvwa cìkèngela bwà mèmè kumanya aci's. Nùku's ndi mucitàbùùje ànu piinè apu!" Nwamònu's, cintu cimwècimwè cyùdi witabuuja aci, bu wèwepù pàakacyènzàYe musangu awu apu! Vùlukà ne, ùcìdi ànu Yèyè awu. M'Mwoyi Wèndè munda mwèbè. Nzambi ànubènèshè.



ÛJAADIKÀ DÌYÌ DYÈNDE LUA65-0426
(Proving His Word)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Dimwè dilòdò, dya matùkù 26 à ngondo mwinàâyì, cidimu cyà 1965, bwà Mpungilu wa Buloba bujima wa Bwobumwè bwà Beena Kantu-ku-Byanza ku Hôtel Ambassade mu Los Angeles, Californie, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maaluu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org